

**NATIONAL ASSEMBLY OF
SEYCHELLES**

Tuesday 24th November, 2020

The Assembly met at 09am

National Anthem

Moment of Reflection

Mr Speaker in the Chair

MR SPEAKER

Bonzour tou bann Manm Onorab. Bonzour nou telespektater a lekout. E byenveni pou swiv nou pou sesyon pour ozordi le 24 Novanm. Pour komanse mon ava zis eksplik en sanzman lo *Order Paper* ti annan en Kestyon Irzan ki ti'n ganny prezante par Onorab Gervais Henrie. E ki'n osi fer en pe ganny en pe latansyon lo medya enkli lo televizyon yer swar.

Apre kominikasyon yer en pe tar avek *Leader Lopozisyon* e avek *LGB*, zot ti fer mwan remarke ki i annan serten kriter dan *Standing Orders* ki sa kestyon i pa rankontre.

E pou eksplike, pou fer sir nou telespektater sirtou e bann Manm osi i byen okouran. En Kestyon i kapab i ganny demande avek en lot Manm dan Lasanble, zis si anba *Order*

31(5) zis si i annan pou fer avek en *Bill* ki devan Lasanble, oubyen travay en Manm dan Lasanble par egzanp son travay lo en Komite.

Sa posibilite pa fer pou Manm demann kestyon lo lezot size ki an deor travay Lasanble. Alor apre sa nou bezwen reviz *Order Paper* e nou'n retir sa kestyon. Mersi bokou. Wi, Onorab Henrie.

HON GERVAIS HENRIE

Bonzour Mr Speaker. Mon oule raise en *point of order* pou mwan koz lo sa size ki ou'n fek leve akoz dabor mon'n, mon ti met mon soumisyon kestyon an ekri e mon pa'n ganny enformen davans poudir mon kestyon ti'n ganny retire.

Mon still mentenir Mr Speaker poudir i ti *within my right as a Member* anba *Order 31(5)* pou mwan kapab demann sa kestyon.

Parski pou mwan letan mon lir sa *Order* i dir ki wi kestyon lo kestyon en *Bill*, en Mosyon ouswa okenn lezot size piblik ki konekte avek biznes Lasanble e ki sa Manm i responsab.

Alor kestyon mon ti pe demann lo konstriksyon nouvo Lopital La Digue, ki i en *undertaking* ki Prezidan Larepublik in fer dan Lasanble

Nasyonal. Savedir in fini vin en lasirans ki Lasanble i dwatet fer en swivi lo la.

E etandonnen ki Onorab Uranie i Manm elekte pou Distrik, Zil Pros, i pa merit zis responsabilite COGA pou fer *oversight* lo sa *undertaking*, e alor parti mon Kestyon i pe kestyonn son rol *oversight* e osi son rol reprezantasyon ki Konstitisyon i donn nou koman en Manm Lasanble, parmi sa 3 rol. So, mon *still* krwar poudir i ti tonm *within* sa provizyon ki *Order 31(5)* i fer. Mersi.

MR SPEAKER

Mersi pou ou pwen Onorab. Mwan en pti moman Onorab. Mwan mon pwen determinan lo sa kestyon se sa fraz ki i bezwen en size ki sa Manm i responsab, i annan en responsabilite. E se sa ki mon'n baz mon desizyon lo la. Onorab Pillay.

HON SEBASTIEN PILLAY

Mersi Mr Speaker. Mr Speaker ou annan parfetman rezon dan sa ki ou pe dir, akoz sa keksoz ki sa Manm i responsab i bezwen konnekte avek biznes Lasanble. Savedir si en Manm i al en vizit aletranze, la ou kapab vini demann sa Manm en kestyon lo kwa kontrandi sa vizit. Akoz Lasanble ki'n anvoy

li i responsab sa biznes Lasanble.

Be dan sa konteks i pa Onorab ki pou al konstrir sa lopital. I pa Onorab, sa i son rol reprezantasyon. Demen nou pou pe ouver en laport kot okenn Manm la anndan ki annan en proze dan son distrik, oubyen en keksoz ki pe pase dan son distrik. En lot Manm pou vin demann li kestyon lo la. Mon krwar sa ki enportan e si i annan en rezon akoz sa lord in ganny ekrir dan sa fason.

In ganny ekrir e in ganny dir poudir, “connected with the business of the Assembly for which such Members are responsible.” Lasanble pa responsab pou konstriksyon Lopital La Digue. Se Egzekitiv ki responsab pou konstriksyon Lopital La Digue. E mon krwar Onorab Henrie pe baz sa lo lefe ki onorab William in deza demann li, en menm kestyon ler i ti *Chairman COGA*.

Dan sa konteks Mr Speaker, mon krwar ou'n fini donn ou *ruling* e nou kapab bouze lo sa size. Mersi Mr Speaker.

(APPLAUSE)

MR SPEAKER

Mersi. Onorab Henrie ou annan en dernyen pwen pou fer lo la.

HON GERVAIS HENRIE

Wi, Mr Speaker mon dernyen pwen mon respekte ou *ruling*, me nou'n note ki yer *Leader Lopozisyon ti populist i ti pe rod 13enm mwan pou band 1 ek band 2 e ozordi i tre konservater dan son lenterpretasyon Standing Orders e nou note sa. Mersi.*

(APPLAUSE)

MR SPEAKER

Mersi. Mon krwar sa pwen ki ou'n leve i enteresan, e sertennman i enn ki nou Komite Lasanble i bezwen port latansyon avek. Me pou le moman nou ava enterpret li koumsa. Mersi. Mon ava pas lo prosen *item* lo *Order Paper*. Prezantasyon Papye Madanm Clerk.

MADAM CLERK

Mersi Mr Speaker. Bonzour Mr Speaker. Bonzour tou bann Manm e lafanmir Samedi ki avek nou dan Lasanble ozordi e tou dimoun ki a lekout.

Bann Papye ki pe ganny reprezante ozordi i: -

S.I. 156 of 2020 Anti-Money Laundering and Countering the Financing of Terrorism (Second Amendment) Regulations, 2020

S.I. 157 of 2020 Local Government First Election of Councillors (Repeal) Notice, 2020

Office of the Auditor General Activity Report and Audited Accounts 2019.

Office of the Auditor General Report of the Auditor General 2019. Mersi Mr Speaker.

MR SPEAKER

Mersi Madam Clerk. Bon avan nou kontinyen avek nou bann travay regilye e larestan *Order Paper*. Nou Lasanble ozordi pe onor sa ki pe vin en tradisyon e sa se en komemorasyon Lazournen Mondyal pour Zanfan.

E nou pe fer sa avek en Ladres par en zenn. Pou sa mon anvi rekonnet e entrodwir prezans dan lasal Miss Tannie Samedi. E osi avek li i son manman Mrs Rachel Samedi e dan Galeri avek li osi ki vin akonpanny li osi i annan Mrs Yasmine Umarji, Sef Egzekitiv Konsey Nasional pour Zanfan.

Mrs Michaella Nourrice, en ansenyan kot Lekol pour Zanfan Eksepsyonnel ki ti enn

bann ansenyan Tannie. E Mrs Sylvie Ernesta ki zofisyé pour komunikasyon pou levennman kot Konsey Nasyonal pour Zanfan. Donk byenveni tou nou bann envite.

Alor mon annan plezir pour ki nou kapab akey ozordi Miss Tannie Samedi e son manman e lezot dimoun ki'n akonpanny li.

Mon'n dir sa levennman ki nou pe fer ozordi pe vin en tradisyon. I fer trwazyenm lannen ki Lasanble Nasyonal i fer li an komemorasyon Lazournen Mondyal pour Zanfan ki ganny selebre le 20 Novanm. Sa levennman ti komans par linisyativ Komite Medya Lazenes ek Spor dan Lasanble. E an kolaborasyon avek Konsey Nasyonal pou zanfan. E mon kontan war ki zot pe tenir sa lokazyon avek en levennman komemoratif ozordi.

Parey zot konnen, i annan osi Lazournen Enternasyonal pou Zanfan ki ganny selebre le 01 Zen dan bokou pei enkli Sesel. Sa i fer de lokazyon dan lekel nou onor bann zanfan me i pa tro bokou.

Le 20 Novanm i mark dat ki Nasyon Zini ti mark deklarasyon iniversel lo drwa zanfan an 1954. E alor sa i labaz istorik sa levennman ki nou pe komemore ozordi.

Donk sa ki nou pe onore spesifikman se drwa zanfan, e nou kapab dir napa latas pli nob ki pli merit nou devouman ki defann e promot drwa zanfan. Dan lemonn ozordi drwa zanfan i ankor en size ki demann bokou volonte politik, bokou travay Lezislatif bokou zefor governmantal e partisipasyon lasosyete.

Lo baz Lorganizasyon e lo baz endividyle. Zanfan i ankor anba menas leksplwatasyon, lesklavaz, trafik imen, vyolans, lapovrete e lezot kondisyon ki met zot lavi e zot byennet a risk.

Isi dan nou pei, menm si nou ganny eparnye bann kondisyon ki pli sever e pli penib dan lemonn tro bokou zanfan i ankor sibir vyolans, labi, neglizans, lapovrete e mank loportinite pou devlope e viv en lavi ere.

Miss Tannie Samedi i isi avek nou ozordi, pou temwanny en pe lo drwa e kondisyon pour zanfan dan nou pei, e lo son prop leksperyans koman en zanfan avek dezabilite e dezavantaz dan lavi.

Tannie i en zenn fiy 15an ki'n annan kouraz egzanpler. In ne aveg e avek dezabilite, ki'n demande ki fer li annan en lanfans pli difisil ki lezot i fer fas avek. Me son paran in la pou gid e avek zot determinasyon

Tannie in komans antreprann sa semen lavi par aprann kouraz li osi.

Ozordi i an zenn ki pe swiv en parkour parey lezot zenn otan ki i kapab. I en zenn ki pe fer letid segonder dan Lekol Plaisance. Son size prefere se Lasyans e Listwar. I abil osi ek teknolozi modern e i partisip dan bann group *WhatsApp* parey bokou son bann zanmi.

Tannie i osi kontan lanmizik, i annan en gran latasman pou son bann gran paran e i anvi vin en ansenyan Bray langaz pou dimoun aveg, ki montre ki son konsern se pou ed lezot avek dezabilite.

Tannie parey mon'n dir i en zenn egzanpler e en lenspirasyon pou lezot zenn. Mon kontan ki ozordi i kapab partaz avek nou son refleksyon lo son parkour personnel, e osi lo kondisyon pour zanfan e sirtou zanfan avek dezabilite.

Miss Tannie Samedi mon pas ou laparol pou adres Lasanble.

MS TANNIE SAMEDI

Mr Speaker,
Manm Lasanble Nasional,
Bann envite, bonzour.

Mon vreman kontan e mon fyer pou vin dan Lasanble ozordi. Depi ler mon'n ne mon manman ti konnen mon pa

vwar kler me i pa'n abandonn mwan. Mon'n pas Lekol Eksepsyonnelle ozordi mon dan laklas S1(3) lekol segonder.

Mon reste Barbarons avek mon fanmir. Mon annan bokou zanmi parey tou zanfan mon laz. Me mon osi en zanfan avek bokou bezwen. Toulezour mon manman i vin lekol avek mwan. I pran mon *notes* pou mwan apre i lir mon *notes* avek mwan. Ouswa i rikorde.

Mon ekoute. Mon aprann parker. Mon pa kapab ekrir *a, b, c, d* mon ekrir *braille*. Dan legzanmen pa tou lesson ki mon kapab fer. Si mon ti fer tou legzanmen mon krwar mon ti pou dan *set 1*.

Mis i *print* bann portre lo en masin spesyal e mon pas lanmen lo la pou dir kwa sa. Ouswa Mis i lir kestyion mon reponn li i ekrir. Mon'n vin dan Lasanble ozordi pou demann zot pou pa oubliy bann zanfan Sesel, sirtou bann zanfan avek dezabilite. Pas en pti kou kot Lekol Eksepsyonnelle e zot ava konnen ki mannyer i difisil pour nou ki pa tandé, sa ki pa vwar, sa ki dan *wheelchair* ouswa ki ganny *autism*.

Sa bann Mis laba mon vreman kontan zot, akoz zot fer sa ki zot kapab me i pa ase. Zot bezwen sipor bann profesyonnel e bann laklas pli

spesyalize. I annan laklas pou bann zanfan ki sourd Au Cap. Me konbyen paran ki anvoy zot zanfan laba? Okenn zanfan Sesel pa merit ganny kit deryer.

Pa tou dimoun ki konpran nou dezabilite. In ler pou zanfan e adilt konpran nou, siport nou, ed nou. Demen zot ganny en aksidan, zot kapab vin parey nou zot osi. Annou pli serye avek labi lo zanfan parey mwan. Sa ki profit lo nou pou pran nou larzan e maltret nou. Get bann servis ki annan pou bann ki'n fini lekol segonder parey sa enn North East Point. Mon pa tro kontan al anvil akoz mon pa ankor ganny montre ki mannyer pou mars avek mon *cane*.

Pa tou landrwa osi ki annan *rail* pou atrape. Si ou dan *wheelchair* pli move, bann landrwa piblik laplipar napa akse pou bann dimoun avek dezabilite. Konvansyon lo Drwa bann Zanfan i enportan me pa oubliy Konvansyon pou bann dimoun avek dezabilite.

Si nou napa bann servis ek facilite e nou bann dezabilite, nou napa menm sans. Zot pe *fail* en group zanfan Seselwa.

Pou Lazournen Enternasyonal le 20 Novanm lemonn antye ti les zanfan koze sa zour. Ler mon fini koze

demann zot lekor, ki mannyer zot kapab fer lavi bann zanfan parey mwan pli fasil. Vizit nou, gete lekel ki pe soufer an silans. Fer sir nou pe ganny trete byen. Napa bokou nou. Apre zot a dir mwan zot menm si tou zanfan Sesel i zwaye.

Ler mon fini lekol mon ti av kontan vin en *brail teacher* i pou posib pou mwan? Tou i depan lo sa ki zot fer pou mwan e pour zanfan avek dezabilite dan Sesel. Fer li zot priyorite e si mon retournen dan 5an zot a fyer pou vwar ki mon pa'n *fail* zot.

I pa fasil pou annan en zanfan parey *mwan*. Mersi tou paran ki parey mwan manman zot les tou pou asire nou ganny en fitir. Mersi Manmi, ou pa'n demande pou mwan vin koumsa me ou kontan mwan avek tou ou leker.

Mersi Manmi mon kontan ou. Mersi tou bann dimoun ki travay avek bann zanfan avek dezabilite. Zot merit ganny rekonnet. Kontinyen. Mersi tou landrwa travay ki anploy dimoun avek dezabilite. Nou bann dimoun ki annan talan, nou kapab kontribye nou osi. Mersi tou Lorganizasyon ki pe travay pour zanfan, parey Konsey Nasional pou Bann Dezabilite.

Mersi osi Konsey Nasyonal pou Zanfan NCC. I fer 40an depi zot travay avek zanfan. Zot pa'n gete si mon annan dezabilite. Zot in donn mwan sa sans pou koz lo non tou zanfan. Mersi.

Mon aprann sa *speech* parker. Lontan mon pa fer *braille*, mon'n komans blyie. Si mon napa *braille* mon pa pou zanmen kapab lir mon menm ankor. Mon pou depan lo en lot dimoun pou lir pou mwan. Mon rev i rev tou zanfan, pou viv dan en pei ki donn sans pour grandi e vin sa ki nou anvi vini. Pa oubliy mon rev osi.

Mr Speaker mersi pou donn mwan sa sans pou vin dan Lasanble. Mon swet zot tou zanfan bonn fet Lazournen Enternasyonal bann Zanfan menm si in fini pase.

Mon osi salye tou bann dimoun ki pe viv avek dezabilite. Mon swet zot tou en bonn fet le 3 Desanm. Mersi pou ekout mwan.

(APPLAUSE)

MR SPEAKER

Mersi Tannie pou ou parol e mon ava dir ou mon reste tre sansib avek lapel ki ou'n fer pou Lasanble Nasyonal. Pou onor sa lokasyon e onor prezans Tannie isi, petet mon ti kapab

demann sa de *Leaders* Lasanble pou pronons en parol an sa lokazyon. Onorab Georges silvouple.

HON BERNARD GEORGES

Avek ou permisyon Mr Speaker eski mon kapab koz avan? E rezon pou sa i senp mon sipoze dan en lot landrwa la 9.30 e ou ava eskiz mwan osito ki mwan koze. Me mon pa'n kapab kit lasal telman mon'n emerveye par Tannie ek sa bann parol ki'n koze ozordi.

Alor Tannie mersi, mersi bokou pou ou bann parol. Mon pou an retar kot mon pe ale. Me mon krwar zot ava konpran mwan, si mon'n reste e ou ava eskiz mwan Mr Speaker e tou bann Manm e osi Tannie si komann mon fini koz mon ava ale. Me mon *hope* ki dan 10 ou 15 minit mon ava ganny en sans koz avek ou.

Mr Speaker bomaten mon krwar nou tou isi dan sa Lasanble e tou dimoun ki pe ekoute dan lakour, nou'n emerveye par kouraz e determinasyon en zenn manmzel ek son manman. Akoz nou pa bezwen blyi Mrs Samedi osi ki la a son kote, ki lasans pa'n anvi ki in ganny tou bann fakilte ki nou *take for granted* nou menm. Me ki malgre sa zot pa'n les lebra

tonbe e zot in devoue zot lekor pou viv en lavi osi normal ki posib.

E sa bomaten mon krwar se en laprev, en kouraz ekstraordiner ki nou'n vvar dan Tannie ek dan madanm Samedi ki'n la a son kote. In osi montre nou ki malgre ki nou annan en sosyete ki la pou reponn a lapel tou son zanfan, e nou vvar ki i annan *NCC*, nou vvar ki Tannie in kapab servi en pe *braille* bomaten malgre ki parey in dir nou ki'n aprann son *speech* parke, i annan serten fakilte ki lasosyete i met an plas. Me in osi fer nou rekonnet e ki kantmenm nou sosyete in fer serten pa. I annan ankor en gran semen ki nou bezwen trase e ki nou bezwen swiv, pour ki parey Tannie in dir sa rev ki li i annan pou ki i vin sa dimoun ki i anvi vini i kapab ganny realize.

Alor Mr Speaker mon ti ava kontan ozordi o non sa Lasanble, e o non bann Manm ki mon dirize isi dan sa Lasanble, pou dir avek Tannie ek tou lezot zanfan isi Sessel, ki pe viv avek serten en dezabilite, ki nou pa pou bliy li e nou pa pou bliy zot.

Tou sa ki nou kapab fer dan sa Lasanble e tou sa ki nou kapab fer antan ki parti mazoriter dan sa Lasanble, e

antan ki reprezantan Gouvernman, nou *pledge* nou lekor ki nou pou fer li pou ki zot rev ava kapab vin en realite. Alor Tannie, mersi pou letan ki ou'n pran. Mersi pou ou kouraz. Mersi pou en vin isi anver e *contre* tou pou *remind* nou ki i annan dimoun dan nou sosyete, ki napa tou bann sans ki nou, nou annan.

E mersi ki ou'n anmenn ou Manman pou montre nou ki i annan bann dimoun ki pou les tou keksoz akote pou zot anmenn sa sipor ek sa soutyen ki bann, nou ban zanfan ki napa sans ki lezot i annan i kapab malgre sa devlop e *achieve* en lavi osi normal ki posib.

Alor Tannie ek madanm Samedi mersi bokou. Mersi pou zot prezans. Mersi pou zot *reminder*. E sorti isi silvouple an konesans ki sa Lasanble e mon koz mon krwar pou tou lede kote, i ava fer tou sa ki nou kapab fer pou anmenn otan soulazman ki posib pou Tannie ek pou bann lezot parey zot. Mersi bokou Mr Speaker.

(APPLAUSE)

MR SPEAKER

Mersi Onorab Georges. Onorab Pillay.

HON SEBASTIEN PILLAY

Mersi Mr Speaker. Mr Speaker souvandfwa dan lavi ou rankontre bann lokazyon ki mark ou, e ki montre ou poudir i toulstan vreman, vreman enportan pou ou *cherish* sa ki ou'n gannyen. E fer ou mye pou realiz ou bann rev avek tou bann fakilte ki ou'n gannyen, akoz i annan lezot ki pa neseserman fortinen parey ou menm.

Ozordi bomaten Mr Speaker, mon'n ganny *reminded* par en zenn fiy tre kouraze ki malgre ki lavi i kapab difisil, e malgre ki tou difikilte ki lavi i kapab anvoye anver ou, ou devret kapab fer tou pou ou sirmont li. E ou devret kapab fer tou pou ou gard en zwa de viv, e gard en konpasyon anver lezot dimoun, akoz se sa ki karakteriz nou koman imen.

Ozordi Tannie avek son Manman in vin dan Lasamble, e in osi montre nou en keksoz enportan e mon ti ava kontan ki bann zenn oubyen bann medya, ki pe pas sa diskour ki sa zenn fiy in fer devan nou, i osi fer sa diskour arive dan tou lekol. Pou montre nou bann zenn dan bann lekol ki bann ki kapab vwar kler, tandé, marse, taye ekoute fer tou keksoz. Konbyen

antre zot ki pe reelman pran zot letid o serye?

Konbyen antre zot ki pe reelman sey aprann parker lesson ki zot *teachers* pe montre zot. Sa pti ladres ki'n fer devan nou i al pli lwen ki sa. I al pli lwen ki en ladres ki'n vin fer i en pledwari e in tous mwan ler in dir pou nou konn bann ki pe soufer an silans.

Mon pou aksepte poudir i pa leka toulstan ki nou kapab zet en lizye, akoz nou tripo lavi parey ou dir, i amenn nou pou konsider bokou keksoz ki pe pase dan nou lavi personnel e non pa ki pe pase dan lavi lezot dimoun. Me dan sa langazman ki nou'n fer koman reprezantan Lepep, i pou enportan ki nou met tou zefor posib, e nou met tou lanfaz posib pou ki nou kapab siport bann *cause* parey sa ki Tannie in met devan nou ozordi.

Mr Speaker mon demann mon lekor si mon pou zanmen kapab lir *braille* oubyen mon pou zanmen kapab memoriz sa kantite keksoz ki sa zenn fiy in lir. E sa i montre ou poudir malgre i annan serten fakilte ki i pa'n ganny *bless* avek, me i annan lezot ki in gannyen. E sa i montre nou ki toulstan i annan keksoz ki nou pa konnen lo en dimoun e pa zanmen ziz en liv par son lapo.

E mon krwar ozordi ou'n *remind* nou Lasanble, pou nou kontinyen gard nou reste *humble*. Reste konekte e toultan gard respe en keksoz ki vreman enportan. E mon remersi ou bokou pou sa, pou vin isi bomaten e pou montre mwan ki vreman i annan *hope* pou nou zenerasyon fitir, si zot pran sa letan pou zot sezi bann loportinite ki zot gannyen.

E mon donn ou mon langazman, ki mon pou fer mon mye, mon mye posib pou mwan kapab travay osi pou ede sanpyonn sa. Akoz ki ou'n met devan nou Lasanble e mon krwar tou Manm Lasanble osi i *feel* parey e mon krwar mon koz lo de lapar tou Manm isi anndan ki ozordi ou'n vreman tous nou.

E mon swet ou tou de meyer dan ou bann keksoz le fitir, e ki Bondye ava kontinyen beni ou e ki ou manman ava akote ou e ki zot a kapab ganny sa sipor neseser pou kontinyen avanse. Mersi Mr Speaker.

(APPLAUSE)

MR SPEAKER

Mersi. Mersi Onorab Pillay. Onorab Naddy Zialor in lev lanmen pou li ganny en pti parol e zot ava konpran mwan

si mon akord li en dernyen mo. Onorab Zialor.

HON NADDY ZIALOR

Mersi Mr Speaker. Mersi pou ou lakor premyerman mon ava swet Tannie ek son manman byenveni dan Lasanble Nasional. I en plezir pou nou resevwar ou.

Mon pa poudir bokou mon ti ava kontan petet ozordi profit en lokazyon pou mwan remersi ou Tannie. Remersi ou bokou pou tous Sesel bomaten, atraver ou leksperyans lavi. E parey le de Onorab in dir le de *Leader* mon krwar parfwa i neseser ki nou annan en *wakeup call*, pou montre avek lemonn, pou montre avek Sesel ki dezabilite i al bokou plis ki sa ki nou vvar. I en santiman, i en *still* lavi e ou'n fer resorti bokou difikilte ki ou pe rankontre konman en zenn.

Mon konnen, e mon konpran ki annan bokou zenn zanfan avek dezabilite, ki pe pas dan difikilte ki ou pe pase ozordi.

So, mon lapel ozordi Mr Speaker i pou Sesel. I pou Sesel e pou tou Seselwa. I pou lemonn par lefe ki nou pe selebre Lazournen bann Zanfan, pour nou realize ki nou annan serten keksoz serten manke keksoz ki nou'n manke

dan lepase e nou ozordi nou bezwen get pli lwen ki sa.

Bann dimoun avek dezabilite Tannie in fer nou konpran, ki i annan en rev. E mwan sa ki mwan mon'n sezi se pa Tannie ki annan en dezabilite. Me se lemonn otour li ki annan en dezabilite.

Se zot bezwen ki pa pe ganny zwenn.

(APPLAUSE)

HON NADDY ZIALOR

E mon swete permet mwan Mr Speaker pou mwan lans en lapel avek Gouvernman ozordi. Dan *Disability Trust Fund* nou bezwen plis resours, pou nou kapab zwenn merit e bezwen, sirtou lo kote teknolozi avanse. Sirtou lo kote *adaptative aids*. Bann facilite pour nou fer lavi bann dimoun avek dezabilite bokou, bokou pli fasil.

Alors Tannie mon salye ou zefor bomaten. Mon salye ou kouraz. Mon salye kouraz ou paran e tou paran Sesel. Mon salye bann dimoun avek dezabilite e mon swete ozordi Sesel in ekout ou, e Sesel i ava zwenn avek nou pou fer en diferans dan zot lavi. Mersi Mr Speaker.

(APPLAUSE)

MR SPEAKER

Mersi Onorab. Avek sa mon krwar nou ava *adjourn* pou en demi erdtan pou permet nou zwenn Tannie avek son manman e avek son bann envite deor pour en *photo souvenir*.

E nou ava repran travay 10.15. Nou a fer en sel *break* apre nou ava repran travay e nou ava kontinyen o tan ki posib. Mersi bokou e mersi ankor Tannie e Mrs Samedi.

(BREAK)

MR SPEAKER

Alors nou a kontinyen avek biznes pou ozordi. E lo *Order Paper* nou annan en *Private Notice Question Leader* Lopozisyon. E pou sa nou annan Minis Lasante, e Minis Tourism ki pou zwenn nou. Alors mon demann reporter pou apel zot silvouple.

Nou annan plezir pou akey dan lasal Minis Peggy Vidot, Minis pou Lasante. Minis pou Tourizm, Minis Sylvestre Radegonde. E avek zot lo kote Lasante i annan Dr Jude Gedeon, Komisyoner Lasante Piblik. E lo kote *Tourism*, Mrs Anne Lafortune, Sekreter

Prensipal pou *Tourism*. E byenveni zot tou. E mon ava apel Onorab Sebastien Pillay pou poz son kestyon. Mersi.

HON SEBASTIEN PILLAY

Mersi Mr Speaker, bonzour. E bonzour nou 2 Minis ek zot delegasyon. Bonzour tou koleg Onorab. E bonzour tou dimoun ki pe ekout nou. Mr Speaker mon kestyon i lir koumsa: -

Swivan lanons ki i annan 3 novo ka *COVID-19* ki'n ganny konfirmen, e lefe ki enn ant sa bann ka i lo Praslin dan en letablisman touristik. E prenon kont ki pandan *weekend* in annan aktivite dan serten letablisman lo sa zil, eski Minis responsab pou Lasante e Minis responsab pou Tourizm i kapab dir nou Lasanble:

(1) Ki aksyon sa de Minister i anvizaze pran anver bann letablisman ki pa swiv regilasyon Komisyon Lasante Piblik, e la azir kontrerman avek sa ki Prezidan Larepublik ti dir dan son ladres devan nou Lasanble?

Dezyenm, ki bann mezir zot pe pran pou anpese ki sa sityasyon pa deteryore, sirtou la ki nou pe al apres letan festivite, pou asire ki bann mezir kontrol *COVID-19* i ganny byen respekte? Mersi Mr Speaker.

MR SPEAKER

Mersi Onorab. Mon krwar kestyon i konsern plito Minis Lasante. Alor mon envit Minis Peggy Vidot pou adres kestyon.

MINISTER PEGGY VIDOT

Mersi Mr Speaker. Bonzour Mr Speaker. Bonzour tou Onorab. Bonzour tou dimoun ki a lekout. Mr Speaker, an reponn premye bout kestyon Onorab, nou dir ki sityasyon mondal *COVID-19* pe agrave dan en fason alarman. E Sesel i reste vilnerab, akoz nou pe akeyir Seselwa ki pe retournen, e viziter ki pe vin vakans dan nou zoli pei.

Nou realize ki nou pa kapab anpes dimoun antre Sesel. Akoz nou bezwen ouver nou lekonomi tourizm. Pandan plizyer mwan, nou pe travay tre pre avek bann Letablisman Touristik parmi lezot ankor. Pou fer sir ki nou redwir risk ganny novo ka *COVID-19*, e transmisyon dan kominote.

Nou pe osi travay avek tou lezot lazans pou fer sir ki kominote an antye i zwe son rol dan sa prevansyon. Depi ki sa premye ka *COVID-19* ti ganny detekte an Mars 2020, Sesel in anrezistre ziske ozordi, 168 ka.

An se moman i annan 6 ka aktiv dan pei. Pandan sa

weekend ki'n fek pase, i annan 5 nouvo dimoun ki'n teste pozitiv. 3 ladan i dan en Letablisman Touristik. Zot form par en group viziter ki'n fer zot bann aktivite vakans ansanm. Sa 2 lezot ka i 2 etranze avek GOP ki ti dan karantenn isi Mahe.

Mr Speaker, mon ti a kontan fer tre kler ki bann mezir prevansyon ki neseser, i pa zis akoz in annan sa 3 ka Praslin. Sa bann mezir i devret pe toultan aplike. I enportan pran kont ki pa zis aksyon ver letablisman ki neseser. I osi depan lo aksyon ki kominate i pran.

Tou letablisman i annan prosedir ki zot in adopte avek sipor Lasante Piblik, e Departman Tourizm. Sa i enkli prosedir netwayaz, anrezistreman bann viziter. Prosedir sirveyans, eksatera.

Tou letablisman touristik i annan en pwen fokal. Si zot annan en *health and safety officer*, normalman i sa dimoun. Ou sinon i annan en lot. E zot tou zot in resevwar formasyon dan bann prosedir ki Lasante Piblik in met an plas. E zot an kontak avek Lasante Piblik lo en baz kontinyel.

Nou pe kontinyelman ranforsi sa bann prosedir. Donn tou sipor adisyonnal kot i

neseser. An menm tan ki nou fer dimoun dan sa bann letablisman konpran lenportans sa bann prosedir. Kot nou vwar ki serten sa bann prosedir pa pe ganny byen swivi, nou antre dan en dyalog avek sa letablisman, pou zot rektifye sa ki zot pe mal fer.

Si nou trouve ki sa i kontinyen, ouswa en letablisman pa kapab mentenir sa bann prosedir, nou pou napa lot swa, me pou sispann zot loperasyon pandan, parey nou'n deza fer avek serten letablisman. Ziske ler ki zot rektifye tou sa bann mankman ki nou'n vwar.

Mon ti a kontan repet sa ki Prezidan ti dir Mardi pase, le 17 Novanm. Pou quote sa ki i ti dir, "zot tou zot annan en devwar sivik e moral. E dan lentere zot biznes pou zot osi kontribye aktivman pou kas lasenn transmisyon COVID." Alor i ti enplor tou dimoun pou zwe son rol, e fer sa ki zot bezwen pou fer sir ki zot met tou bann protokol an plas. E i ti kontinyen pou dir, "Si sa bann protokol pa ganny swiv, i pou bezwen annan aksyon serye ki ganny pran."

An se ki konsern bann mezir ki kominate fodre pran, nou'n dir an plizyer repriz, premyerman pratik bann mezir

lizyenn ki nou rekomande. Dezyenmman, met *mask* partou e a tou moman, parey dan Lalwa i demande.

Trwazyenmman, gard zistans e evit kontak fizik ler nou zwenn en lot dimoun. Katriyenmman, evite fer group espesyalman dan parti, dan bann *bar*, eksetera.

Mr Speaker, lo dezyenm morso kestyon Onorab, Mr Speaker, bokou in ganny fer. E pe ganny fer pou gard Sesel ek Seselwa *safe* pandan sa lepidemi, sa pandemi. E si nou senser avek nou lekor, napa personn ki ozordi Sesel ki kapab dir, i pa konnen ki mannyer i pou protez son lekor kont *COVID-19*.

Par kont, sa ki nou bezwen aranze se nou konportman, nou latitud anver sa bann mesaz ek sa bann gidans. Pandan plizyer mwan travayer Lasante e bokou lezot, pe repet sa bann mesaz byen senp. Gard zistans, pa groupe, envit kontak fizik, met *mask* kot landrwa i demande.

An vi ki nou konnen ki dan nou kiltir i annan pa mal selebrasyon pandan sa letan festivite, nou pou entansifye nou zefor pou fer plis ledikasyon piblik. Kontinyen travay pli pre avek bann letablisman, pou fer sir ki zot pe

swiv tou protokol dan nenport ki aktivite ki zot annan.

Nou konnen an menm tan, ki sa pandemi i ankor pe evolye. Alor nou stratezi i pou bezwen sanze, si i annan okenn nesesite anliny avek sanzman ki nou pou vvar dan pandemik.

Mon ti a kontan a sa staz felisit bann lorganizasyon ek bann endividé, ki pe fer zefor pou swiv tou bann gidans e protokol. Mon felisit bann lekol pou lafason ki zot in azir, e zot langazman. Mon osi rekonnert gran zefor plizyer Departman Gouvernman e lorganizasyon prive. Mon ti a kontan antann dimoun dir, ki Lasante pa oule. Mon pa ti a kontan tann dimoun dir, "Ki Lasante pa oule nou anmize pandan bann letan festivite."

Mon ti a prefere tann dimoun dir, "Ki pandan sa letan Nwel ek Lannen, nou pe pran tou mezir pou protez nou zanfan e nou fanmir, ek nou pei." Alor mon demann ankor tou bann Onorab pou ed nou dan sa travay, pou gard Sesel *safe*, e anpes transmisyon *COVID* dan kominote. Annou pratik tou bann mezir ki Lasante in met an plas.

Mr Speaker, mon pa konnen si mon koleg Minis Touris ti ava kontan azoute.

MR SPEAKER

Wi, mersi Minis. Mon a pas laparol avek Minis Radegonde, si i le azout keksoz.

MINISTER SYLVESTRE RADEGONDE

Mersi Mr Speaker. Mr Speaker, Onorab *Leader Lopozisyon*, Onorab *Leader Zafer Gouvernman*, tou Onorab, mersi bokou pou donn mwan laparol.

Mon ti a kontan Mr Speaker, apiy tou sa ki mon koleg Minis Lasante in dir. E re afirmen ki i annan en kolaborasyon etrwat, ant nou 2 Minister. I annan dan Departman Tourizm en tim 12 dimoun, ki'n travay avek Minister Lasante ler ti pe met bann kriter. Bann travay lo bann protokol pou bann lotel.

E sa 12 dimoun ki nou annan i ede dan *monitoring*. I vre ki nou annan en travay, nou bezwen akseler sa *monitoring* ki nou bezwen fer, plis *spot checks*. Me ou a konpran osi bann kontrent avek 12 dimoun, i annan an se moman plis ki 400 letablisman touristik ki'n ganny kategorize pou par egzanp resevwar bann touris dan kategori 1, kategori 2.

Me nou bezwen travay avek sa ki nou annan la. E regarde kwa ki nou kapab fer

pou nou desarz sa responsabilite ki nou annan.

Travay sansibilizasyon Mr Speaker, nou kontinyen fer. I annan sa *taskforce, Tourism Taskforce* ki mon *Chair* tou le semenn. Sa size i ganny diskite. Pou annan en *meeting* pli tar sa semenn avek Lasosyasyon bann Otelye, *SHTA*. Kot nou pou, enn dan bann topik ki mon pe met lo azanda, se zisteman diskit sa *issue*, pou sansibiliz tou dimoun.

Mon krwar nou tou, parey Minister Lasante in dir. Mon krwar nou tou nou konsyan sa kriz ki nou ladan. Me i neseser tanzantan pou nou refer le pwen. Semenn prosenn mon pe komans en seri *meeting* avek tou bann otelye lo tou le 3 zil. La Digue, Praslin, Mahe. Nou pe komans La Digue pou nou repas sa mesaz.

Donk i en travay tou dimoun. Lotelyer, nou dimoun dan kominate, nou tou nou devret pran nou responsabilite. Sa ki mon kapab reasir sa Lasable, reasir *Leader Lopozisyon*, se ki nou pe fer tou sa ki posib fer ou nou ranfors sa.

I vre ki ranfors, mon pe dir *enforcement*. *Enforcement*, se sa ranforsman an Kreol? *Enforcement* i en *challenge*, e

nou bezwen met plis lanfaz lo la. So vwala Mr Speaker. Mersi.

MR SPEAKER

Mersi Minis. Nou a pran Kestyon Siplementer. Onorab Pillay.

HON SEBASTIEN PILLAY

Mersi Mr Speaker. Mersi le 2 Minis pou zot bann larepons. Kestyon ki mon pe demande se ki an relasyon ek kestyon limero 1. Par lefe ki in annan en *video* ki'n sirkile, mon krwar in menm ariv kot Minister Lasante. Mwan mon'n gannyen, plizyer dimoun in sirkile.

Kot pe montre menm etablisman kot Prezidan Larepublik ti ale dernyen fwa pou fer en *meeting*. Kot i annan en aktivite ki pe *go on*. E kot plizyer dimoun pe groupe dan sa aktivite. E sa apre ki Prezidan menm in dir, nou bezwen sanz nou konportman.

So kestyon ki mon pe demande, se eski nou pe regard pli pre sa bann tel konportman vizavi lapros ki mon konpran Gouvernman i le pran? Akoz zot le ki ler touris i kapab vini, touris i konfidan poudir nou, nou annan bann kontrol lokal pou protez zot? Mon krwar se sa resiprosite ki nou pe rode.

Dezyenmman, eski ou kapab dir nou, an relasyon avek sa bann novo ka, eski i annan bann *front office staff*, oubyen bann *frontline staff* dan sa letablisman ki'n ganny mete dan karantenn? Konbyen zot i annan? E eski zot pa'n, eski ou kapab klarifye oubyen, mon krwar i enposib pou ou sertifye! Me eski ou kapab dir nou si zot in kapab possibleman ganny kontak avek lezot dimoun an deor?

Akoz lenformasyon ki mwan mon pe gannyen la an se moman la, ki i annan 8 dimoun. E ki Minister Lasante pe komans fer *contact tracing* Merkredi avek Zedi. Koriz mwan si mon mal. Mersi Mr Speaker.

MR SPEAKER

Mersi Onorab. Minis Lasante mon krwar i a pran *lead* lo reponn sa bann kestyon. Me si zot bezwen pas laparol ek kanmarad silvouple fer li. Minis.

MINISTER PEGGY VIDOT

Mersi Mr Speaker. Mersi Onorab pou kestyon. Wi, nou'n vwar en *video* ki pe ganny sirkile, e nou an dyalog avek sa letablisman ki ou'n dir. Me nou'n ganny dir poudir sa i en *video* ki i pa'n pas sa *weekend*,

or in en *video* ki pli avan. I osi en *video* ki montre en aktivite ki deor. E nou an dyalog.

Parey nou'n dir, a sak fwa ki nou konnen en letablisman pa swiv tou protokol, nou antre an dyalog avek sa letablisman.

Wi, i annan dimoun dan sa letablisman ki an karantenn an se moman. Akoz enn sa bann dimoun ki'n teste pozitif ti vizit sa letablisman a en pwen. Pou sa rezon *contact tracing* i ganny fer. E ler nou fer *contact tracing* i annan diferan nivo risk. E si, pou nou la i annan 6 dimoun ki pe dan *passive surveillance*. 60 dimoun ki dan *passive surveillance*, i annan 8 dimoun ki dan fasilite. I annan, 7 dimoun ki bann touris ki dan karantenn. *From* sa letablisman *itself* i annan 6.

An tou 70 dimoun ki dan sirveyans pasiv. Dan letablisman ki an karantenn i annan 8.

MR SPEAKER

Mersi. Mersi Minis. Si Minis Touris napa keksoz pou azoute, mon a pas lo lot kestyon. Mon a pas kote isi. Onorab John Hoareau.

HON JOHN HOAREAU

Mersi Mr Speaker. Bonzour Mr Speaker. Bonzour Minis ek ou

lekip. Bonzour tou dimoun a lekout. Mr Speaker, kwa ki Minister Lasante pe fer pou ed bann pti *guest house* ki annan, par egzanp 6 a 10 lasanm.

E i annan zis petet 2 travayer ki pe netway lasanm, ki pe fer lasanm, e zot napa en *health officer* la, pou sa bann ka koumsa. Ki zot pe fer pou ed sa bann pti *guest house* ki san poursan Seselwa, pou zot kapab osi kapab anmenn kliyan, e ganny en pti reveni dan sa biznes?

Dezyenmman, i annan ka osi kot serten letablisman in pran kliyan kont bann protokol, kont bann norm ki'n ganny mete. Zot pa *compliant*. E i pa'n rann larzan sa bann kliyan. Eski zot annan en mezir, en keksoz ki zot pe met an plas, pou fer sir ki bann kliyan ki ganny retire dan sa bann letablisman, i ganny rann zot larzan osi? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Dan bann pti *guest house* parey ou dir, ki zot napa en *health and safety officer*, zot idantifye en dimoun ki vin nou *focal point*. E sa dimoun i ganny sa *training* ki kontinyel, e li sa

dimoun ki an kontak avek lasante piblik.

Alor menm si zot napa sa dimoun *health and safety*, i still annan en dimoun ki pwen fokal pou lasante. E ki ganny *train* dan lenportans, dan tou sa bann protokol ki annan an plas.

An se ki konsern, koman sa bann dimoun ki'n kapab al dan en letablisman ki zot in ganny retire? Mon koleg *Minister Radegonde* i ava reponn sa kestyion.

MR SPEAKER

Mersi.

MINISTER SYLVESTRE RADEGONDE

Mersi Mr Speaker. Mersi Onorab pou ou kestyion. O komansman sa ki nou okouran se ki, se vre ti annan bann *cancelations* ki ti arive an rezulta sa pandemik. Kot viziter ki ti'n deza boukte, peye, swa pey an antye ouswa met depozit, ti kennsel. E serten letablisman ti tenir larzan.

Me mon krwar mesaz ki ti ganny pase sa letan, se ki zot devret mazin lavenir. E se vre ki zot bezwen anmas tou sa larzan ki zot kapab gannyen, ki zot kapab met lanmen lo la. Me nou ti ankouraz zot pou pran konsiderasyon. I pa lafot sa

bann dimoun ki zot pa kapab mentenir zot *booking*, rann zot.

Me napa en Lalwa vreman ki forse. Ki fors personn rann *deposit*, rann peyman. Mon *advice* se ki Minister, Departman Touris in kontinyen travay avek sa bann letablisman konsernen, pou ankouraz zot. Osi lontan ki nou okouran mazorite, an gran mazorite sa zafer in ganny rezourd.

Si i annan aktyelman ki ankor *pending*, sa mon ava *liaise* avek *Tourism*, avek *PS* pou vvar. E ki mannyer nou kapab adrese pou sa bann ka spesifik.

E parey mon dir Mr Speaker, napa Lalwa. Nou pe kont lo bonn volonté, konprenezon bann dimoun konsernen. Bann letablisman konsernen. Mersi.

MR SPEAKER

Mersi Minis. Onorab Egbert Aglae.

HON EGBERT AGLAE

Mersi Mr Speaker. Mon a dir bonzour le 2 Minis. *PS* e Komisyoner Lasante. Minis premyerman, parey ou'n dir dan ou larepons, nou pe antre dan en peryod festivite la. E petet mon ti a kontan pou sezi loportinite osi pou eksplik pep

Seselwa premyerman. Vi ki pou annan bann differan rasanbleman.

Bann letablisman ki zot sertifye, ki kapab akey dimoun. Ouswa pou *host* en *event*. Eski zot pe fer kler, ti a bon fer kler sa bann ABC ki zot met devan ek sa bann letablisman ki fer sir ki zot swiv? Ki demen si i annan okenn evantyalite COVID, *contact tracing* i kapab ganny fer dan fason apropriye. Akoz mon konpran poudir i annan serten landrwa dimoun pa pe mete non. Eski ou kapab ranforsi sa en pti gin devan avek piblik, avek sa bann letablisman?

Dezyenmman, petet, si ou kapab eksplik nou en pti gin, ou sityasyon resours imen? Akoz ler i annan sa bann *events*, i bezwen annan en sirveyans ki ganny fer. Eski zot pe mazin al dan sa laliny petet pou servi anba *Public Health Order Act*, pou al dan sa laliny ki i annan bann sirveyans a o menm moman ki sa bann aktivite i ganny deroule, pou fer sir ki sa bann dimoun ki'n ganny permisyon pou *host event* pe swiv regilasyon de tou pri?

E dernyen, mon ti a kontan anba *Public Health Order Act*, Prezidan ler ti fer son adres, ti dir pou vin pli serye. Pou pran mezir pli serye. Eski

zot pe met zot pare pou pran bann aksyon apropriye avek okenn letablisman ki pa pe swiv regilasyon? Mersi.

MR SPEAKER

Mersi. Mon ti a demann bann Onorab pou limit Kestyon Siplementer, 2 kestyon silvouple. Pou nou permet kouver tou ki le demann kestyon. Mersi Onorab. E Minis.

MINISTER PEGGY VIDOT

Mersi Mr Speaker. Mersi Onorab. Onorab dan mon repons mon'n dir ki nou pou ranforsi ledikasyon piblik dan bann semenn ki pe *lead up* pou nou peryod festivite. E nou pe kontinyen travay pli pre avek bann etablisman, pou fer sir ki zot byen konpran tou bann protokol ki nou annan an plas.

Nou pe travay pre avek *Licensing Authority*, avek *Tourism* pou laspe *monitoring*. E ankor travay pou eksplik tou bann dimoun dan bann facilite, dan bann etablisman, lenportans ki anmezir nou antre dan sa peryod, ki zot vin bokou pli konsyan lenportans fer sir ki nou gard tou sa bann protokol ki i annan an plas.

Lo nivo, si nou annan ase mendev pou nou fer tou sa? Mon konpran avek

Konmisyoner ki nou pe kapab organiz nou pou nou kapab donn sa servis ki nou bezwen dan sa lentalval, dan sa peryod. Akoz souvan parey ou konnen ki sa peryod i demann en pe plis, e alor nou pe demann.

E osi nou pe pran sa loportinite pou nou dir dimoun, regard en pe par egzanp bann keksoz ki zot pou fer, si zot annan, rankontre, esey pou gard sa dan en group ki zot pli abitye swiv. Si ou le parey zot dir an Angle, "dan zot bubble". E fer keksoz pli pti. *As much as possible* fer keksoz deor, pa tro dan landrwa ki an fermen.

E nou bann fason parey ou dir, eski nou pe pran vreman aksyon? Nou kontan dir poudir nou prefere komans dyalog avek bann etablisman. Bann landrwa ek bann keksoz ki fodre nou fer. Dyaloge avan, fer zot rekonnert kote zot pe kas bann regilasyon. Travay ek zot si i annan bezwen pou plis ledikasyon. Me kan sa pa marse, kan zot kontinyen. Definitivman nou bezwen pran aksyon pli serye.

E in deza ganny pran avek diferan etablisman. E nou pa pou ezit-e pou fer li si nou bezwen fer.

MR SPEAKER

Mersi Minis. Onorab Clive Roucou.

HON CLIVE ROUCOU

Mersi Mr Speaker. Bonzour tou le 2 Minis avek zot delegasyon, bonzour tou Manm koleg Onorab. Mr Speaker premyerman mon anvi demann Minis Vidot pou li konfirmen si tou *contact tracing* in fini fer dan tou sa bann ka, e si non kwa ki annan ki pe fer koz okenn dele?

Epi Minis Vidot in koz lo *health and safety officer* dan menm laliny ki Onorab Hoareau in demann son kestyon.

Se tou bann etablisman touristik ki pe resewar kliyan pou le moman, eski tou le Minister respektif i kapab fer li mandatwar, menm si ou'n koz lo bann *focal person* ki nou annan *en health and safety officer* dan sa bann letablisman touristik? Mersi.

MR SPEAKER

Mersi Onorab. Minis

MINISTER PEGGY VIDOT

Mersi Mr Speaker. Mersi Onorab. Onorab *contact tracing* pe kontinyelman ganny fer. Nou'n kapab kontakte en bon pe, me parey ou konnen de ki ou'n ganny en dimoun ou

bezwen pran tou son kontak, tou son ale vyen pandan sa bann peryod.

E alor i ankor pe kontinyen. Me pour la gran mazorite in fini ganny fer, me ankor ozordi i ankor pe kontinyen.

An term si nou pou kapab fer li mandatwar pou annan en *health and safety officer*, sa i en kestyon parey in ganny dir Onorab boner i dir annan en etablisman ki annan kekfwazis en anplwayer, me i pa kapab fer li mandatwar ki i annan en *health and safety*.

Sa ki nou'n fer se fer sir ki sak sa bann etablisman i annan en pwen fokal ki pe fer sa louvraz, fer sir, konn bann Protokol, fer sir ki bann Protokol i an plas. E an menm tan annan travay pre avek *Public Health Authority*.

Parey anba *Employment Act* i donn ou lo kantite travayer after which ou bezwen annan en *health and safety*. E pou bann etablisman ki annan plis ki sa 50 travayer. La zot bezwen, akoz *Employment Act* i demande e nou, nou konnen poudir zot annan sa alor nou fer sir ki i annan sa *health and safety officer*.

MR SPEAKER

Mersi. Onorab Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour Minis, bonzour delegasyon, Bonzour tou Manm Onorab, tou Manm piblik.

Minis, Minis pou Lasante. An vi ki mazorite bann ka COVID-19 i pe ariv dan bann letablisman touristik. Eski Minis avek petet Dr Gedeon zot santi, zot krwar ki bann mezir ki egzize an se moman dan letablisman touristik i adekwa?

An vi ki i annan melanz petet ant touris avek Seselwa. Eski dan sa bann prosedir i annan pou fer avek la kantite dimoun ki dan en landrwa, menm landrwa alafwa?

E finalman pou Minis Tourizm, eski Minis i kapab dir nou si tou bann Letablisman Touristik in pas atraver sa prosedir mandatwar pou sertifye zot konmkwa zot kapab dil avek bann sityasyon COVID? E eski i annan bann *monitoring* ki ganny fer osi? Mersi bokou.

MR SPEAKER

Mersi Onorab. Minis Lasante premye.

MINISTER PEGGY VIDOT

Mersi Mr Speaker. Mersi Onorab. Eski si nou annan mezir ki sifizan pou nou fer sir

ki dan bann letablisman touristik nou pe kapab fer sa swivi pou anpes *COVID-19* si in ganny en dimoun *spread?*

Mon panse ziska prezan pou tou bann ka ki nou'n gannyen, nou'n kapab fer tou sa ki neseser pou nou anpes transmision pase *from* sa viziter pour avek popilasyon Seselwa.

So, pour sa i bann, nou vvar ki bann etablisman pe servi la mazorite bann SOPs ki zot annan an plas. Pour fer sir ki sa dimoun ki gannyen i ganny kontenir. E de ki nou konnen, nou pran tou mezir neseser pou fer sir ki i ganny, sa dimoun ki'n teste pozitiv i ganny met dan karantenn e contact tracing i ganny fer, pou fer sir ki bann ki posib kapab at risk li osi i ganny izole.

So lo sa pwen an vi ki i pa, menm si nou'n ganny viziter ki'n ganny teste pozitiv, nou'n napa sa *spread* dan kominate. Alor nou krwar ki sa bann mezir ziska prezan pe marse. Me sa i pa vedir ki nou bezwen aret la.

Nou bezwen tou kou pe regarde, evalye e regarde ki sa ki nou kapab fer pli byen. Akoz i, nou santi nou bezwen fer sir ki nou popilasyon i ganny proteze.

Alor nou kapab dir ziska prezan i napa sa *chain of*

transmission dan popilasyon. Alor pou sa rezon nou panse nou bann mezir in adekwa.

MR SPEAKER

Mersi Minis. Minis Touris.

MINISTER SYLVESTRE RADEGONDE

Mersi Mr Speaker. An repons kestyon Manm Onorab. Wi mon oule konfirmen ki tou prosedir in ganny swiv pour sertifye sa bann lotel.

Nou annan environ dernyen sif ki mon'n gannyen nou annan 100ekek, pardon, 700ekek etablisman touristik. E ladan i annan 450 ki'n *apply* e ki'n ganny *vet basically*, e *approve*, pour resevwar touris, bann lezot *obviously* zot pa annan drwa.

Donk vwala i annan bann kriter strik ki zot bezwen swiv, i annan protokol ki ganny aprouve. *Monitoring* wi, parey mon'n dir o konmansman i en travay ki nou fer konzwentman avek Minister Lasante.

Wi nou annan en kontrent mendev dan Departman Touris konmela nou annan zis 12 dimoun. Pou kapab konpran *challenge* ki annan pou kouver 400 ekek etablisman. I pa fasil, me nou pe seye, ofet mon'n diskite avek PS nesesite pou nou fer li.

You know regarde kwa ki nou kapab fer, si nou kapab regard dimoun ki dan lezot seksyon pou met ladan pou nou fer sa travay. Mersi Onorab.

MR SPEAKER

Mersi Minis. Onorab Wavel Woodcock.

HON WAVEL WOODCOCK

Mersi Mr Speaker. Minis i kler ki kestyion ki *Leader Lopozisyon* in anmennen ozordi in ganny *preempt* par en lensidan. En *video* ki ti pe sirkile in ganny rikorde plizyer semenn pase.

Kot en santer, mon a mansyonn son non; Ras Ricky. Apre ki zon *show* ti'n fini ti pe sant en sanson Pil lo Li, dan en letablisman ki dan lepase in annan plizyer bann aktivite Lopozisyon ki'n ganny fer ladan ki nou prezimen sa landrwa.

En kestyion eski sa kestyion pa pe ganny *preempt* akoz en sanson politik in ganny zwe sa letablisman *Le Duc De Praslin*, ki son propriyeter ki en siporter Lopozisyon pe ganny targete.

Eski sa pa en viktimizasyon ki pe ganny deroule la? E eski ziska preznan tou bann etablisman touristik Praslin i *compliant* avek sa bann nouveau SOPs e sa lensidan dan

sa letablisman touristik ti en *isolated incident?* Mersi bokou.

MR SPEAKER

Mersi Onorab. Minis Vidot.

MINISTER PEGGY VIDOT

Mersi Mr Speaker. Mersi Onorab. Pou kestyion, eski tou bann etablisman ki dan Praslin i pe swiv bann protokol. Nou panse poudir ki avek *monitoring* ki pe ganny fer ziska preznan, wi nou kapab dir poudir bann protokol pe ganny swiv.

E sa letablisman kot ou pe dir ti annan sa aktivite mon konpran ki an se moman zot, zot pa pe pran touris.

E parey ou'n dir aktivite ti'n fer en pe letan pase, me zot napa touris ki pe reste laba. Mersi Mr Speaker.

MR SPEAKER

Mersi. Onorab Chantal Ghislain.

HON CHANTAL GHISLAIN

Mersi Mr Speaker. Mr Speaker zis avan mon demann mon kestyion, en pti leklersisman lo repons Minis.

Eski i pe dir nou poudir dan sa letablisman kot sa aktivite ti ganny fer, i 2 diferan landrwa avek kot sa ka COVID i ete?

MINISTER PEGGY VIDOT

Wi, Mersi Mr Speaker. Mersi Onorab. Wi i 2 diferan. I en etablisman kot nou dir i annan en *video*, i pa letablisman kot sa touris ki'n teste pozitiv i ete.

MR SPEAKER

Mersi. Wi, Onorab.

HON CHANTAL GHISLAIN

Ok, Mersi Minis. Mon ti krwar sa i dan menm lotel mwan.

MR SPEAKER

Kontinyen avek ou kestyon Onorab.

HON CHANTAL GHISLAIN

Mersi Mr Speaker. Minis an vi ki sa novo ka *COVID* i lo Praslin, eski Minis i kapab donn nou detay an se ki konsern kan ki sa dimoun ti ariv Sesel e kan ki i ti ariv Praslin?

Ki mod transportasyon in servi, pou li ariv lo Praslin? Si in servi *Cat Cocos* ouswa avyon? E lefet ki viziter ki al Praslin, zot osi al La Digue sirtou pou bann *day trips*. Eski Minis o kour zot programm pou *contact tracing*, Eski zot in sey idantife si sa dimoun in osi al La Digue? Mersi.

MR SPEAKER

Mersi Onorab. Minis Vidot.

MINISTER PEGGY VIDOT

Wi, Mersi Mr Speaker. Mersi Onorab. Onorab sa dimoun ki'n teste pozitiv ti ariv Sesel le 5 Novanm, i ti pran avyon i ti al Praslin le 7 Novanm.

Sa premye ka ti ariv parey mon dir le 5, sa 2 lezot ka ti ariv le 7. E zot in pran avyon pou zot al Praslin, zot in pran taksi e taksi ki nou'n ganny, in osi ganny fer *contact tracing*.

Nou realize poudir zot pa'n ale dan bann kestyon ki nou'n fer, zot pa'n ale La Digue. Alor a tou bann landrwa kot zot in pase nou'n fer *contact tracing* e nou pe fer bann aksyon neseser pou fer sir ki napa *spread*. Mersi.

MR SPEAKER

Mersi Minis. Onorab Loizeau.

HON NORBERT LOIZEAU

Mersi Mr Speaker. Bonzour tou le 2 Minis ek zot delegasyon. Mr Speaker zis pour lenformasyon Minis avan mon demann mon kestyon. I osi annan en *video* kot ansyen Vis-Prezidan Meriton, ki Prezidan parti US ti pe fer La Digue ansanm avek Onorab Rocky. Parmi en trale pti zanfan, ti napa okenn prevansyon medikal ki ti pe ganny pran. Mersi Mr Speaker.

(Interruption)

HON NORBERT LOIZEAU

Aprezan mon kestyon. Minis vi ki,

(Interruption)

MR SPEAKER

Kestyon silvouplet Onorab.

HON NORBERT LOIZEAU

Minis vi ki tou sa bann ka COVID, se bann etranze viziter ki'n ganny detekte, se bann etranze. Alors i annan sa Polisi kot tou etranze zot ler zot vini zot al dan en letablismen touristik, apre 5 zour zot fer bann tes apre zot vakans i kontinyen.

E osi i annan bann Seselwa ki annan paspor etranze, zot osi zot ganny trete parey, 5 zour dan en letablismen touristik apre zot vakans i kontinyen.

Me parkont i annan bann Seselwa ki pe reste aletranze ki napa paspor etranze, zot ler zot vini zot ganny demande pou al fer 14zour karantenn. Kot i kout environ, mon panse environ R18mil pou peye.

Kan zot osi zot annan landrwa kot zot, ki zot ti kapab al karantenn pou sa detrwa zour, parey sa bann Seselwa ki

annan paspor ek bann etranze i fer.

E sa i pe anmenn bokou mekontantman parmi zot. Eski Minis zot annan plan pou revwar sa Polisi? Akoz i annan en pti pe lenzistis ladan mon panse. Apre Minis dezyenmman peyman pou karantenn pe fer *upfront* ler sa viziter i vini, zot antre apre letan zot sorti zot peye.

I annan en rimer deor en fe. Ki pa dan ou letan ki ou'n Minis, pandan letan parti sortan ti la administrasyon Mr Faure, ki bokou bann dimoun ki'n antre karantenn bann letan avan eleksyon, zot pa'n peye. Eski i annan en swivi lo la pou vvar ki pe arive? Mersi.

MR SPEAKER

Mersi Onorab. Minis.

MINISTER PEGGY VIDOT

Wi, Mersi Mr Speaker. Mersi Onorab. Ou'n dir pozisyon ki regilasyon, lekel ki al dan karantenn, lekel ki al karantenn 5zour, lekel ki al karantenn 14zour?

I vre sa ki ou'n dir, touris i fer 5 zour karantenn, apre sa 5 zour zot annan en swivi kantmenm ase kontrole, pou fer sir ser ten keksoz ki zot annan drwa fer ser ten keksoz ki zot napa drwa fer. Landrwa kot zot

kapab ale ek landrwa kot zot pa kapab ale.

Tandis ki Seselwa i al dan karantenn pou 14zour dan en fasilite, mon etablisman ki lasante piblik in deside. E in ganny vwar koman en lenzistis.

Rezon ki Lasante Piblik i santi ki zot bezwen fer sa se akoz sa dinamik sosyal. Akoz letan ki par egzanp ler Seselwa ti vini ti al dan karantenn pou 5zour apre zot ti sorti, ti annan en kantite melanz dan kominote, menm si zot ti sipoze pe fer keksoz parey kontrole pa al landrwa parey parti, parey lanterman, pa al fer gran vizit kot lezot dimoun. Zot ti vwar poudir sa ti kontinyelman ganny fer. E sa bann regilasyon ti pe ganny kase.

Pour sa rezon zot in revwar zot regilasyon e dan en fason pou pli evite annan transmisyon kominote dan kominote, zot in panse ki fodre anvi sa dinamik sosyal fodre ki tou Seselwa i al dan en fasilite pou 14zour.

Nou regrete ki sa i le ka, me si nou pe bezwen protez nou pei, protez nou pep i annan le desizyon ki pa neseserman ganny aksepte, *you know* ganny vwar par tou dimoun dan menm fason. Me si i en regilasyon ki ede pou anpes sa transmisyon, Lasante Piblik i

santi poudir ki zot bezwen enpoz sa.

Me an dizon sa nou pe swiv pandemi, nou pe swiv fason ki kantite dimoun ki antre ki kantite dimoun ki'n teste pozitiv, kote zot pe sorti.

E an mezir parey mon dir keksoz i evolye nou *response* pou osi evolye, pou fer sir ki nou pe fer keksoz ki pour pli kapab protez nou pei. Mersi.

MR SPEAKER

Onorab Loizeau ti annan en dezyenm kestyon lo, si ou kapab reponn li lo sirtou bann fre karantenn in ganny peye Minis?

MINISTER PEGGY VIDOT

Mersi. Mon eskize Mr Speaker nou'n oubliy sa. Wi, bann dimoun ki sipoze peye dan karantenn zot ganny *invoice* an se moman.

Me ou'n demann mwan si avan mon i vini i annan ka ki pa'n arive ganny *invoice*, pou le moman la mon pa pe kapab donn ou en respons, me nou ava kapab regarde e si i annan nou anba swiv avek en respons. Mersi.

MR SPEAKER

Mersi Minis. Onorab Waven William.

HON WAVEN WILLIAM

Mersi Mr Speaker. Bonzour Minis avek ou lekip. Mr Speaker mon i a kontan demann Minis par lefe ki tou sa bann ka COVID se i bann enporte.

Mon anvi demann avek zot ki bann zefor an plis, par lefe ki i enporte ki zot pe pran par lefe ki sa bann touris, kot zot sorti avan zot vin isi ki letan zot pe antre, eski zot satisfe avek bann mezir aktyel an egzistan?

E eski zot krwar poudir par lefe ki la Desanm liver deor dan serten pei i pou annan plis touris ki pou antre. Eski zot satisfe ek bann mezir aktyel ki an plas ouswa zot pe mazin fer an plis?

E dezyenmman Minis par lefe kiltir Seselwa, nou konnen poudir Seselwa i kontan son lanmizman. E par lefe ki sa bann ka i bann ka enporte, eski zot pe osi mazin, *well* dan en serten sans mon pa pe dir pini Seselwa pou li pa anmize, me ki bann gid an plis zot kapab donn *well* la popilasyon?

Akoz menm si ou pe dir zot pa anmize, i annan ki pou anmize. Me eski ou annan bann alternativ mezir ki en dimoun i kapab *apply*? E i annan bann sirveyans osi akoz par egzanp i annan bann dimoun ki pe dir i annan bann etablisman, akoz i

annan bann travayer menm pe dir ki zot pa pe sivre.

Me eski zot santi ki poudir dan lavenir zot bezwen *employ* bann lenspekter an adisyon? Akoz propriyeter petet pe mazin fer son larzan, me i pe negliz en pti pe lo kote sa laspe lasante. Mersi.

MR SPEAKER

Mersi. Onorab mon krwar i annan serten ou kestyon ki'n ganny demande deza. Minis ou kapab adres sa?

MINISTER PEGGY VIDOT

Mersi Mr Speaker. Mersi Onorab. Onorab si bann prosedir ki nou annan an plas pe ed nou pou fer sir ki bann dimoun, bann viziter ki ganny permet pou antre dan pei i sifilan, mon krwar ziska aprezan nou'n vvar poudir menm si bann ka i enporte, me lakantite dimoun ki pe vini lo lakantite ki pe teste pozitiv apre 5 zour. Nou realize poudir nou pe kantmenm kapab arive idantife tou bann ki kapab koz serten problem, letan zot vini avek transmisyon.

Dimoun i bezwen al lo nou website *Travisory* pou zot fer laplikasyon pou zot vini. E sa i donn nou bann lenformasyon ki donn nou en pti pe lenformasyon lo kote zot sorti ki

nou kapab verifye ki kalite *prévalence* maladi i annan bann landrwa kot zot pe sorti, kote zot in vwayaze.

So tousala i ed nou pou nou fer sa lanaliz. E si nou vwar poudir i en landrwa kot risk i tro o, nou kapab dir zot ki zot, zot pa voyaz isi. Nou annan bann mezir an plas par egzanp ler zot in arive bann landrwa kot zot kapab al reste, kalite transpor ki zot kapab pran.

E vreman nou regarde pou met, regilasyon pou dir zot ki sa ki zot kapab fer, ki sa ki zot pa kapab fer. Nou pe teste zot senkyenm zour apre ki zot in arive. Ziska preznan sa bann mezir pe montre nou poudir nou kapab kantmenm arive ganny zot avan ki zot konmans *spread* dan kominate.

Akoz oparavan par egzanp nou pa ti pe teste zot ziska ler zot ti pe ale. Alor si zot ti annan en risk ki zot ti'n devlope parey nou'n vwar enn de dimoun ki'n ganny teste pozitiv apre zot senkyenm zour nou realize poudir sa ti enportan pou nou fer li.

So, an mezir nou pe ale, nou pe evalye nou bann mezir. I pa zis akoz nou'n met an plas la ozordi ki semenn prosenn i pou parey. I annan bann evalyasyon ki nou fer baze lo bann lenformasyon ki nou

gannyen sorti kot nou bann partner aletranze. Parey WHO, parey CDC, nou pran tou sa konsiderasyon letan nou pe fer desizyon lo nou stratezi.

An term nou linterval festivite ki pe vini, nou realize poudir sa i nou kiltir e ki dimoun pou fete. Parey mon'n dir o konmansman, nou pou pe entansifye nou ledikasyon piblik. E nou pe osi dir dimoun ki mannyer si zot pou regroupe ki mannyer ki pli *safe* pou zot regroupe.

E nou osi konnen par egzanp poudir i annan diferan landrwa, diferan lorganizasyon ki'n deza pran kontak avek Lasante Piblik. E nou ankouraz zot pou fer sa, pou dir ki zot annan en aktivite ki zot pe *plan* e la nou kapab donn zot konsey si oule ki pli vize pou sa lorganizasyon pou sa group.

Ki mannyer zot kapab selebre. Me selebre toultan dan en fason ki a gard zot *safe*. Alor a sa nou envit dimoun pou kontinyen fer sa. Mersi.

MR SPEAKER

Mersi Minis. Onorab Audrey Vidot.

HON AUDREY VIDOT

Mersi Mr Speaker. Mr Speaker mon kestyon pou Minis. Minis Prezidan Larepiblik in dir ki i

nepli ler pou nou mazin zis lanmizman, me pour nou pran nou lavi e lavenir nou pep o serye.

Alors baze lo sa ki ou'n dir. Eski Minis Lasante pe dir nou ki i pou aplik menm, mezir avek bann departman gouvernmantal, pou montre legzanp ki pa pou ganny, personn pa pou ganny soutire?

E eski pou annan la transparans pou piblik vwar ki vreman Lalwa pe ganny aplike, e ki Gouvernman dizour i senser dan son mesaz, pou dekouraz Seselwa pou pa groupe e fer parti? Mersi.

MR SPEAKER

Mersi. Onorab. Minis?

MINISTER PEGGY VIDOT

Mersi Mr Speaker. Mersi Onorab. Sa ki nou kapab dir ki Lalwa Regilasyon ki i annan an plas i aplikab dan pei an antye. Nou pa pe ankouraz dimoun pou kas okenn Lalwa. Me selman si ou'n dir an vi ki nou konsyan nou kiltir ki dimoun in kontan anmize dan bann linterval. Nou pe demann dimoun pou pli konsyan bann regilasyon ki nou annan an plas.

E kot nou kapab ede pou donn zot konsey si zot annan en

pti aktivite ki fason ki zot kapab ganny fer?

Ki i en organizasyon gouvernmantal or non-gouvernmantal i pour menm kalite konsey ki nou pou donn zot. Alor sa nou kapab asir ou Onorab poudir nou regilasyon i aplikab pour tou lenstitisyon.

MR SPEAKER

Mersi Minis. Onorab Sandy Arissol.

HON SANDY ARISSOL

Mersi Mr Speaker. Bonzour le 2 Minis, bonzour tou bann Manm ek delegasyon. Mr Speaker mon ti a kontan demann Minis Lasante.

Eski dan zot remaniman, dan zot plan zot annan lentansyon pou rewvar ler ki laboutik i ouver e frenmen? Konpare avek bann lezot biznes ki zot, zot in reouver e zot ouver ziska ler zot anvi. Me bann magazen zot annan zot *license*, zot annan zot lokasyon e zot annan zot *loan* pou zot peye parey tou lezot biznes. Sa i mon premye kestyon.

Mon dezyenm kestyon, mon ti a kontan demann Minis, konbyen eski Beau Vallon Bay in kout Gouvernman? Akoz nou'n aprann menm ki napa

kliyan Beau Vallon Bay zot still pey Gouvernman.

So konbyen in kout Gouvernman pou nou servi Beau Vallon Bay koman en sant? E eski in annan en kontra ki la ant Minister Lasante, Gouvernman avek Beau Vallon Bay ki en sant pou karantenn? Mersi bokou Mr Speaker.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab pou ou kestyon. Mon konpran ki kestyon keler laboutik i ouver i ganny pran par *Licensing*, me an konsiltasyon avek servis Lasante Piblik.

E sa i ganny, pe ganny revwar a *chaque instant*. Baze parey nou dir, lo diferan keksoz ki annan dan kominote. Me i toultan an revi. E kan risk ki i annan dan pei i ava en serten nivo, alor desizyon i a ganny pran en fason ou en lot.

Lo kote si nou annan en kontra avek Berjaya Beau Vallon Bay. Nou annan en kontra ki pou fini lafen dimwan Novanm. E ki kantite ki nou pe peye, nou pe pey pou tou lasanm ki zot annan.

E nou kou par lasanm se R835 par lasanm, an plis nou pey pou *utilities*, nou pey pou WiFi, ki fer ki par mwan zis pou *utilities* avek pou lasanm i ariv nou R854, 957 par mwan pou *utilities*, WiFi an plis lo sa 835 ki nou peye par lasanm. Alor depi ki nou'n sanz, zot ti 500 avan. Depi Zilyet ziska Novanm nou pe pran 177 lasanm avek Berjaya. I ariv nou en kou R4, 433, 850milyon par mwan.

MR SPEAKER

Mersi Minis. Nou a pas lo lot kestyon. Onorab Richard Labrosse.

HON RICHARD LABROSSE

Bonzour Minis, bonzour tou dimoun ki a lekout. Bonzour bann koleg. Minis i fer apepre, 1an la apepre ki depi ler sa viris li menm in ganny dekouver dan lemonn partou.

E ler nou pe get lo konteks lokal Sesel, nou santi ki ou a krwar nou pe ganny, in vin en pinisyon lo tou bann Seselwa ordinerman. Rezon ki mon pe al poz ou sa kestyon, i se ki ler nou pe gete transmisyon atraver Seselwa avek Seselwa, nou pa'n zanmen, mon krwar pa si zot in ganny sa *so far*.

So kestyon ki bokou dimoun pe demande, so akoz

nou pe ganny sa ta restriksyon lo nou Seselwa ordinerman, ki nou pe ganny demande osi pou met mas?

Apre osi ler mon'n ekout ou lo sa zafer laboutik frenmen 8er, mon pa tro satisfe. Akoz dan laboutik nou bezwen realize pa vann zis lalkol. I annan bann lezot komodite osi ki bann fanmir Seselwa i servi. So mon pe gete kan ki zot pou kapab revwar, regard ankor en pti pe pli pros dan sa? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker, mersi Onorab. Bon, akoz nou annan sa bann kantite restriksyon anvi ki nou napa transmisyon dan kominote. Sa kekfwa ki mon ti a kapab reponn sa ase senp, kekfwa si pa ti sa bann restriksyon nou ti pou annan bokou plis transmisyon dan kominote. Alor akoz nou pe, nou'n met sa bann restriksyon an plas, i fer ki transmisyon pa'n sape pou al dan kominote, akoz nou'n annan ka isi.

Akoz nou bezwen met mas, akoz tou Konsey Syantifik ki i annan, i montre poudir mask i protez dimoun, i anpese maladi ganny *spread*.

Alor pou nou lefe ki sa i en fe ki *proven*, nou bezwen met li an viger, met li an mars isi. Alor pou, dan konteks Lasante Piblik, nou pa esper en keksoz arive apre ki nou pran, nou vin avek regilasyon prevantif.

Nou rol se anpes arive. E pou sa rezon nou panse ki bann restriksyon in anpes sa transmisyon dan kominote. Lo baz laboutik, parey mon pe dir, i annan diferan keksoz ki'n ganny pran an konsiderasyon.

E anvi ki stratezi in ganny met an plas, i pa savedir i la toulstan. I annan diferan keksoz ki pe fer ki pe reevalye. Nou pe reevalye nou plan ki nou'n met an mars pou sa pandemik, depi ki in komanse.

E mon panse ki avek lentelizans ki nou annan konmela, avek lafason ki pandemik pe evolye, avek lentrodiksyon nouveau mezir parey vaksen. I pou annan sanzman dan nou stratezi. Alor i pa en keksoz ki la, ki la pou toulstan. An mezir ki nou war le neseser i ava ganny adrese.

MR SPEAKER

Mersi Minis. Onorab Georges Romain.

HON GEORGES ROMAIN

Mersi Mr Speaker. Mr Speaker mon 2 kestyion ki mon

ti anvi demann Minis, in fini ganny demande. Me selman mon annan en pti kestyon pou Minis. Mon annan en sityasyon en atlet i pe pey tou son keksoz lo li menm, son tiket avyon, son akomodasyon deor. I pe demann mwan en kestyon, si i arrive ler i ale, byensir i pe fer tou son *PCR*, tou son bann tes ki i sipoze pe fer.

Ler i e retournen i pe mazin lo kote karantenn. Si i annan en possibilite ki i kapab ganny *waive*, oubyen si ou annan en *discount* ki kapab byensir benefisyé li? Akoz i pe kout li bokou. Akoz byensir i pe al reprezent Sesel dapre li ler i pe ale deor. Mersi Mr Speaker.

MR SPEAKER

Mersi. Minis.

MINISTER PEGGY VIDOT

Mersi Mr Speaker, mersi Onorab. I annan diferan kategori ki, e ganny konsidere kan i demann dimoun pou pey son karantenn. E si i tonm dan sa bann kategori ki in mete, definitivman i ava ganny son, swa i ava ganny *waive*, swa i a ava ganny redwir. Mersi.

MR SPEAKER

Mersi. Mersi Minis. Onorab Rosie Bistoquet.

HON ROSIE BISTOQUET

Mersi Mr Speaker. Mersi Minis ek tou bann dimoun ki'n akonpanny zot. Mersi bann, bonzour tou bann Onorab, bonzour tou dimoun dan lakour.

Mwan mon pou dir pandan sa letan *COVID-19*, koman en profesyonnel lasante, mon'n ganny sans pou mwan partisipe volonterman, sirtou dan bann devlopman *SOPs* pou bann diferan lorganizasyon. E mon tim ti devlop plis bann *SOPs* pou bann letablisman, sirtou kot i konsern *land and sea transportation*, apre en pe ek touris.

E mon ti remarke pandan sa letan ki malgre Minister Lasante i fer son mye, mon santi poudir, pou nou reste lo sa standar, mon santi poudir zot bezwen plis pou zot kapab fer plis.

E mon pou demann Minis, eski Minis Lasante i kapab dir sa Lasable ki kalite e kantite mendev i bezwen, pou tou bann seksyon, lo sa repons Nasyonal pou *COVID* isi Sesel? Pou ki nou reste toultan lo sa nivo pli ptí gin ka enporte e san lanmor.

E an menm tan mon pou demann Minis, kan ki Sesel pou kapab, sirtou bann popilasyon Sesel pou kapab

ganny akse avek sa vaksen, en vaksen kont sa viris? Mersi.

MR SPEAKER

Mersi Onorab. Wi Minis.

MINISTER PEGGY VIDOT

Mersi Mr Speaker, mersi Onorab. Onorab mon pou napa sa lenformasyon lo ki kantite mendev nou bezwen, a sak enstan dan nou plan pou sa pandemi. Me sa lenformasyon mon kapab rode e anvwaye pou Lasanble. Mersi.

Apre, an term vaksen, parey ou konnen, diferan, la nou annan 3 resaman ki fek dir zot sorti, zot efikasite i par lao 90. Yer, avantyer nou fek antann ankor en lot vaksen ki'n sorti avek efikasite 90pourcen e ki son kou i bokou mwen ser ki lezot.

Alor nou pe regard tou sa. Mon panse dek ki i annan sifizaman lenformasyon lo globalman, e ki bann vaksen i ganny aprouve par bann diferan organizasyon parey *WHO, FDA* e tou. E ki pou *safe* pou nou aste bann vaksen pou fer vini, pou nou komans donn vaksen isi, nou ava fer sa.

Lendikasyon pe montre ki dan premye *quarter* 2021, bann vaksen pou'n ganny kategorize koman *safe*. E mon panse poudir nou osi nou pou esey

nou mye koman i *available* pou nou gannyen. Mersi.

MR SPEAKER

Mersi. Onorab Georges ou ti'n lev ou lanmen depi lontan. Me mon ti pe les ou pou dernyen. Me i annan lezot dimoun ki'n leve apre. Ou ti a kontan? *Ok* nou a kontinyen. Onorab Naddy Zialor.

HON NADDY ZIALOR

Mersi Mr Speaker. Bonzour tou dimoun. Mon kestyon i swivre larepons ki Minis in donnen konsernan kontra ek lotel, si ou permet mwan Mr Speaker.

I zis ki petet si Minis i kapab eklersi. Eski nou pe pey lotel baze lo *occupancy* ouswa nou pe pey lotel baze lo lasanm. E par lefe ki manm piblik pe ganny demande pou peye ler ki zot dan zot karantenn.

Petet si Minis i kapab eklersi nou. Eski i annan en bout dan sa peyman, ler nou pe pey lotel, ki Gouvernman i bezwen osi petet aziste dan sa bann peyman ki pe ganny fer?

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker, mersi Onorab. Onorab pou sa

dernyen bout ou kestyon. Eski sa pri i son vre *cost*? Non. Akoz i *subsidize* par Gouvernman dan sa pri ki nou mete pou dimoun peye.

Me anvi sa kontra ki nou ti annan avek Berjaya, i pa ti baze lo *occupancy*, i ti baze lo kantite lasanm ki zot ti'n met a nou dispozisyon, e sa sete 177.

Me sa ki mon kapab dir, ki nou pe regard tou posibilite pou nou kapab fer serten sanzman dan kote ki nou met dimoun pou karantenn. Revwar konbyen nou merit peye.

E toulstan annan antet ki nou bezwen redwir nou kou pou sa kalite facilite. Me i tro boner la pou mwan dir pou dir i pe ariv kan, kote ki nou pou fer. Me mon panse dan 1 semenn, nou pou kapab dir pou dir ki sanzman nou pe fer. Mersi.

MR SPEAKER

Onorab Zialor ou ti oule lo tou, oubyen.

HON NADDY ZIALOR

Non i ok. Minister in fini reponn. *Thank you.*

MR SPEAKER

Mersi. Onorab Esparon.

HON REGINA ESPARON

Mersi Mr Speaker. Mr Speaker mon pa pou demann

sa kestyon, parske Minis i dir i en pe tro boner pou zot, pou li kapab dir nou kote zot pe mazin *relocate* sa karantenn. Mon kestyon ti baze lo ki zot pe panse pou *relocate* sa? Epi si zot pou demann en *review* lo sa kontra ki deza la, pou aziste pou regarde konmsi ki mannyer i kapab fer li en pe pli bon marse? Mersi.

MR SPEAKER

Mersi. Minis.

MINISTER PEGGY VIDOT

Mersi Mr Speaker, mersi Onorab. Definitivman nou pe pran, nou pe fer sir ki nou antre dan negosyasyon ki pou donn nou en meyer pri.

E ki facilite i a pli konvenab e tou keksoz, o tour sa karantenn i ava pli akzeptab pou nou popilasyon. Sa nou kapab asire. Mersi.

MR SPEAKER

Mersi. Les mon a sinal zot. Nou annan en lot delegasyon Minis ki pe atann. E nou'n fer zot atann pou en bon pe letan. Mon pou pran bann dimoun ki deza lo lalis e apre nou a termin sa sesyon. Onorab Andy Labonte.

HON ANDY LABONTE

Bonzour Mr Speaker. Bonzour Minis avek ou delegasyon. Bon, annefe kestyon in tonbe. Me selman en pti keksoz a la lezer, mon ti oule zis konnen konsernan re negosyasyon sa kontra avek Beau Vallon Bay. Be vi ki in fini demande.

So zis mon pou a la lezer pou mwan gete, in regards to mas, parey ou pe dir poudir mas i sipoze obligatwar. E mon krwar i aplik pou tou, menm pou nou Manm Lasanble.

Parey ou kapab war poudir nou tou lo sa kote latab nou'n met mas, avek respe pou Minis ek ou delegasyon. Alor mon krwar nou tou nou ti ava kontinyen lo sa menm laliny. Mersi Minis.

(Interruption)

MR SPEAKER

Mersi. Eski, trankil, ale silvouple, ekoute. Onorab Labonte mon konpran, napa vreman kestyon ki ou'n poze. Alor nou a *move on*. Onorab Clifford Andre.

HON CLIFFORD ANDRE

Mersi Mr Speaker. Mr Speaker parey ou vvar, mon'n zis fek lev mon lanmen. Akoz en kestyon in antre, i kapab pa vreman relye avek sityasyon ki

nou pe dil avek, selman i annan pou fer avek COVID-19. Si ou permet mwan Mr Speaker mon ava demann sa kestyon.

MR SPEAKER

Demande, be Minister i ava deservi ...

HON CLIFFORD ANDRE

Vi ki Minis Lasante i la.

MR SPEAKER

.....donn ou en pti larepons.

HON CLIFFORD ANDRE

Mon'n ganny demande ki i annan dimoun ki ti pe al tretman medikal. E ki zot pa pe, la pou le moman zot pa ankor ganny lenformasyon.

E kestyon, se ki kan ki Minister pe konsidere, an vi ki i annan sityasyon COVID-19 dan pei e dan lezot isi e dan lezot pei. Kan ki Minister pe konsidere pou anvoy sa bann dimoun zot bann tretman ki spesyalize, ki aletranze? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Parey zot konnen, i annan landrwa kot Minister Lasante i annan en Lagreman

avek pei, par egzanp *Sri Lanka*, parey *India*.

Kot nou anvoy, nou parey *Reunion* kot nou anvoy pasyan. An se moman tou sa bann landrwa zot pa pe aksepte dimoun antre. E pou sa rezon nou pa pe kapab anvoy zot dan sa bann landrwa.

Me selman nou realize poudir i annan serten ka ki i bezwen ale ase vit. Alor nou'n antre an kolaborasyon avek en lot pei, nou pe sey detrwa lopital dan *Dubai* prensipalman.

E zot in, e nou bezwen, nou pa kapab anvoy lakantite parey nou ti pe anvoye *Sri Lanka* ou si non dan Lenn. Nou bezwen anvoy zot bann *case*, zot dir nou lekel ki zot kapab pran, kan.

Be solman zot pa kapab pran kantite parey nou ti pe anvoye. Alor pou sa rezon ki nou pa pe kapab anvoy tou dimoun trete parey nou ti a kontan.

Me nou ankor an diskisyon avek *Sri Lanka*, prezan ki zot pe ouver. Zot annan en *taskforce* ki pran desizyon lo lekel ki annan drwa antre, lekel ki napa drwa antre.

Sa ki nou kapab asire, dek ki sa bann landrwa i ouver nou pou anvoy, kontinyen anvoy nou bann dimoun pou trete bann ki bezwen al aletranze.

Me nou pe kontinyen menm, kantmenm avek *Dubai*.

Ler zot dir nou anvoy 2 nou anvoy 2. Tandis ki ler nou ti pe anvoy *Sri Lanka* nou kapab anvoy sepa 15 an menm tan. Me nou bezwen esper zot dir nou ki kalite *case* e kan, pou nou kapab anvoye. Mersi Mr Speaker.

MR SPEAKER

Mersi. Onorab Georges nou ava ariv lo kestyon. Apre mon a permet Onorab Pillay en dezyenm kestyon pou terminen. Onorab Georges.

HON BERNARD GEORGES

Mersi Mr Speaker. Mr Speaker mon kestyon i pou Minis Lasante. E i relye en pti pe avek kestyon ki Onorab Loizeau in demande pli boner.

Me mon ti a kontan fer en presizyon lo la, lo si Minis i santi ki in deza reponn sa kestyon, mon ava demann li leskiz avan mwan demande. Mon kestyon i an 2 parti. E i annan pou fer Minis avek bann letablisman ek bann paspor.

Si mon konpran byen, i annan serten letablisman ki kapab pran touris ki sorti dan 2 kategori pei kot risk i diferan. Eski i annan protokol an plas pou asire ki sa 2 kategori viziter ki dan sa sel, dan sa menm

letablisman i pa ganny konfonn enn avek lot. E ki donk sa pa anmenn en problem pou sa letablisman ek pou bann rezidan dan sa letablisman, ki kekfwa i sorti lo en risk pli ba?

Dezyenm kestyon, se en Seselwa ki annan en paspor etranze, ki antre Sesel lo son paspor etranze, e ki donk fer zis 5 zour olye 14 zour parey bann dimoun ki napa en dezyenm paspor.

E la mon krwar kestyon Onorab Loizeau i kestyon ki bokou dimoun deor pe poze, se akoz ki en dimoun i kapab ganny en lavantaz, zis akoz i annan en diferan paspor ler i sanmenm sa dimoun ki pe antre.

Eski sa pa koz en serten fristrasyon e en serten dezekilib dan lafason ki nou tret dimoun? Mersi Minis.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab pou ou kestyon. Wi nou annan 80 etablisman ki annan, ki pran dimoun, viziter dan kategori 2. E nou annan etablisman ki pran kategori 1 e kategori 2. I annan protokol ki an plas pou anpes egzakteman sa ki ou pe dir.

Sa *mixing* e fer donn bann ki sorti dan en landrwa kot risk i pli pti gin donn zot, e *increase* zot risk ganny. Sa ki nou kapab dir se protokol i an plas.

Nou kapab fer sir ki, eseye fer sir par *monitoring* ki napa sa *mixing* ki sa protokol pa pe ganny kase. Me parey nou koleg in, mon koleg Minis Tourizm in dir. I pa toulstan fasil pou fer sa *monitoring*. Pou sa rezon sa i anba *review*. Lo kote Seselwa ki annan en lot paspor etranze ki al dan karantenn zis pou 5 zour, *versus* Seselwa ki annan zis en paspor Seselwa, ki al dan karantenn pou 14 zour.

Mon konpran poudir sa in sanze. Tou Seselwa, menm si ou annan en paspor etranze, menm si ou annan, ou annan zis en paspor Seselwa.

Akoz sa *social dynamics* ki nou'n realize poudir i *increase risk*, tou sa dimoun, tou Seselwa i bezwen al dan en fasilite pou 14 zour.

MR SPEAKER

Mersi Minis. Onorab Pillay.

HON SEBASTIEN PILLAY

Mersi Mr Speaker. Mr Speaker sa kestyon in anmenn bann kestyon dan diferan, diferan *area*.

E mon kontan bann *MNA* ki'n swazir pou pran sa kestyon e demann, in demann bann leklersisman ki ed zot distrik. Mon en pti pe dezapwente avek Onorab Elekte pou Grand Anse Praslin, atraver ou Mr Speaker, ki li in prefere vin anmenn en zafer politik ladan.

MR SPEAKER

Ale les sa tonbe.

HON SEBASTIEN PILLAY

So, li si i oule kontinyen pile, kontinyen pile kontrerman ek sa ki son Prezidan in dir.

MR SPEAKER

Kestyon Onorab.

HON SEBASTIEN PILLAY

Kestyon ki mon pe demann Minis se ki prenon kont bann letablisman ki pe pran zot responsabilite pou zot reste anliny avek bann regilasyon akoz pou zot kapab kontinyen fer fonksyonnen. E ou annan bann ki pa pe neseserman swiv sa? Obligatwarman ler zot, zot pou vini prezan pou zot enpoz regilasyon, zot pou enpoz lo tou prezan.

E sa bann ki pe fer zot travay, zot keksoz byen, pou ganny afekte e zot pou perdi. So, ki Minister *Tourism* lo zot

kote zot pe fer pou *proactivement* siport travay ki Departman Lasante pe fer, zisteman pou asire ki tou bann letablisman kot zot in ganny en regilasyon, oubyen zot in ganny serten standar pou swiv.

Zot pe swiv sa standar pou swiv. Zot pe swiv sa standar. Akoz i annan sa bann letablisman dan tou distrik. Grand Anse Praslin i annan en kantite sa bann letablisman touristik. E mon krwar bann letablisman ti a kontan tande, poudir pa akoz enn pe kas Lalwa li i pou bezwen pey lepokase. So ki mannyer zot pe aranz sa?

Eden Island, Eden Island i annan touris ki vini ki antre Eden Island. Me ki aparaman apre i *end up* pe marse pe al dan restoran. Eski zot annan en *supervision* pou vwar si sa bann touris ki pe antre dan Eden Island pe reste dan sa bann *villa* kot zot in antre, oubyen zot pe sorti pou al dan bann lezot letablisman? So sa i enn.

Trwazyenm pwen *regarding* sa size festivite. Nou tou nou konnen ki pou arive pandan sa letan ki pe vini. *Either* pou annan plis dimoun, pou annan dimoun ki pou sey desann pou vin Sesel akoz liver dan zot pei e zot in ganny loportinite pou desann.

Ou pou annan Seselwa ki pou anvi fer son aktivite. Ou pou annan lezot letablisman ki pou *advertise* serten aktivite. So, eski ou Minister pe ganny sipor avek Gouvernman pou ki ou kapab asire ki perspektiv ki aletranze dimoun pe gannyen lo Sesel, se ki nou en pei ki pe mentenir en o standar kontrol.

Pou ki nou reste en landrwa kot dimoun i kapab vini baze lo bann regilasyon e bann norm enternasyonal ki ganny etabli? Mersi Mr Speaker.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker. Mersi Onorab pou ou kestyon. Mr Speaker sipor pou bann etablisman ki *compliant* si ou oule, sa i *obvious*.

E parey mon'n dir i annan plis ki 400 etablisman ki'n ganny kategorize, ki'n ganny *approval* pou aksepte touris. Mazorite ladan i *compliant*. Mon dir 99.99poursan i *compliant*.

Parey dan tou keksoz ou annan toultan sa pti eksepsyon. E se avek sa pti eksepsyon ki nou, nou travay lo la. Nou sa ki nou kontinyen dir,

se ki sa zafer *compliance or not* i pa zis lo bann letablisman.

I konsern nou tou, nou tou endividyleman, nou tou ki dan Lasanble, la. Nou ti ki dan sosyete partou, i nou responsabilite pou fer sir ki nou respekte bann regilasyon Lasante. I pou nou prop proteksyon, proteksyon nou pei, proteksyon viziter ki nou resevwar ensidswit.

So mon asir Onorab ki wi. Kot i annan ki *non-compliant* nou, nou travay avek. Mon si ou demann mwan mon lopinyon personnel, ou pa'n demann mwan, mon a dir ou kantmem.

Mwan mon krwar ki bann etablisman ki sa swa diskò ki sa swa restoran, ki sa swa lotel ki pa *compliant*, i annan serten degré ki ou kapab ale pou konseye, pou travay avek pou advise.

Me i devret arriv en letan kot ou dir, be la nou arete, dan lentere zeneral ou bezwen met ou lipye ater. Donn legzanp tou dimoun e ou *cancel license*. Sa mwan, be sa se petet mon disan gard, lapolis ki monte, pa Diplomat.

Donk vwala lo sa, ou premye kestyon. Lo dezyenm kestyon Eden Island, sa ki mon konnen se ki, wi. I annan regilasyon Eden Island parey ki

aplikab avek tou bann lezot etablisman ki'n ganny otorizasyon.

E *briefing* in ganny fer avek zot osi lontan ki mon konnen, mon konnen. Eden Island vi sityasyon sa zil, sa lotel, sa bann lakaz, apartman ki i annan, i en pti pe pli konplike pou *manage*. Me sa ki mon konnen se ki mesaz in ganny pase avek zot, mon krwar plizyer fwa. I neseser petet pou nou regard ankor ki mannyer nou kapab *reemphasize* sa bann keksoz ki nou'n fer. Me wi i annan en *challenge* avek sa zil, sa letablisman koman i ete.

An se ki konsern zimaz ki nou donnen Sesel, ki nou donnen Sesel aletranz, bann festivite ensidswit ki ou'n mansyonnen Onorab. Wi, nou oule kontinyen promot Sesel koman sa destinasyon, dan sa pagay ki pe arive partou. Ler ou regard Lerop ozordi koman sa *safe haven* kot dimoun i kapab, you know, ale, *shelter* si ou oule.

Donk i zimaz ki nou kontinyen prozekte. E nou pou kontinyen prozekte dan nou *marketing*. Ki Sesel i *safe*. I annan i dir *COVID free*, i annan i kestyonn zafer *COVID free*. Me ki, pardon, i *COVID safe*, vwala.

Mon krwar i plis *COVID safe*. E sa mesaz dan nou

marketing ki nou oule kontinyen met devan. Mersi Mr Speaker. Mersi Onorab.

MR SPEAKER

Mersi Minis. Mersi tou lede Minis e zot delegasyon. Nou'n arriv a lafen sa kestyon, sa sesyon kestyon. Wi Onorab.

HON SYLVANNE LEMIEL

Mersi Mr Speaker. Bonzour le de Minis avek zot delegasyon. Mr Speaker mon annan zis en pwen pou mwan leve, en leklersisman ki mon ti a kontan gannyen, an tan ki Minis *Tourism* i la avek nou.

E ki i osi Minis pou *Foreign Affairs*. E ki mon ti'n anvoy en *Question Without Notice*. Prezan mon pe regarde. Akoz nou, nou ti pe sey gete, an tan ki i la, si i ti petet i ti kapab reponn sa kestyon. Ki konsern Lanbasad Cuba an tan ki i annan bokou, bokou konsern ki'n leve par bann paran ki annan zot zanfan dan liniversite laba, e osi sa bann etidyan dan liniversite laba.

So i ti pou byen ki petet Minis ti pou vin donn nou en leklersisman. E mon vwar ki mon kestyon in ganny retire lo *Order Paper*.

Zis en pti lesplikasyon Mr Speaker. Mon ti a kontan konnen akoz e si i pou annan

posibilite pou mon remet mon kestyon devan Minis? Mersi.

MR SPEAKER

Byensir. Les mwan a adres ou kestyon. Mon krwar sa i konsern mwan. Ou kestyon pa'n ganny retire lo *Order Paper*, i pa ti ganny mete lo *Order Paper*.

Rezon akoz mon ti konsider li, pa en size irzan. E annefe mon'n demann Madam Clerk pou pas ou kestyon dan *pipeline* an regilye pou lezot kestyon e probableman i pou monte Mardi prosen.

Alor mon ti a zis demann ou pasyans. Nou pou bezwen plis letan Minis pou li reponn sa e nou a pran sa pli tar. Mersi. Wi mon ti pe envit Minis ek zot delegasyon pou fer zot depar. E mon a remersye zot bokou pou zot prezans.

**(MINISTER RADEGONDE,
MINISTER VIDOT AND THEIR
DELEGATION WERE
EXCUSED FROM THE HOUSE)**

MR SPEAKER

Mersi. Mon krwar mon pou oblize demann lopinyon 2 *Leaders*. Nou annan en lot Minis ek son delegasyon pe atann la. E mon ti a kontan ki nou pa'n gat son letan. Vi ki mannyer letan i arive, mwan

mon ti a propoze ki nou pran en *break* 10 minit, e nou repran e apre nou ale ziskan 1er.

Eski sa i konvenab, oubyen zot ti a prefere nou zis pran li la. Si nou pran li la nou ale, nou pou bezwen termin dan midi edmi koumsa e i pa pou donn nou bokou letan. *Chief Whip* i plifere, wi adres sa.

HON SANDY ARISSOL

Mr Speaker mon pran ou lentansyon ki nob. Me selman an menm tan nou bezwen pran kont. Parske dan bann letan ki nou ganny *break*, sa ki nou apel *break*. I annan bann Komite ki zwenn. E ozordi mon'n aprann i annan plizyer Komite ki pe zwenn dan sa bann letan ki ou pe propoze ki nou asize. Ki i en pe difisil pou bann lezot Manm ki'n fini kekfwa planifye zot sa.

Be selman, la anvi ki 11er, i midi mwen zen kar, 11er 45, mon mazinen nou kapab trenn ankor en pti gin kantmenm pa tro bokou letan, pou sa letan perdi ki nou'n pran boner.

Be nou kapab trenn ankor en pti gin mon mazinen ziska la, be selman pa tro. An mazinen bann Komite kekfwa ki annan pou zwenn. Epi nou menm nou ABC nou pe zwenn ankor. Sa i en propozisyon. Mersi.

MR SPEAKER

Wi, wi. Be nou ava apel lot Minis, e nou a plan pou nou terminen ver 12.30. Nou ava apel Minis silvouple. Wi Onorab Esparon.

HON REGINA ESPARON

Mersi Mr Speaker. Petet si nou kapab termin dan 12.25, parski Komite Madanm pe zwenn 12.30. Mersi.

MR SPEAKER

12.30?

HON REGINA ESPARON

12.30 Komite Madanm pe zwenn.

MR SPEAKER

Me mon krwar zot pou bezwen depese apre pou al zot miting.

HON REGINA ESPARON

Wi. Mersi Mr Speaker.

MR SPEAKER

Mersi. Byenveni Minis Gouvernman Lokal e Devlopman Kominoter Mrs Rose-Marie Hoareau. E dezole ki nou'n fer zot atann sitan lontan.

E avek Minis dan son delegasyon i annan Mrs Marie-Celine Jeannevol, Sekreter Prensipal Mr Daniel Frichot, Konseye Spesyal e Mr Daniel

Adeline, Direkter Zeneral pou Plan Proze e *Maintenance*. Kestyon pou Minis i premye kestyon, i sorti kot Onorab Sylvanne Lemiel. Onorab.

HON SYLVANNE LEMIEL

Mersi Mr Speaker. Bonzour Minis avek ou delegasyon. mon kestyon i al koumsa, swivan bann seri vizit ki bann MNAs in fer kot bann Ladministrasyon Distrik e osi bann seri *meetings* ki Gouvernman Lokal osi pe fer pou vwar si i annan bann biro vid dan tou bann Ladministrasyon Distrik pou donn bann Manm Elekte en lofis, eski Minis pou Gouvernman Lokal e Devlopman Kominoter i kapab donn sa Lasanble; enn en kontrandi lo sityasyon aktyel dan tou bann Ladministrasyon Distrik?

Dezyenm kwa ki pou ganny fer dan bann Ladministrasyon Distrik kot ki napa lofis pou donn bann MNA?

Trwazyenm ki garanti ou pe donn bann Administrater Distrik ki sa biro ki zot pe okipe avek zot staff pa pou ganny pran pou donn bann Manm Elekte? Mersi.

MR SPEAKER

Mersi Onorab. Minis ou a pran laparol.

MINISTER ROSE-MARIE HOAREAU

Mersi Onorab pou ou kestyon. Mersi Mr Speaker. Bonzour Mr Speaker, bonzour bann *MNAs* e tou bann dimoun ki pe ekoute. Mr Speaker swivan mon lapwentman, mon'n vwar lo konman mon priyrite pou premyerman rankontre bann manm *management* lo novo Minister e bann *DAs*.

Mon'n fini rankontre bann *DAs* lo Mahé, i reste pou mwan rankontre bann *DAs* lo Praslin ek La Digue. Sa pou ganny fer tre byento.

Mon'n osi pe klarifye pou mwan konmans vizit bann *building Ladministrasyon Distrik* osi byen ki bann facilite ki tonm anba responsabilite Ladministrasyon Distrik tel ki bann Sant Kominoter e bann *daycare centres*.

Sa i a permet mon vwar kondisyon sa bann lenfrastriktir distrik, e pou mwan osi vwar bann lofis ki pou ganny met a dispozisyon bann *MNAs*.

Mon okouran ki lamazorite bann *MNAs* in deza an kontak avek swa zot swa bann zofisyne dan sekretarya mon Minister, oubyen i annan osi ki'n ganny kontak direk avek zot bann *DAs*.

I annan distrik kot sa *MNA* e sa *DA* in fini tonm dakor lo la e tou keksoz i annord. Parkont pou akseler sa prosesis semenn pase 2 zofisyne sorti sekretarya dan mon Minister ti vizit serten sa bann biro. E lezot facilite dan *building Ladministrasyon Distrik* e *status* ozordi lo sa size idantifikasiyon e alokasyon lofis pou bann *MNAs* dan distrik i *comme* swivan; - 18 dan 28 distrik lofis in fini ganny idantifye. *MNA* ek *DA* in deza okouran e i reste zis pou finalize. Dan sa, 18 14 distrik en lot lespas in ganny idantifye apard ki dan *building Ladministrasyon Distrik* an vi ki napa lespas.

Sa bann landrwa ki'n ganny idantifye i enkli bann *ex biro Regional Councils*. Dan sa 14 distrik bann *MNA* ek *DA* respektiv in fini tonm dakor e sekretarya mon Minister i deza okouran.

Sa bann lenfrastriktir i baze pli zou mwen pa lwen avek biro Ladministrasyon Distrik. I annan 4 distrik kot biro *MNA* in fini ganny konsidere pou dan *building Ladministrasyon Distrik* an vi ki i annan sifizaman lespas.

I osi annan 8 distrik kot *MNAs* in deza ganny eksplike, ki pou lemoman i pa posib pou annan en biro pou zot dan

building Ladministrasyon Distrik. Oubyen dan lezot fasilite pou rezon lespas. Savedir lezot fasilite parey Sant Kominoter par egzanp. Enn sa bann distrik en legzanp se Perseverance napa lespas pou MNA ganny plas laba. Sekretarya mon Minister pe donn latansyon irzan sa bann ka. Serten MNA dan bann tel sityasyon, in deza met serten propozisyon, devan mon Minister pou konsiderasyon. Par egzanp distrik Anse Boileau.

Mr Speaker lo nivo mon Minister nou pe fer nou mye pou organiz sa bann alokasyon o pli vit posib swivan desizyon *Cabinet*.

Pou bann distrik ki landrwa in fini ganny idantifye keksoz pe bouze. Me parkont landrwa kot nou pe rankontre serten problem, en lekip teknik in deza ganny met an plas, pou fer en evalyasyon e vin avek en propozisyon dan limedya.

Mr Speaker an referans avek trwazyenm kestyon Onorab, pandan mon rankont avek bann DAs semenn pase, mon'n eksplik zot klerman rezondet akoz Gouvernman in pran en tel desizyon, pou donn MNAs en plas dan *building* biro Ladministrasyon Distrik.

Mr Speaker mon oule profit sa loportinite, pou dir ek sa Lasanble, ki i pa lentansyon sa Gouvernman pou tir bann DAs ek zot staff dan *building* biro Ladministrasyon Distrik e donn MNA. I pa lentansyon sa Gouvernman pou fer sa.

Sa ki sa Gouvernman i anvi vwar se ki bann MNAs i ganny en fasilite, pou ki bann zabitan zot distrik respektiv i ganny sans rankontre zot dan en landrwa apropriye dan zot distrik.

Mr Speaker mon oule profit profite pou fer en pti remark anliny avek sa novo devlopman. Mon oule demann bann MNAs Elekte dan distrik, pou zot tir politik dan zot travay kominoter. Landrwa politik i dan Lasanble Nasional.

Mon oule osi demann bann MNAs ki'n deza etabli zot dan bann landrwa lwe, ek kot sa landrwa in ganny vwar konman en lofis konpanny dan dernyen eleksyon, pou silvouple sey rod en lot landrwa pou fer zot biro.

An fezan sa zabitan zot distrik, i a santi zot pli konfortab pou vin anver zot. Sa i en pwen refleksyon ki nou bezwen konmans mazin lo la. En landrwa ki'n ganny vwar konman en landrwa kot konpanny politik in ganny fer i

pa sa landrwa apropriye pou deservi tou dimoun.

Alor mon pe re konfirmen ki bann biro DAs pa pou ganny pran pou donn MNAs. Mersi Mr Speaker.

MR SPEAKER

Mersi Minis. Mon krwar sa ki mon a fer la si sa Manm ki'n demann kestyon i annan en kestyon siplemanter, nou a pran li la a se moman, me si non nou a repas lo lezot kestyon. Eski Onorab Lemiel eski ou annan okenn kestyon spesifik ki oule klarifye la? Silvouple wi.

HON SYLVANNE LEMIEL

Mersi Minis pou ou kestyon. Mon krwar ou'n ase byen detay mon larepons. En pti kestyon siplemanter Minis ki mon ti a kontan vvar si petet ou'n konmans met ater dan bann landrwa kot ki petet i annan azoutaz lofis, petet ki ou pou bezwen fer ek bann Ladministrasyon Distrik aktyel. Akoz *bear in mind* ki ler MNA pe vin dan distrik pe vin ek en clerk, *meaning* 2 lofis. Eski zot in petet fini balanse lo kote kou, zot in fini travay lo la, la konbyen i pou arive? Antan ki ou'n fini konnen ki bor ki ou pou bezwen al fer sa.

Sa i enn. Apre dan bann lenstans kot ki vreman sere, i napa lespas pou ou azoute. Ki laranzman ki ou pe sey fer? Eski i annan teren dan distrik ki zot pe mazinen kot en *building* i ganny *build* pou sa MNA? Oubyen ki desizyon zot pe pran? Mersi Minis.

MR SPEAKER

Mersi Onorab. Minis ou adres sa *please*.

MINISTER ROSE-MARIE HOAREAU

Mersi Mr Speaker. Mersi Onorab. Ok mersi Onorab pou sa kestyon. Annefe sa ki ou pe demann mwan la i en keksoz ki nou pe *actually discuss* lo la dan Minister. I en keksoz parey mon dir ki en pe irzan.

E se sa mon osi mon bezwen petet semenn prosen pli tar konmans al lo teren pou al vvar egzakteman kote ki i annan lespas, kote ki napa, kote ki pou annan en possibilite petet azout en bout.

Me selman mon krwar dan limedya *rest assured* konmsi ki nou pe mazin lo la e sa i en priyrite pou nou. Mersi.

MR SPEAKER

Mersi. Mon ti a prefere kontinyen avek lezot kestyon, apre ki zot a kapab pas lo zot

kestyon siplemanter lo nenport sa bann kestyon ki'n ganny poze avek Minis. Prosen kestyon Onorab Kelly Samynadin.

HON KELLY SAMYNADIN

Mersi Mr Speaker. Bonzour Minis avek ou delegasyon. Bonzour tou bann Manm koleg Onorab e tou dimoun a lekout.

MR SPEAKER

Wi Onorab.

HON SEBASTIEN PILLAY

Mon pe zis mazinen, kestyon Onorab Samynadin i ouver en lot en lot *area regarding* sa *unless*, mon pe konpran poudir oule ki nou pran tousala ansanm,

(Off-Mic)

HON SEBASTIEN PILLAY

Hold on fodre nou aret nerve.

MR SPEAKER

Efektivman donn mon ou lopinyon, ale Onorab Pillay.

HON SEBASTIEN PILLAY

Mon pa konnen akoz mon pe zis demann en leklersisman pou nou kler lo kestyon siplemanter.

MR SPEAKER

Nou a repran bann kestyon apre.

HON SEBASTIEN PILLAY

Akoz problem ki pou vini, se pou nou konnen konbyen Manm ki pou kapab demann kestyon. Ou vvar? Ou konpran? So i annan en *time frame* ki nou'n gannyen ki nou pe ganny zot pe travay lo la. Fodre zot mon pa konnen depi ler zot dan Gouvernman zot pe nerve.

MR SPEAKER

Mersi Onorab Pillay.

HON SEBASTIEN PILLAY

Relax.

MR SPEAKER

Onorab Georges ou annan en lopinyon lo la ou? *Ok* mersi nou a kontinyen. Onorab Samynadin.

HON KELLY SAMYNADIN

Mr Speaker mon kestyon i *comme* swivan;- Swivan deklarasyon par Prezidan Larepublik lo restriktirasyon travay DA e MNA dan bann distrik, eski Minis i kapab donn plis detay lo sa restriktirasyon e eksplik sa Lasanble nouveau relasyon travay ant bann Ladministrate Distrik e bann MNAs? Mersi.

MR SPEAKER

Mersi Onorab. Minis.

**MINISTER
HOAREAU**

Mersi Onorab pou ou kestyon, mersi Mr Speaker. Mr Speaker mon panse ki mon'n abord en pe larepons sa kestyon ler mon'n reponn sa premye kestyon demande par Onorab Lemiel.

Me an bref Mr Speaker, konman bann MNAs zot annan premyerman en rol reprezentatif dan zot distrik. Zot in ganny elekte par zabitant zot distrik, pou reprezent zot dan Lasanble Nasyonal.

Dezyenmman, bann MNAs i annan en rol edikatif. Trwazyenmman zot osi formil e debat lo bann Mosyon baze lo laspirasyon zot distrik respektiv oubyen nou en size Nasyonal. Katriyenmman zot osi debat e aprouv bann Lalwa e Bidze Nasyonal. Senkyenmman bann MNAs i osi annan en rol *oversight* lo Legzekitiv. Sa i detrwa keksoz ki enkli dan zot travay.

DAs zot, zot en bann *civil servant*. E zot annan sa rol e responsabilite pou zer zot biro Ladministrasyon Distrik. E DA e son *staff* i tonm anba responsabilite Minister

Gouvernman Lokal e Zafer Kominoter, kot zot ganny gidans lo bann Polisi lo bann size finans, osi byen ki administrativ.

Mr Speaker Gouvernman aktyel in vwar li neseser e en priorite pou ranforsi rol lofis Ladministrasyon Distrik avek sипор ek prezans bann MNAs dan distrik.

Konman bann MNAs ek Das, zot pou bezwen travay la a kote zot bann zabitant. Atraver zot Gouvernman pou kapab reponn bann laspirasyon bezwen zabitant zot bann distrik. I enportan ki bann servis ki ganny ofer dan distrik i la alaoter e zwenn lekspektasyon dimoun. Kestyon ki ganny poze se ki mannyer nou pou arive fer sa?

Mr Speaker nou pou selman kapab fer sa arive atraver letablisman en nouveau lapros travay. En nouveau fason fer keksoz. Nou pou bezwen met tou nou resours ansanm, e nou pou bezwen travay ansanm. Nou pou bezwen en langazman profon e senser par tou bann konsernen pou fer sa diferans.

Alors Mr Speaker, mon ti a kontan dir ki desizyon ki'n ganny pran pou ki bann MNAs i ganny en biro dan *building* Ladministrasyon Distrik, ki pa

neseserman ganny vwar konman en restriktirasyon, me plito en nouvo fason fer keksoz.

I trez enportan ki *MNA* osi ki *DA* tou le de zot pou bezwen ansanm etabli en bon sistenm travay, kot i ava annan loportinite pou dyaloge, loportinite pou partaz nide lo bann size distrik. E de tousala dan byennet ek lentere zot zabitan dan zot distrik. *MNA* ek *DA* pou bezwen ganny vwar pe travay ansanm pou byennet lakominote.

E la mon ti a profite pou dir ki bann *MNAs* ek *DAs* zot bezwen annan en rol kle dan desizyon ki ganny pran par rapor avek alokasyon later ek lakaz, lenplimantasyon proze, osi byen ki lasistans sosyal dan zot distrik e sa i devret ganny fer lo merit.

Konman *MNAs* zot annan en rol signifikan pou zot fer bon desizyon. E pou zot fer bon desizyon i enportan alor ki zot annan bon lenformasyon. Zot bezwen konnen kwa ki pe pase dan zot distrik. Zot bezwen reste azour avek laktyalite. Apre tou se zot ki toulezan zot vin dan sa Lasanble pou aprouv Bidze Nasyonal, pou aprouv Bidze bann Minister, departman ek lazans, ki i annan en lenpak lo zot distrik respektiv.

La Mr Speaker, permet mwan pou mwan lans en lapel avek tou dimoun. Zot bann zabitan dan distrik zot osi bezwen kontribye pozitivman dan devlopman zot distrik. Zot annan en gran rol pou zwe dan sa lespri lapartenans e vre sans kominoter.

Dan laliny sa nouvo lapros travay, nou rekomande konzwentman dan laliny sa nouvo lapros travay, nou rekomande ki konzwentman bann *MNAs* Elekte lo nivo distrik e zot *DA* i organiz 2 meeting piblik lo en baz anyel. Sa i ava donn zot loportinite pou ki *MNA* ek *DA* i donn en kontrandi lo bann aksyon dan zot distrik osi byen ki resevwar bann komanter e propozisyon ki sorti kot zot bann zabitan.

Byensir dan sa nouvo lespri travay, nou ava kit sa Lasanble okouran tou bann devlopman. Mersi Mr Speaker.

MR SPEAKER

Eskiz mwan eski ou ti a kontan okenn leklersisman lo ou kestyon spesifik?

HON KELLY SAMYNADIN

Mon leklersisman lo sa kestyon mon ava kit pou pli tar.

MR SPEAKER

Wi mon konnen i annan bann Manm pe demande pou zot poz kestyon. Nou a kontinyen avek kestyon ki lo papye, e apre nou ava repran plas. Selman mon ti a kontan propoze e la mon demann gidans ankor, eski bann Komite i kapab retard zot *meeting* pou en demi erdtan, e apre nou koumsa nou a kapab kontinyen ziska 1er e apre nou kapab repren travay ape midi 3er? Agreab? *Ok bon nou a posed koumsa.* Nou a pas lo kestyon nimero 3, Onorab Desheila Bastienne

HON SEBASTIEN PILLAY

Mr Speaker mon krwar la, la nou pe al tro lwen la. Akoz mon'n konpran kestyon nimero 1 ek kestyon limero 2. Me kestyon limero 3 i annan pou fer avek distrik Perseverance spesifikman.

E *Standing Orders* i kler, non, non, non, non, non, non fodre nou krwar nou pa kapab kontinyen. Akoz nou an mazorite nou le fors keksoz dan en fason. Minis i reponn en kestyon lo sa 2 size i annan en ta keksoz ki li in dir. Annou *allow* nou bann Manm pou kapab reponn kestyon lo sa 2. Akoz sa kestyon limero 3 i spesifik to Perseverance. So ki mannyer prezan nou larestan Manm nou pou antre pou

demann kestyon lo
Perseverance?

(Off-Mic)

HON SEBASTIEN PILLAY

Be non Onorab, be non ou pe abiz *Standing Orders* Onorab. Be ou pe abiz *Standing Order* Onorab. *Come on.* Ou pe abize.

MR SPEAKER

Ale. Mon pou fer en konpromi. Kestyon lo Perseverance mon krwar i totalman anliny avek sa size ki nou'n aborde, akoz i konsern biro DA i konsern MNA.

Sel fransman kestyon ki mon vvar nou kapab lese pou lemoman se dernyen kestyon Onorab Naddy Zialor ki demann lo stati bann proze ki'n deza fer.

So mon pe propoze sa 3 kestyon i byen fasil pou al ansanm. Alor nou a kontinyen e mon a demann Onorab Bastienne pou poz son kestyon. Mersi.

HON DESHEILA BASTIENNE

Mersi Mr Speaker. Bonzour Mins ek ou delegasyon. Bonzour tou Onorab byensir. Bonzour tou dimoun a lekout.

Mr Speaker avek ou permisyon, apre mon premye kestyon, mon ti annan en kestyon siplemanter ki mon ti le

ki Minis ti'n pas en komanter. Mon ti pe demande si mon kapab kontinyen.

Eski Minis i kapab dir sa Lasanble ki plan ki son Minister i annan pou biro ladministrasyon dan distrik Perseverance? Eski i pou kontinyen avek 2 biro ladministrasyon, parey i ete an se moman? Si non, ki novo striktir ki pou ganny met an plas? Mersi.

MR SPEAKER

Mersi Onorab. Minis.

MINISTER ROSE-MARIE HOAREAU

Mersi Onorab pou ou kestyon. Mersi Mr Speaker. Mr Speaker Perseverance pou lemoman i annan 2 biro ladministrasyon ki deservi sa distrik. Lenformasyon ki mwan mon'n resevwar, se ki sa popilasyon Perseverance annan environ 6300 dimoun aepre.

Alor bann premye zabitan ki ti rantre Perseverance ti rantre Perseverance an 2011, e la nou 2020. Ozordi kominote Perseverance ti'n devret fini annan son prop *building* Ladministrasyon Distrik e son Sant Kominoter osi byen ki e Stasyon Lapolis.

Sa ti ava'n fer ki ti ava'n liber sa 6 lakaz ki pe aktyelman

ganny servi koman biro Ladministrasyon Distrik e Stasyon Polis e sa ti ava'n permet 6 fanmir ganny sa bann lakaz.

Mr Speaker mon Minister pe etidye sa sityasyon ki Onorab Bastienne in met devan, e pou lemoman napa nou pe ganny diskisyon dan Minister lo la. E lemoman ki en desizyon in ganny fer, byensir avek konsiltasyon tou bann dimoun konsernen ki enkli *DAs MNAs* e osi bann zabitan Perseverance, la nou konman en Minister nou a kapab fer en desizyon lo ki mannyer nou pou *move forward* lo sa ka Perseverance an partikilye. E byensir nou ava fer sir ki Lasanble i ganny enformen. Mersi Mr Speaker.

MR SPEAKER

Mersi. Avek sa mon krwar nou kapab pas lo Kestyon Siplementer. Mon'n pran non plizyer Manm ki'n leve *ok* zis tenir zot lanmen anler ale. *Order!* Silvouple. *Ok* mon annan, mon annan en long lalis nou a sey prosede otan ki posib. Premye nou a konmans kote isi avek Onorab Cosgrow.

HON WALLACE COSGROW

Mersi bokou Mr Speaker. Mersi bokou pou donn mon laparol.

Bonzour Minis, bonzour delegasyon. Mr Speaker mon annan detrwa kestyon premye.

MR SPEAKER

Poz 2 silvouple.

HON WALLACE COSGROW

Premye parti mon kestyon Mr Speaker, an vi larepons Minis boner dan premye kestyon, i ti dir ki bann DA in ganny eksplike rezondet pou sa desizyon. Mon ti a kontan Minis i dir nou en pti pe eksplik nou en pti pe osi ki rezondet pou sa desizyon, par lefe ki osi dan manifesto LDS Mr Speaker, sa parti ti dir kler ki zot pou met MNA a latet a direksyon zot bann distrik.

Eski sa desizyon i pe zot pe enplimant sa pwen spesifik dan zot manifesto, eski ou kapab, asir bann DAs ek zot fanmir, ki zot louvraz la i garanti dan bann distrik ki bann prosen letan ki pe vini an vi ki bann MNAs i sipoze vin a la latet zot distrik?

Dezyenm kestyon Mr Speaker, eski e la mon pe koz pou bann MNA Proporsyonnell. Mon konpran poudir bann MNA ki'n la avan mon kapab eksplike mon konpran poudir napa okenn distenkson ant MNA Proporsyonnell avek MNA Elekte.

Me dan lanons Prezidan i pa'n fer kler si MNA Proporsyonnell pou osi annan en biro *somewhere* dan distrik. I annan 9 nou e dan ka distrik kot mon sorti i annan de nou proporsyonnell Mr Clive Roucou Onorab Clive Roucou pardon mwan menm e, mon konpran poudir Onorab Richard Labrosse ti'n fini pran biro distrik. So kote nou, nou stand konman bann MNA Proporsyonnell? Mersi Mr Speaker. Mersi Minis.

MR SPEAKER

Mersi. Ale nou a gard en pe lord silvouple. Minis.

MINISTER ROSE-MARIE HOAREAU

Mersi Onorab, mersi Mr Speaker. Mon krwar mon'n fer ase kler dan mon bann larepons ki MNAs avek DAs zot manda se travay ek kanmarad. Zot MNAs ek DAs zot bann dimoun adilt e zot a travay an konsiltasyon. E mon krwar mon'n, mon'n fini fer konpran atraver mon larepons ki sa ki mon'n discuss avek bann Das. Akoz sa ki mon'n vin dir la ki mwan mon santi bann keksoz ki bann DAs i devret pe fer dan zot distrik, mon'n fini liste dan mon bann larepons. E se sa ki mon'n partaze ek mon bann

DAs. Alor mon krwar sa bout larepons in fini ganny reponn.

Bann Manm Elekte Proporsyonnel zot annan zot biro zot loperasyon an zeneral, i ganny *funded* par zot *individual respectives political parties*.

Alor mon sizere ki *sorry?*
E mon sizere ki Onorab Cosgrow nou kapab petet –
Mwan se sa ki mon konpran poudir bann Manm Proporsyonnel zot ganny *funded* par zot *political parties*.

So mon kapab al rod en pe plis lenformasyon lo la pou ou, pou kapab petet ekliersi sa pwen en pe pli an detay. Me sa an zeneral se ki sa ki mwan mon'n ganny fer konpran. E apepre bann DAs ek zot *staff* pou garanti zot travay. *As long as* en dimoun pou otan en dimoun i fer son travay byen, anba sa novo lespri travay ki nou la pou tou dimoun. E si i annan okenn lenformasyon, ou levidans ki sa lespri travay ‘Sesel pou tou son Zanfan’ pa pe ganny met an plas, i annan bann prosedir ki nou kapab koze avek sa bann DAs i annan parey *disciplinary action* selman ou bezwen anmenn ou levidans.

Nou ava ganny en koze i ava ganny nou ava ganny en diskisyon, e sa osi mon'n *discuss* longman avek bann

Das, ki zot e zot bezwen annan en kont en sans *accountability* anver zot *staff*. Zot pa kapab zis dir a mon pe ganny problemm ek sa *staff*, mon pe ganny problemm ek sa *staff* i vin tar. Be oli dan son *file* ki dir i vin tar?

Alor konman DAs zot bezwen pran zot DAs zot bezwen pran zot responsabilite vizavi zot *staff*. Sa ki fodre i ganny disiplinen, i bezwen ganny disiplinen. Si zot bezwen en koudmen Minister pou ed zot dan sa demars nou, nou la pou siport zot, akoz *after all they are civil servant*.

So mon kapab dir zot poudir en dimoun ki pe travay byen napa okenn lafreyer pou li perdi son travay. Mersi Mr Speaker.

MR SPEAKER

Mersi mon pou sey pran bann kestyon dan lord, en pe ki mon rapel in lev lanmen, me solman i pa pou toutafe swiv. Onorab Regina Esparon.

HON REGINA ESPARON

Mersi Mr Speaker. Mr Speaker mon ti a kontan Minis i dir avek nou, ki garanti ki pe donn nou ki nou konman bann Manm Elekte, ki nou pa pou ganny *bypass* lo bann desizyon ki pran lo Gouvernman Lokal?

Sirtou nou konnen poudir dan dernyen eleksyon bokou biro distrik ti ganny servi konman en landrwa politik. Eti annan bann *CC Members* laba. Ki garanti ki ou pe donn nou ki sa lakord politik ki ti anmar sa bann *CC Member*? La parey mon pe regarde san mank respe Mr Speaker, mon pe regard Mr Frichot ti *CC Member* pou Glacis *ok*, konman en travay Gouvernman Lokal li ki ti pe donn lord kote debous rigol, kote pou fer pti semen isi pti semen laba, ti pe *bypass* MNA Elekte!

(APPLAUSE)

HON REGINA ESPARON

Ki garanti, ki garanti Minis ki sa lakord politik i pou ganny detase avek sa bann dimoun dan ou Minister, ki *MNA* pa pou ganny *bypass* e zot pe fer zot politik? Mersi Mr Speaker.

MR SPEAKER

Mersi Onorab. Minis.

MINISTER ROSE-MARIE HOAREAU

Mersi Onorab, mersi Mr Speaker. Mwan mon kapab dir zot dan mon fason travay, mon touzour annan bann ki mannyer mon kapab dir bann mon annan en laport mon

annan en tandans kominike. Mon pa zis dir keksoz, mon ekoute osi.

Alor mon pou zis redir ankor, anba sa novo lapros travay ki Prezidan Larepublik li menm in fer resorti, ki napa pou napa politik dan biro Gouvernman, ki pou napa politik dan Sant Kominoter dan *DA's office and whatever*. So nou bezwen konpran poudir wi mon konpran ou lenkyetid Onorab. Mon konpran parske listwar petet in montre otreman. Mon konpran.

Me selman mon krwar annou regard li konman en novo konmansman, en novo fason fer keksoz, ki mon krwar sa 2 larepons sa 3 larepons mon'n reponn la devan sa Lasamble, in fer kler ki mannyer nou travay i ete devan nou. In fer kler ki nou pou bezwen forseman aprann tir politik dan biro Gouvernman e nou pou bezwen forseman aprann poudir, nou annan en novo konmansman devan nou. Nou annan en novo fason fer keksoz, nou annan en novo ladministrasyon. Alor mon krwar nou pou bezwen donn en pe letan annou regarde ki mannyer keksoz i deroule *en tenant* an kont ki wi nou pa devret pe fer politik dan landrwa travay. Mersi.

MR SPEAKER

Mersi Minis. Onorab Wavel Woodcock.

HON WAVEL WOODCOCK

Mersi Mr Speaker. Minis sa sityasyon ki nou pe fer fas avek, i en sityasyon ki'n ganny koze par bann ladministrasyon ki'n la oparavan. Akoz dan lepase Gouvernman oparavan pa ti vwar nesesite pou annan en lofis pou bann *MNA* dan bann distrik. Akoz avan preski tou sez ti pou zot dan Lasamble. E zot bann aktivite ti ganny fer dan Biro Brans parti ki zot ti ladan. Alor pa ti neseser pou fer laranzman, pou annan en batiman pou bann nenport ki *MNA* ki vini swa ki sorti dan *US*, swa ki sorti dan Lopozisyon.

E i annan en serten komitman ki ladministrasyon Msye Faure avan ti fer avek devan nou Lasamble. Annefe dan enn son bann ladres Leta Lanasyon kot i ti dir ki dezormen biro bann *MNA* pou ganny batir dan tou distrik pou ki nenport ki *MNA* ki vini i kapab deservi sa biro.

Me mon osi *I stand to be corrected* Mr Speaker ti annan en Bidze si mon pa tronpe an 2019 kot 5milyon ti ganny bidzete pou konmans sa bann

proze pou konmans batir sa bann biro.

E an vi ki ozordi sityasyon se ki nou annan nou 25 Manm lo nou kote latab *ok* 20 Manm Elekte, prezan nou pe ganny difikilte pou ganny lofis dan bann distrik ki pe fors zot lanmen nouveau Gouvernman, pou rod en landrwa pou met bann *DA*. E still parey ou'n dir Minis poudir i annan serten Ladministrasyon Distrik ki i napa lespas pou bann *DA*.

Alor eski i dan lentansyon Gouvernman dizour dan lefitir anmezir ki nou lekonomi i *improve*, ler nou sorti dan sa sityasyon *COVID*, pou fer bann biro pou bann *MNA* dan distrik dan lefitir? Mersi.

MR SPEAKER

Mersi Onorab. Wi Minis.

MINISTER ROSE-MARIE HOAREAU

Mersi Onorab, mersi Mr Speaker. Mon kapab dir ou ki sa i ou fek dir la i en sityasyon ideal. I ti ava en sityasyon ideal. Me selman nou bezwen pran kont parey ou'n dir osi avek *COVID* e nou tou nou konnen nou leta finansman i pa nou leta finans dan pei i pa, i pa an bon leta. Nou finans Sesel pa an bon leta i pa an bonn sante, nou napa larzan, nou pe

demann dimoun pou fer sakrifis dan tou dimoun dan pei pou fer sakrifis.

Alor larealite *des choses* se ki Gouvernman *right now* napa larzan pou fer okenn *building* pou bann MNAs. Mon krwar sa zot a konpran sityasyon e se pou kwa la nou pe sey fer mannyer pou *accommodate* zot *as best as we can*.

Me selman i pa vedir, ki sa ki'n ganny sizere pou fer en biro pou MNAs evantyelman avek byensir konsiltasyon e avek konsiltasyon pa zis antre nou la, me osi avek Prezidan ek tou son lekip, pou nou vvar a ki moman ki sa petet i a kapab vin posib. Mersi Onorab.

MR SPEAKER

Mersi Minis. Onorab Desheila Bastienne.

HON DESHEILA BASTIENNE

Mersi Mr Speaker. Minis ou'n dir ki dan sa Lasanble ki menm ki i annan 2 biro Ladministrasyon Distrik dan Ile Perseverance, napa lespas pou en biro pou MNA.

Mon oule demann ou Minis ek ou delegasyon si zot okouran ki dan Perseverance 2 i annan en, *building* ki sipoze servi konman en *computer room* ki in reste fermen pou en bon pe

letan. E menm mon'n ganny lenformasyon ki dan biro ki dan Perseverance 1, yer mon ti la kot dan sa landrwa, i annan en biro ankor zis akote Ladministrasyon Distrik ki pe ganny servi pou SNYC, sa biro osi i reste fermen.

Eski zot okouran eski zot kapab ganny lenformasyon lo sa bann biro, si i ankor vreman pe ganny servi par sa 2 fonksyon, oubyen ki pe arive avek sa 2 biro ki pe reste fermen? Mersi.

MR SPEAKER

Mersi Onorab. Minis.

MINISTER ROSE-MARIE HOAREAU

Mersi Onorab, mersi Mr Speaker. Onorab mon krwar pou sa kestyon spesifik, i ti a pli byen ki nou konman en Minister nou vin vizit sa teren avek bann Minis konsernen ek tou bann lazans konsernen. E nou e i pou pli prodiktiv e pou nou vin anver Lasanble pou donn zot en desizyon ouswa en konpromi lo sa kestyon ki ou'n demande.

Me selman nou pa pou kapab fer li la. Me selman volonterman nou ava al fer tou bann demars pou kapab reponn ou sa kestyon, an kolaborasyon avek tou bann sa

bann lezot Minister e lazans ki ou'n mansyonnen. Mersi.

MR SPEAKER

Mersi Minis. Onorab Conrad Gabriel.

HON CONRAD GABRIEL

Mersi Mr Speaker. Mersi Minis ek ou delegasyon, pou bann larepons ki ou'n donn nou e apre mon'n ekout Prezidan byen sa novo relasyon travay.

Mon santi dan distrik Pointe Larue mon privilez konman en Manm Elekte in ganny en pti pe *bypass*. I annan en sityasyon ki'n, devlope i annan en vizit ki'n ganny *conduct* dan en *housing estate* yer Pointe Larue, e tou dimoun pe, demande oli Manm Elekte?

Zis Manm Proporsyonnel ki ti la avek en pe delegasyon mon pa konnen si okouran. Mon santi mon privilez in ganny *bypass*, e mon ti a kontan Minis si mon ti a kontan Minis ou klarifye ek nou biro Prezidan resevwar en let avek en zabitan dan en *housing estate*, eski i anvoy kot Manm Proporsyonnel direkteman? Eski Manm, Elekte i sipoze ganny en *call* avek son *DA*, poudir i annan tel vizit 4er edmi?

Mon ti a kontan petet eklersi nou en pti pe lo la. Akoz

konman en Manm mon santi mon privilez in ganny afekte en kantite. Mersi.

(APPLAUSE)

MR SPEAKER

En pe lord silvouple. Mersi Onorab pou ou kestyon. I pa direkteman lye avek bann kestyon ki lo papye. Selman lo papye deza. Selman mon a demann Minis pou adres li otan ki i kapab. Mersi. Mersi Minis.

MINISTER ROSE-MARIE HOAREAU

Mersi Onorab, mersi Mr Speaker. *Again* mon pou dir Onorab ki ou kestyon i en kestyon spesifik, i en kestyon ki *obviously* i konsern ou distrik i en leksperyans ki ou fek eksperyanse. Ki sel keksoz ki mon kapab fer en komanter lo la pou lemoman se ki, i paret petet ti napa byen planifikasyon lo par serten parti, serten ler mon dir parti serten bann dimoun konsernen ladan.

E mwan konman Minis pou Gouvernman Lokal ek Kominoter mon pou toulstan ankouraz parey mon fek dir komunikasyon ek dyalog. Si in ariv en lensidan kot parey *Anglais* i dir *we drop the ball* ki nou'n fer en fot ouswa en dimoun in fer en fot. Mon

krwar lo ou nivo ki leksperyans personnel ou'n eksperyanse yer dan distrik. Mon krwar sa nou kapab annan en *one-to-one*, nou kapab petet regarde konman nou kapab regle sa bann keksoz ki'n ariv sa malantandi yer.

Alor mon ti a sizere *call* mon biro, *call* mwan nou asize nou a koze avek sa *DA* tou dimoun konsernen pou nou regarde *going forward* ki mannyer petet nou kapab pli byen planifye nou louvraz.

MR SPEAKER

Onorab Gabriel mon krwar Minis in donn ou en bon opsyon, pran li. Nou a pas, wi *Leader Lopozisyon*.

HON SEBASTIEN PILLAY

*Thank you Mr Speaker. Non be napa nanryen Minis in donn en larepons pou kestyon Onorab Regina Esparon kot in dir poudir Onorab Regina Esparon in *raise* bann konsern, kot i annan en lot antite ki vin dan distrik ki vin travay as opposed to Manm Elekte.*

E Minis ou'n dir klerman a de repriz osi ou'n dir sa poudir sa Manm Elekte i bezwen ganny konsilte lo la.

So la ou'n dir ek Onorab Gabriel pou dir son kestyon i spesifik. Ou bezwen konpran poudir kestyon Onorab Gabriel

i spesifik akoz i pe osi pran lefe ki Prezidan Larepublik dan en *meeting* piblik lo Praslin, ti fer mansyon 2 distrik spesifik, Baie Ste Anne Praslin kot i annan Onorab Doyace Porice kot aparaman Onorab Doyace Porice sipoze re pran, e Pointe Larue kot i annan Onorab Rosie Bistoquet ki 2 Manm Proporsyonnel *LDS*.

So kestyon ki Onorab pe demann ou eski i dan sa laliny ki travay pe ganny fer? E oubyen eski li konman Manm Elekte parey Konstitisyon i demande pou ganny respekte. Se tou ki in demande, mon pa vvar rezon akoz nou bezwen tret kestyon en Manm Elekte dan sa distrik koumsa, akoz ozordi ou dan mazorite. Mersi Mr Speaker.

(Off-Mic)

MR SPEAKER

Mersi. *Order* silvouple les mwan met en parol avan Minis i reponn. Minis lo en Kestyon Siplementer i reponn osi byen ki i kapab baze lo lenformasyon ki i annan. E se sa ki'n fer. So mon pou dir nou pou kontinyen e mon pou pas kestyon pou Onorab Philip Monthy.

HON PHILIP MONTHY

Mersi Mr Speaker. Bonn apre midi Minis ek ou delegasyon. Mr Speaker si ou permet mwan mon pou zis retourne en pti gin an aryer lo kestyon Onorab Regina Esparon, akoz mon kestyon i en pe dan sa laliny.

Mon anvi demann Minis ki vreman ou Minister pou fer, pou ki enn fwa pou tou bann rankont politik dan biro Ladministrasyon Distrik i aret ganny fer? *Ok?* Akoz mon pe redemann mon redemann sa akoz i ankor pe ganny fer. E bomaten menm la ler nou pe koze, mon annan dimoun ki'n anvoy mon mesaz ki sa keksoz pe deroule *ok*, ki CC Member, kandida pou ansyen parti politik pou dernyen eleksyon i la dan biro Ladministrasyon Distrik. *Ok?* Konmsi i pa sipoze. Sa i mon premye kestyon.

Dezyenm kestyon, mon'n fer en vizit dan biro Ladministrasyon distrik Vandredi pase mon'n vwar diferan travayer *ok?* Mon ti le konnen si i annan liniformite dan tou sa bann *post* dan sa bann biro Ladministrasyon Distrik *ok*, ki si mon vwar 8 travayer dan biro Ladministrasyon Distrik Cascade ki vedir Plaisance osi i parey. *Ok* partou i parey. Ki tou sa bann *post* osi i tonm

anba Departman Ladministrasyon Piblik. Ki napa bann *post* ki ganny kree lo baz politik *ok?*

E pou terminen zis pou retourne en pe lo pwen Onorab Gabriel, mwan osi ganny met a lekar semenn pase. Ti annan en *meeting* dan mon distrik, avek Lotorite *Planning*, dapre mon konpran PS ti la, mon predeseser ti prezan, bann dimoun ki'n demann permision pou konble serten landrwa ki ti'n ganny refize dan lepase zot in ganny apele e mon pa'n ganny enformen lo sa *meeting* mwan.

(Interruption)

MR SPEAKER

Mersi, ale, Onorab Pillay eskiz mwan, ou'n fer sa detrwa fwa. Annou permet kestyon kontinyen silvouple. Mersi. Minis ou a adres kestyon Onorab Monthy.

MINISTER ROSE-MARIE HOAREAU

Mersi Onorab, mersi Mr Speaker. Lafason ki mon pe tann sa bann leksperyans endividyle, i montre poudir ki dan tou *transition period*, en keksoz petet bann labitud avan pa ankor tro arete, pa ankor

arete ouswa pa ankor ganny zot pa ankor konpran fodre zot arete, si i pe arive.

Alors *again* i annan en sans ki dimoun pou bezwen rekonnet tou dimoun zabitan distrik, bann zofisyé, zot tou dimoun pou bezwen rekonnet nou annan en novo fason fer keksoz. Alor annou espekte poudir firanmezir ki sa *transition* i pase, dimoun i konmans readapte ki keksoz i sanze nou bezwen fer li dan en lot fason, ki personn pa ganny kit deryer ni *MNA* ni *DA* ki elekte, ki pa elekte, personn pa ganny kit deryer.

Me mon krwar osi sa i vin en lespri grander osi ki nou bezwen si nou vvar en keksoz in arive nou, bezwen kapab santi nou confortab pou al koz avek en lot adilt, pou dir regarde mon'n aprann sa in arive mon krwar nou bezwen get en pti lafason ki nou pe travay. I vin en fason komunikasyon osi. Sa mon pwennvi lo la.

Dezyenmman ler ou'n demann mon si tou distrik i annan menm kantite *staff* ouswa menm bann *post titles*. Pou lemoman la kot mon Minister nou pe fer zisteman sa legzersis, pou nou vvar, lekel ki dan ki distrik. Petet ki lazans ki dan sa biro administrasyon

dan sa *building* biro administrasyon ki la. Si i annan okenn lazans *other then* bann dimoun sosyal par egzanp.

Si lekel ki pe *occupied* si i annan lasanm *available* lekel ki pe *occupied* sa lasanm, sa bann lezot biro, lekel ki striktir konmsi ki *organigram* sak sa bann distrik.

Sa i en legzersis ki nou pe fer, nou'n fini komanse, e byento nou a kapab *once* nou'n etabli kwa ki pe pase kote, lekel ki asiz kote, nou a kapab vin devan zot pou donn zot en lesplikasyon pli konman mon kapab dir sa, en lesplikasyon pli kler e pli efektiv, e pli korek. Mersi Onorab mon krwar mon'n-

E *again* si mon kapab servi sa lokazyon pou dir zot si zot annan okenn problem spesifik ki zot pe rankontre dan zot bann distrik, vizavi petet personnelite en lot dimoun, vizavi petet zot biro fizikman zot biro zot *building*, ouswa keksoz ki pa zot pe santi zot ti a kontan vin anmenn pli devan. Silvouple konnen tou le de kote nou Minister i la pou zisteman fer sa bann dyalog, zisteman rezourd sa bann problem.

Nou la pou tou dimoun. Alor mon lekip i la avek mwan mwan mon la zot konnen kot

nou asize nou asiz la apre *Amusement Centre on the way to IOT* la dan sa kontour nou la nou tou nou la.

So silvouple pran kontak ek nou bann sekretarya. Pran kontak ek mon sekreter annou fer bann *meetings one-to-one* si zot vin 2 zot alafwa napa problemm. Me selman annou sey rezourd sa bann keksoz lo teren, dan en fason ki vreman nou pou ganny en rezolisyon. Vreman nou pou ganny en solisyon.

Nou pou anmenn li la dan Lasanble seryezman mon pou napa lenformasyon pou tou keksoz ki zot pou demann mwan. Me selman zot probableman zot pou ganny en pli bon zot a sorti avek pli bon lenformasyon si zot vin anmenn enn zot problem endividyle kot nou, ki nou a kapab fer nou mye pou nou ed zot.

MR SPEAKER

Mersi Minis.

MINISTER ROSE-MARIE HOAREAU

Mersi Mr Speaker.

MR SPEAKER

Mon a pas lo Onorab Gervais Henrie.

HON GERVAIS HENRIE

Mersi Mr Speaker. Mon premye kestyon pou Minis i konsern lefe ki i annan 8 distrik ki napa lespas, ki pa pou gannyen biro akoz napa lespas. Sa kestyon petet ou kapab dir mon ou pa pou kapab reponn. Me selman ou kapab anmenn nou konsern devan, parski enn bann rezondet mon mazinen se kestyon lekonomi bidzeter pou bouz biro *MNA* dan biro Ladministrasyon Distrik e koup *rent money* ki pa *available through constituency allowance*.

Alors si napa lespas en pledwari ki mon pe, fer lo lapar tou bann ki pou ganny afekte ki dan kour term *the constituency allowance* pou bann ki napa biro akoz kontrent lespas, i pa ganny koupe tan ki Lotorite konsernen pa ankor fer *available* lespas pou nou. Sa i mon premye pwen.

Dezyenm, Minis in koz lo novo lapros travay novo lapros fer, e i bezwen en ki mannyer mon kapab dir sa, en fason profon e senser en dimoun i aksepte sa novo realite. Me Minis 43an *mindset* i pou difisil pou nou sanze.

E mwan mon krwar poudir, enn bann keksoz ki kapab fors sa arive, ti deza annan *Local Government Act* 2015 ki pa'n zanmen akoz sa i

ti pou vin avek *regional* pa *regional, but District Council.*

Mwan mon ti a sizere ki ou Minister i vin avek en Lalwa, en pe parey nou *Standing Orders* la ki diriz tou keksoz tou fason ki nou fer, e ladan i ava annan *terms of reference DA, MNA* ki kalite relasyon travay zot pou annan, ki bann striktir distrik. Ki demen mwan mon pa kapab dir mon'n mont lo lipye *DA, DA* pa pou kapab mont lo mon lipye.

En pe parey bann *Board* ler i ganny etabli, nou konnen ki *Chairman Board* i fer, ki son CEO i fer, ki mannyer dimoun i ganny pouse dan en Lalwa ki demen, letan Gouvernman i sanze nou konnen poudir nou'n fini etabli en keksoz atraver Lalwa. Mersi.

MR SPEAKER

Mersi Minis ou adres son sizesyon.

MINISTER ROSE-MARIE HOAREAU

Mersi Onorab, mersi Mr Speaker. Onorab mon *take note* ou 2 kestyon. Mon dan nouvo realite mon realize i en pti pe difisil apre parey ou'n dir 43an, ki'n pase avan. Me selman nou'n lo en nouvo konmansman, and we have to start somewhere. Nou bezwen

konmans, nou bezwen konmanse. Nou pa pou kapab konmsi zis dir be ki ou a fer ti koumsa. Non, nou bezwen konmanse realize poudir i en nouvo fason fer keksoz.

Ou sizesyon, *regarding Terms of Reference*, mon'n ekrir mon ava sertennman anmenn pli devan. Mon ava sertennman fer sir ki i ganny pran an konsiderasyon e nou ava diskit lo la, e petet byento nou a kapab retourn anver Lasanble pou vin donn pozisyon Gouvernman lo sa ki ou'n rekomande. Mersi.

MR SPEAKER

Mersi Minis. Mon a pas lo Onorab Waven William.

HON WAVEN WILLIAM

Mersi Mr Speaker. Bonzour, bonn apre midi Minis avek ou lekip. Minis par lefe ki ou'n rekonnet ki nou dan en faz tranzisyon, e mon rekonnet osi ki ou'n sey eksplik en pti rol *DA* ek *MNA*.

Me mon pou demann ou Minis par lefe ki nou dan en tranzisyon, e avek leksperyans sa travay nivo distrik, mon pou demann ou pou konsider sa pwen ki;- enn apard ki eksplik sa ki ou'n eksplike dan Lasanble ozordi, ki ou lekip i fer en kalandriye *meeting* pou

kapab ganny tou le 3 parti ansanm dan distrik, pou nou kapab fer sir ki;- enn tou dimoun i konn balizaz travay. Parey Onorab Henrie pe dir ki nou pa mont lo lipye kanmarad. Mon krwar si sa *meeting* i ganny fer dan distrik mon mazinen keksoz i ava bouz dan en bon direksyon. Mersi.

MR SPEAKER

Mersi Onorab. Minis.

MINISTER ROSE-MARIE HOAREAU

Mersi Onorab, mersi Mr Speaker. Onorab ou pwen in ganny byen note. E ankor enn fwa i en keksoz pou nou mazin lo la. E mon garanti ou ki nou ava fer diskisyon, deba, konsiderasyon, nou a pran sa pwen an konsiderasyon, e, evantelman *will come back to you*, nou a retourn kot sa Lasanble avek en desizyon final. Mersi.

MR SPEAKER

Mersi Minis. Onorab Egbert Aglae.

HON EGBERT AGLAE

Mersi Mr Speaker. Minis mon pou swiv en pti gin dan laliny Onorab William, ler ou pe pran konsiderasyon sa ki ou'n demande osi, pou servi bann

medya osi pou annan bann konsiltasyon pou sa rol. Mon premye kestyon i *comme* swivan;- eski ou Minister ansanm, avek Legzekitiv zot annan en *deadline* ki'n ganny set pou akonpli sa misyon, tranzisyon ki tou *MNA* Elekte i kapab antre dan en lofis?

Dezyenmman, eski zot in osi pran konsern lo laspe bidzeter, petet akoz nou pou anba Ladministrasyon Distrik ki Bidze *Local Government* i zere, eski zot pe mazin osi pou annan en *input* finansyel ki *MNAs* osi pou bezwen fer a lavenir dan sa laliny?

E dernyerman ler zot pe pran konsiderasyon sa lofis silvouple, mazinen poudir *MNA* i annan en *clerk* osi ki pou bezwen akoz vizit ki'n ganny fer si ou pou donn mwan en biro mon *clerk* pou asiz obor mon ler mon pou vvar dimoun pou bezwen sorti, ouswa al an deor si sa dimoun pa anvi koz devan ou *clerk*. So annou pran kont sa bann evantyalite osi. Mersi.

MR SPEAKER

Mersi Onorab, Minis.

MINISTER ROSE-MARIE HOAREAU

Mersi Onorab, mersi Mr Speaker. Onorab mon'n toutafe dakor avek ou pou ki medya i

zwe en gran rol dan ledikasyon. E alor nou kapab pran sa nouveau konmansman, sa nouveau fason fer travay koman en keksoz ki nou pou bezwen nou menm nou ki dan sa Lasamble e menm dimoun deor, i bezwen konmans konpran poudir keksoz in sanze. E alor nou a servi medya kan letan i appropriye pou nou kapab konmans koz en pe lo sa nouveau fason fer keksoz.

Mwan mon pa pou asiz la pou mon donn en *deadline* lo kan tou sa bann keksoz pou ganny fini. Me selman sa ki mon kapab garanti ou, se ki nou pe fer li pli vit posib, me selman ler nou pou fer li vit nou pa pou fer li mal. Nou pe pran en pe letan, me selman *at the same time* nou pou fer li byen e nou pou bezwen ganny zot pou bezwen eksepte en dele letan pou nou kapab retourn anver zot avek en bon propozisyon ek en bon landrwa pou kot zot kapab fer zot desarz zot responsabilite.

Mon pran kont ki tou MNAs i vin ek son *clerk* so sa i tre enportan. E byensir pou rezon konfidansyalite ou pa kapab annan petet ou *clerk* dan menm biro ek ou fizikman. Me selman napa naryen ki dir i pa kapab asiz en lot landrwa.

So sa bann pwen ki ou'n dir definitivman e osi mon krwar mon'n mansyonnen kek par dan mon bann larepons ki mon'n reponn pli boner, se ki DAs ek MNAs zot annan en gran rol pou zwe lo kwa ki pase dan zot distrik lo- E zot MNAs desid bann Bidze ki aprouv bann Bidze pardon. Zot bann MNAs ki aprouv bann Bidze.

So wi zot annan en gran rol pou zot zwe dan bann desizyon finansyel. E mon ti a ankouraz zot kontinyen fer sa, e fer li lo nivo ki pou benefisyé zot distrik osi. Mersi Mr Speaker.

MR SPEAKER

Mersi Minis. Onorab Norbert Loizeau.

HON NORBERT LOIZEAU

Mersi Mr Speaker. Bonzour Minis ek ou delegasyon. Minis zis en pti kestyon, mwan mon enn parmi bann MNA ki pa ankor vizit distrik Bel Air. Dernyen fwa ki mon'n pase Vandredi mon ti al sers en lenvitasyon. Ler mon ti antre DA pa ti *entertain* mwan, i ti zis konmsi i annan en lisyen ki'n antre la anndan, i ti *go ahead* avek son travay.

Mr Speaker mon anvi demann Minis, vi ki distrik Bel Air, mon konnen parmi sa enn ki napa landrwa, pou met en

MNA. Eski ou kapab donn mon en dele letan kan ki mon pou antre, dan en biro laba, akoz i annan tro bokou keksoz ki pe pase laba Mr Speaker. I annan en dezord. I annan tro bokou mangrouy ki pe arive an se moman ki napa en lizye laba. Mon ti a kontan ou dir mwan dan mon en dele letan kan mon pou antre laba. Mersi.

MR SPEAKER

Mersi Onorab. Minis.

MINISTER ROSE-MARIE HOAREAU

Mersi Onorab. Mersi Mr Speaker. Onorab mon krwar pli bon fason pou nou bouze lo sa leksperyans ki ou'n fek dekrir, se ki nou rankontre ou osito posib ki nou kapab ansanm al fer parey mon met ou bann ki priyoriter ler mon konmans mon bann vizit distrik ki pou tre byento. Mon a met Bel Air koman enn bann distrik i pa lwen avek lavil i a fasil pou mon *cover* sa bout la, pandan mon bann premye sorti pou mwan al vizit distrik. *Ok?* Mersi Mr Speaker. Mersi Onorab.

MR SPEAKER

Onorab Sandy Arissol.

HON SANDY ARISSOL

Mersi Mr Speaker. Non, Onorab Rocky ti pe demann Minis kan i pou vin La Digue. Mon dir li La Digue ler nou a ganny bato. Apre lopital, ler lopital in fini fer. Mr Speaker, mon kontan mannyer konversasyon pe ale, parski mon kontan letan mon get lot kote mon vwar Onorab Audrey pe dir "Sesel pour tou son Zanfan." Minis Cosgrow pe dir annan asir travay bann DA. Ansyen Minis, Onorab Cosgrow pe demande Mr Speaker, atraver ou, ki bann travayer Ladministrasyon Distrik ek bann DA, ki i ti demande i ganny garanti.

Mon kontan ler zot dir sa, parski mon gete zot dan zot lizye, mon riye parski dan lepase ou get zot ti pe fer triyaz, i malonnet ozordi letan zot pe fre krwar zot pe apiy DA avek zot fanmir! Kan i annan plizyer zot la anndan ki'n pran las Ivy, ki'n pran plas bann lezot Manm. Alor Mr Speaker, i malere dan zot plas akoz Manmi Ivy pe rod son tyak.

(laughter)

HON SANDY ARISSOL

Mon kestyon lo la se, mon kestyon mon ti a kontan demann Minis Mr Speaker. Sheryl osi pe rod pou li e

Onorab Chantal in pran! Mr Speaker, mon kestyon lo la se, mon kestyon lo la mon ti a kontan demann Minis an relasyon avek bann DA. Lo kestyon Onorab Kelly Minis, kestyon nimero 2 lo restriktirasyon. Mon ti a kontan demann Minis sa *interview* ki Prezidan ti dir la, pour bann DA ki pou fer. Eski sa *interview* i pou zis bann nouvo DA ki pou *apply*? Sa *interview* ki Prezidan ti koz lo la, sa process. Eski i pou zis bann DA ki pe *apply*, nouvo?

Oubyen bann DA ki la, zot kontra pe fini, alor letan pe renouvre zot kontra, zot pou pas atraver sa prosesis *interview* zot osi si i ganny renouvre? Mon premye kestyon.

Mon dezyenm kestyon mon ti a kontan demann Minis se, an relasyon avek mon kontan Minis letan ou'n prezant ou lentansyon ou Gouvernman pou ki bann DA avek bann staff pa ganny tire dan Ladministrasyon Distrik. Me selman an menm tan mon ti a kontan prezant ou mon lentansyon koman Manm Elekte avek lentansyon bann Manm, bann dimoun, bann zabitan ki'n vot pou mwan Bel Ombre. Poudir nou Bel Ombre, nou oule en plas dan Ladministrasyon Distrik. Mon

pa oule en plas dan okenn lezot wing an deor Ladministrasyon Distrik.

(APPLAUSE)

HON SANDY ARISSOL

Kantmenm en plas obor DA, Sandy, Manm Elekte pou asize! Alor mon kestyon ki mon ti a kontan demande Minis, eski.

(Interruption)

HON SANDY ARISSOL

Non, ler zot mank respe i *ok zot*. Alor Minis, mon lentansyon ek lentansyon dimoun Bel Ombre, se dan Ladministrasyon Distrik. Mon kestyon lo la i vin letan ou'n dir kantite bann wing an deor ki annan. Mwan mon pe propoz en keksoz avek ou, avek ou Minister pou zot konsidere dan sa lantant ki nou annan. Tou sa bann wing ki annan an deor nou kapab konsider li pou *Youth Worker, Welfare Agency*, tou bann lezot lazans ki annan dan distrik, ki mazorite zot parfwa pe asize, nou pa vreman konnen ki zot pe fer. Me Onorab Arissol, koman Manm Elekte pou distrik Bel Ombre, i anvi en plas dan Ladministrasyon dan Distrik Bel Ombre.

Eski Minis ou kapab dan tou sa bann remersiman, re asir

mwan dan sa vizit ki ou'n fer, kote mwan mon sitye dan distrik Bel Ombre? Akoz i enportan pou mwan konnen. Mersi bokou Minis.

MR SPEAKER

Mersi. Minis.

MINISTER ROSE-MARIE HOAREAU

Mersi Mr Speaker. Mersi Onorab. *Ok, vizavi bann new contracts e lekel, si dimoun pou re apply pou zot job. Actually, la nou pe travay zisteman lo sa pou nou regarde what is the way forward lo la. By disi 2 semenn nou pou'n fini annan en plan ki mannyer bann lanplwa bann DAs, bann DAs an zeneral, ki mannyer nou pou regar sistenm going forward.*

Wi i annan par egzamp la, i annan 3 *vacancies* dan distrik e sa 3 *vacancies* in ganny *advertise*. So, nou'n fini komans lo en bon lepa ki nou pe montre la transparans. Nou pe montre poudir nou pe donn sans nenport dimoun pou *apply*. E ou a ganny anplwaye *through*, ou a ganny *interview* atraver en panel ki pou *interview* sa bann kandida. E sa dimoun ki avek pli bon kriter ki ava *obviously* ganny sa plas.

Me pou bann dimoun ki bann kontra pa ankor fini, nou

pe travay lo en plan *as to* koman nou pou *go about* bann dimoun lo kontra. Le moman ki mon annan sa an detay mon ava sertennman *share* avek sa Lasamble.

Onorab Arissol, mon a met ou apre Onorab Bel Air. Ki mon a vin vizit ou. Erezman ou pa tro lwen. Mon a vin vizit ou. Zisteman, ler mwan mon pou vizit distrik, mon pou vwar pou mwan menm lekel bann lezot lazans ki pe *occupy* sa distrik. E ler mon pou vini, mon pa pou vin tousel. Mon pou vin avek bann responsab sa bann lazans ek sa bann lezot Minister. Ki ler nou fer en desizyon, nou fer en desizyon ki tou dimoun i konpran akoz.

Nou pa la pou nou zis vin bouldoz, mwan koman Minis mon pa pou antre pou mwan vin bouldoz tou dimoun, nou bezwen travay an tim. E mon asir ou ki tre byento mwan, ensi ki tou sa bann lezot dimoun konsernen, sa bann lazans, sa bann lezot Minister, nou pou vin en sel kou. Nou pa pou sakenn vin pou li, akoz la mon vwar i pa anmenn gran keksoz.

Nou ava organize, nou ava planifye, nou tou nou a vin ansanm ki nou ava diskite e *espérons* ki en solisyon amikal e konvenab i ganny finalize. Mersi Onorab.

MR SPEAKER

Mersi Minis. Onorab Audrey Vidot.

HON AUDREY VIDOT

Mersi pou donn mwan laparol Mr Speaker. Mr Speaker, mon kestyon pou Minis. Minis mon bann koleg lo lot kote latab parey Onorab Sandy Arissol i enn parmi bann ki'n anmenn en lager asarnen an referans avek annou valoriz bann Manm Elekte dan zot distrik.

E mon pou siport son lager ki i ti fer akoz dan sizyem Lasanble osi tou nou ti tom dakor lo la. E dan setyenm osi mon pou fer parey. So, mon kestyon. Eski nou kapab ganny ou lasirans ki Gouvernman pou pratik sa ki zot prese? E la mon pe fer referans lo sa bann novo lapros ki ou'n mansyonnen. Kot bann Manm Elekte pou ganny respekte e si i annan okenn vizit ki swa dan zot distrik, oubyen en proze oubyen devlopman ki lo zot rezyon, ki tou sa bann *MNA* Elekte pou ganny envite e pou partisipe.

E osi okenn let parey Prezidan Larepublik in pronons son lekor lo la, kot si i konsern sa *MNA* Elekte, ki pa repet okenn gro problem parey in dir, en pti fot. En gro fot plito mon kapab dir, kot dan plas sa

Manm Elekte ki ganny sa let, en Manm Proporsyonnel ki gannyen.

So, eski ou kapab donn nou lasirans ki sa bann tel fot pa pou repet ankor. E osi ou'n koz lo bann desizyon ki bann *MNA* Elekte avek zot *DA* zot pou annan plis konsiltasyon pou zot fer an referans avek lakaz, avek later si mon'n konpran ou byen. Prenon kont ki Minister ti deza annan en Polisi *point system*, eski mon konpran poudir sa Minister osi, nouveau Minis in dir ki sa sistenm pwen i bon petet i annan serten azisteman ankor ki pou ganny fer.

Eski dan sa laliny, lo ou prononsman ki ou'n fer ek nou ozordi, sa bann nouveau rekomandasyon ki ou pe dir, se ki *MNA* avek *DA* osi pou asiz lo sa *panel* ki egziste pou okenn alokasyon ki tou zabitan sa distrik, respektif? Si ou kapab donn nou leklersisman lo la. Mersi.

MR SPEAKER

Mersi Onorab. Minis.

MR SPEAKER

Mersi Onorab. Mersi Mr Speaker. Onorab ou kapab zis klarifye mwan en pti kou sa *point system* ki ou'n mansyonnen. Dan ki konteks ki ou'n met li.

HON AUDREY VIDOT

Land point system ek *housing point system*. Avan sa *DA* ek *MNA* pa ti asiz lo sa *panel* pou fer alokasyon. Eski dan ou larepons ki ou'n dir, anliny avek sa i pou antre ladan. Mon pe demann mon kestyon lot kote latab, ekoute.

MR SPEAKER

Wi, demann ou kestyon Onorab.

HON AUDREY VIDOT

Eski ou pe dir nou la, baze lo sa ki ou'n koz lo la, eski ou pe dir ki an konsiltasyon avek ou Minister, avek later ek lakaz, *MNA* ek *DA* pou asiz lo la e dan sa laliny parey ou'n dir, pa met politik ladan. Eski nou pe re entrodwi politik, bann desizyon an term ki si sa 2 dimoun i asiz lo sa komite. Mon oule en leklersisman. Mersi.

MINISTER ROSE-MARIE HOAREAU

Mersi Onorab. Mersi Mr Speaker. *Ok*, mon krwar la pou fer keksoz kler nou pou bezwen petet kot Minister, an vi ki i en novo komansman, en novo fason fer keksoz. Petet avek konsiltasyon bann *MNAs* ek bann *DAs*, petet nou devret komans met en petet en

sistem protokol an plas. Ler mon dir protokol, savedir koman nou pou fer keksoz a parti preznan.

Mon pa etonnen si par egzanp keksoz pa pe deroul mannyer nou'n ou oule li i deroule, koman sa novo ladministrasyon. Mon pa etonnen, akoz bann labitud lontan i ankor la petet. Me selman ler nou'n etablir en *Term of Reference*, en protokol antre zot, i pa bezwen en keksoz ki en syantis i bezwen vin konpoze.

Me selman en lantant, en keksoz parey en bon lantant, nou annan en protokol ki mannyer keksoz pou deroule e ler konmsi i ava'n formalize, personn pa pou kapab dir, be mon pa ti konnen preznan i devret fer koumsa. Nou tou nou a konnen lo ki paz nou ete. E nou tou nou a konnen koman nou devret kominike ek kanmarad.

Apre osi mon santi dan mon bann konversasyon ek bann *DAs* e petet zot osi zot in kapab eksperyans sa koman bann endividylel dan zot distrik, en keksoz ki bann *DAs* in fer resorti dan mon bann konversasyon avek zot, se ki zot santi parfwa bann lazans, mon kapab dir bann lasosyasyon *external* i kapab petet en

Minister, i kapab petet en lazans. Petet sa bann dimoun zot pa planifye boner, prezan en pti kou ou ganny dir vin en *workshop*, vin en *meeting*, vin isi, vin laba. San prenon an kont ki pete sa *DA* ouswa sa *MNA* sa zour i deza annan en programm son travay.

Alor, mon krwar planifikasyon i en keksoz ki tou Minister, tou lazans i devret komans korpere ansanm. *Unless* i en *emergency*, *unless* i en keksoz ki fek deroule la. Me si nou konnen nou anvi tel keksoz devlope dan nou distrik pandan sa lannen, annou planifye. E annou planifye ansanm ki personn pa absante ler desizyon pe ganny fer.

Parfwa si keksoz i ganny fer akoz nou pa'n planifye, kan nou ti'n kapab planifye li, vvar la kot dimoun i ganny kit deryer, dimoun pa la pou met son bout, pou li osi met son pwen. Mon krwar *it's a lot to do* avek *planning*. *Planning ahead*. Annou *plan* byen boner, annou konsilte.

Annou met, mon krwar petet nou pou bezwen fer en *workshop* osi pou bann *DAs* e ki nou ava *share* ek zot petet evantyelman *the contents* ki koman *to go forward*. So zot pa ava mars lo lipye kanmarad. E fransman dir, mon pa konpran

ki mannyer 2 adilt, zot bezwen kapab kominike pour byennet zot distrik.

So, annou pran li dan en nouveau lespri. Annou pran li dan en lespri komunikasyon. Parey mon'n dir politik i ganny fer isi dan sa Lasamble, le moman ki zot ariv lo teren kominoter, lo teren zot distrik, annou sey travay ansanm pou byennet nou sitwayen. E se pour kwa osi mon'n lans lapel avek bann dimoun dan distrik osi. Zot osi vin zwe zot rol. *MNA* ek *DA* pa kapab toultan fer tou keksoz. Annou zot osi met zefor ansanm ki finalman distrik i a devlope, distrik i ganny sa ki i bezwen. Mon krwar dan sa lantant koumsa, *going forward* mon pran ou pwen byen serye and sertennman mon pou pran li an konsiderasyon.

Me lo pwen lakaz i vin parey. Lo tou keksoz zot bezwen negosye. I *mean*, si zot dan en distrik, zot zabitan, zot annan en zabitan, zot annan en keksoz an komen koman *DA* ek *MNA*. En keksoz ki zot annan zot tou an komen se zot zabitan. So, ler nou koz lakaz, ler nou koz lasistans sosyal, nou bezwen get nou dimoun. Me ankor, nou bezwen get li lo merit. Alor i enportan ki zot travay ansanm lo baz lakaz, lo baz lasistans sosyal, lo baz

emergency help. Tou sa ki vini, tou sa ki deroule dan distrik i enportan ki zot realize zot annan en keksoz an komen, e sa keksoz se sa dimoun dan distrik ki pe espekte zot ki DA, ki MNA vin anver li avek en solisyon pou sa ki li in anmenn devan zot. Mersi Mr Speaker. Mersi Onorab.

MR SPEAKER

Mersi Minis, a sa pwen i reste mwan 9 dimoun lo lalis, e me selman mwan mon krwar nou bezwen *adjourn* a se pwen e alors mon pou demande si Minis i kapab re zwenn nou apre midi 3er. Parey mon'n dir tou bann *meeting* Komite in ganny anvoye par en demi erdtan, alors nou kapab re pran la e *meeting* ki mwan mon *Chair, ABC* i a *meet* 1.45. Alors nou *adjourned* e nou a re pran 3er. Minis ek zot delegasyon mon a dir zot mersi bokou pour lemoman. *Adjourn.*

(BREAK)

MR SPEAKER

Bonn apre midi Minis ek ou delegasyon, bonn apre midi bann Manm Onorab e telespektater. Nou a kontinyen avek kestyion pou Minis.

E mon pou frenm lalis ki mon annan la. E nou a pran

bann Manm ki li in deza lev zot lanmen. Mon a komans avek Onorab Rosie Bistoquet.

HON ROSIE BISTOQUET

Mr Speaker mwan mon ti lev mon lanmen taler pou mwan demann en *point of order*. Akoz mon non ti ganny mansyonnen konsernan en zafer vizit Pointe Larue. Avek, mon pe demann en *point of order*. Pou mwan clarify sa pwen Mr Speaker.

MR SPEAKER

Onorab Bistoquet ou kapab zis fer en pti *statement* zis pou klarifye pozisyon si ou oule. Me selman annou pa antre dan en deba lo la. Silvouple *briefly*.

HON ROSIE BISTOQUET

Akoz Minis mon krwar ti koz lo la, prezan mwan mon ti oule klarifye.

MR SPEAKER

Please.

HON ROSIE BISTOQUET

Mwan mon ti pe, vre ti annan en vizit Pointe Larue. Be selman sa ki mwan mon annan pou dir, si Manm Elekti i asize dan lakour i esper problem ki en Manm Proporsyonnel pe travay lo la,

(Interruption)

HON ROSIE BISTOQUET

Mon pa ankor fini. Mon pa ankor fini.

MR SPEAKER

Eskiz mon, eskiz mwan Onorab. Mon pe demann ou annou pa antre dan en *polemic* diskisyon.

HON ROSIE BISTOQUET

Ok Mr Speaker vre ti annan sa vizit Pointe Larue, mon ti enform DA, mon ti dir enform Onorab Gabriel. Mon pa konnen si ti enform la si pa ti enform li. Selman vizit ti ganny fer. Mon pa'n war li lo site. Mersi Mr Speaker.

MR SPEAKER

Mersi Onorab. Mon ava apel Onorab Michel Roucou.

HON MICHEL ROUCOU

Mersi Mr Speaker. Bonn apre midi a tous. Mr Speaker, eski Minis i kapab dir avek nou Lasanble, kan ki travay pou komanse lo bann lofis ki'n fini ganny idantifye?

E osi si Minis i kapab dir avek nou lekel bann Manm ki pou asiz lo sa *panel* ki pou *interview* bann DA? Mersi.

MR SPEAKER

Mersi Onorab. Minis.

MINISTER ROSE-MARIE HOAREAU

Bonn apre midi a tous. Mersi Onorab, mersi Mr Speaker. Onorab ki mon kapab dir ou, se ki, parey mon'n dir bomaten, bann teknisyen ek tou bann dimoun konsernen i deza lo sa travay.

Nou deza pe fer, en parey ou kapab dir, en *planning* pou ou regarde kote ki nou pou priyorite, ki kantite dimoun ki pou *get involve*. Si nou pou bezwen annan diferan kontrakter *doing the same, you know different things at the same time*. So sa mon kapab garanti ou i lo nou lalis priyorite. Mon pa pou kapab la size donn ou en *deadline*.

Parske i *involve* bann *third parties* osi ki nou, nou bezwen al rode pou vin fer sa travay, ok? Me selman konnen poudir nou pe travay lo la e i en priyorite, *right?*

Secondly, sa *panel* ki pou *interview* bann aplikan pou bann pozisyon DA. Byensir i pou annan bann dimoun HR, i pou annan mwan menm e lezot, petet 2, ou 3 dimoun ki nou pa ankor deside lekel.

Me selman i pou annan en *panel* ki pou kouver diferan keksoz ki normalman lo en

Board Interview i annan. I pa pou en keksoz premye fwa i arive. Mon'n fer *interviews* bokou fwa dan mon bann karyer presedan.

So mon a *set up* en *panel* ki mon konnen i pou efikas. E mon konnen ki ansanm nou ava kapab *come to a decision* lekel ki meyer kandida. Mersi Onorab. Mersi.

MR SPEAKER

Mersi Minis. Onorab Kelly Samynadin.

HON KELLY SAMYNADIN

Mersi Mr Speaker. Minis mon kestyon i swivan. Koman *MNA Elekte* pou distrik Au Cap. Mon'n ganny ofer en lofis an deor Biro Ladministrasyon Distrik, dan en *hall* ki'n ganny *renovate*, ki'n fek ganny *renovate*.

Mon kestyon i eski i pa posib pou tonm dan en negosyasyon avek *DA* distrik, ok. Vi ki li ki ti ofer mwan sa, ki ti fer sa propozisyon. Pou ki en lot dimoun ki pe deza okip en lofis dan sa Biro *DA* i ava al okip sa lofis ki mwan mon'n ganny ofer, e mwan mon ava baze dan Biro Ladministrasyon Distrik. Eski sa i pa posib? Mersi.

MR SPEAKER

Mersi Onorab. Minis.

MINISTER ROSE-MARIE HOAREAU

Mersi Onorab, mersi Mr Speaker. Onorab mon krwar sa osi i en ka kot mon pou bezwen vin sirplas e regard zot de *DA*, fer en konversasyon ant ou, *DA*, mwan menm ek bann dimoun konsernen.

So annou fer sa koman en keksoz ki nou pou fer, en apwentman. Annou fer en apwentman. Pou nou kapab vin regarde amikalman ki nou kapab ofer, ki nou kapab sizere e ki finalman pozisyon zot a pran antre zot 2. Mersi Mr Speaker.

MR SPEAKER

Mersi. Onorab Sebastien Pillay ou non i lo mon lalis.

HON SEBASTIEN PILLAY

Mersi Mr Speaker. Mr Speaker pandan bann respons ki Minis in donn nou, Minis in dir nou ki i annan en prosesia adaptasyon, akoz i annan en fason fer lepase. Ki dapre Minis nou bezwen retire.

Me mon ti oule Minis i konpran ki lespri mon kestyon i zisteman pou nou anpes sa bann fason fer lepase. Akoz nou pe rapidman al ver sa kalite fason fer.

So mon kestyon pou ou se ki apre ki bann *MNA* i pare pou dir Gouvernman i oule *forge ahead* avek sa plan, apre ki Gouvernman pou'n fini donn zot bann lofis, nou bezwen ekspekte ki poudir bann *DA* zot *executive branch of government* dan sa biro. Bann *MNA* i pa *executive branch* dan sa biro.

So kestyon ki ou pa ankor reponn Minis, se ki mannyer ou pou *draw a line*, desinen laliny pou fer ki ou Minister ki bezwen enplimante, egzekiter e *MNA* ki li i bezwen fer *oversight*. Nou pa vwar nou dan en sityasyon kot sa ki pe fer *oversight* li menm pe form parti prenon legzekisyon. E prezan lekel ki pou fer *oversight* lo sa ki sipoze fer legzekisyon? Mersi Mr Speaker. *I hope* Minis in konpran mon kestyon.

MR SPEAKER

Mersi Onorab. Wi Minis.

MINISTER ROSE-MARIE HOAREAU

Mersi Onorab. Mersi Mr Speaker, *ok*. Mon krwar mon bezwen eksplik en pti pe ki mon oule dir ler nou pe pas dan en peryod tranzisyon ki keksoz pou ganny fer diferan.

Mon krwar i enportan ki nou konpran poudir, pa tou keksoz avan le 24 Oktob ki'n

ganny fer dan *DA* ki mal. Mwan mon pwennvi koman Minister, Minis pou *Local Government and Zafer Kominoter*.

E sa i toulstan mon fason travay. Mwan, mon'n fer sa bann *DA* byen, tou *DAs* byen kler ki nou pou annan en striktir travay. Nou pou annan en, bann, zot pou gannyen byen klerman zot gidans lo ki zot rol, ki nou ekspekte de zot.

E menm zot pou bezwen al anver zot bann zabitan dan kominote, pou petet komans re edik bann zabitan ki pa tou keksoz ki *DA* ki responsab dan distrik.

Alor, mwan mon en dimoun ki travay dan en fason byen kler, ki tou dimoun i konpran ki nou lobzektif. Alor, mon pou dir sa ki in ganny fer byen dan lepase, nou pou konsolid lo la.

Bann febles ki petet ti a pe met retar dan bann demars, sa nou pou travay lo la e nou pou vir li pou fer li vin en keksoz ki pou mars byen finalman.

Akoz ou pa kapab zis dir tou keksoz pou mal, ouswa tou keksoz pou byen. Byensir i pou annan en pe keksoz ki pou mal, pou annan en pe keksoz ki pou byen.

Alor sa ki byen nou ranforsi lo la, sa ki annan febles nou gete ki mannyer nou kapab

retir sa febles dan en fason ou en lot. Si sa dimoun i bezwen ganny en pe lesplikasyon ki mannyer nouvo sistem travay pou ete, nou ava asize nou ava koze. Me selman nou bezwen *at the end of the day* konpran nou tou nou adilt.

E ler nou'n dir wi, nou'n konpran ki mannyer nou pou kapab, nou pou travay *from hereon*, mon espere ki zot in konpran e sa ki zot vin dir mwan i pa si ki mon anvi antann me sa ki zot pe al fer.

So once mon krwar nou'n etablir sa, pou annan bann metod disiplin ki pou ganny entrodwir. Pou annan, *feedback*, i enportan. Akoz lekel ki pou donn *feedback* lo an DA ouswa lo en MNA si i pe byen *behave*, si i pe mal *behave*?

Se zot bann zabitan, zot bann dimoun dan distrik. So ler nou ganny bann bon komanter, bann bokou komanter pozitiv, nou konpran poudir keksoz pe marse.

Me ler nou tande poudir keksoz pa pe marse, byensir nou pa pou zis sot anler dir wi lala pa pe marse. Nou pa gete si i vre, apre bann keksoz ki devret ganny fer i ganny fer pou met li lo semen drwat.

Sa mon krwar nou tou adilt nou tou nou bezwen

konpran poudir sa i en realite e koumsa ki pou marse.

Ler mwan, konmsi annan de ler, ler mon tann zot koz garanti, nou oule Minis i garanti, nou oule Minis i garanti. Minis pa kapab garanti nanryen ki li i pa *100 percent* responsab par son personnalite, son karakter, son travay.

Mwan mon kapab zis ale. Met zot bann lenkyetid devan sa bann dimoun konsernen, ki DA, ki MNA, met zot bann lenkyetid pou dir Lasamble in dir mon tel keksoz.

I paret i annan en problem e i paret petet i annan en persepsyon, ouswa paret i vre i annan en problem. Annou sey rezourd pou nou fer Lasamble konpran poudir tel keksoz i tel mannyer.

It's really en, tou dimoun i annan son sans responsabilite. I pa normal pou mwan vin garanti *behavior* en lot dimoun. Sa dimoun i bezwen konpran son lobzekatif. I bezwen konnen akoz i la, e i bezwen konnen ki fason travay ki nou demann li pou travay.

E la mon a byen fyel pou mon vin rapport ek Lasamble poudir isi 3 mwan bann dimoun in komans konpran, keksoz pe komans roul byen e nou pa pe *hit tro* bokou sa bann *speed*

bumps. So, annou espere pou dir i deroul koumsa.

How do you draw the line?
Again, ou *draw the line*, ou tir ou laliny par fer tou keksoz kler. Mon apresye, akoz menm ler mon koz ek sa bann, mon'n koz ek, mon'n rankontre bann DAs. I annan en kantite laliny ki zot osi pa konnen kot i komanse, kot i fini. E en kote mon pran par dan zot lapenn.

Parske ki mannyer nou ekspekte zot, koman dir, *be productive* si zot menm zot, zot pa konnen kot sa i komanse, kote i fini, kot sa bout i pran, kot sa bout i fini?

Be i en legzersis ki nou pa pou kapab fer dan 3 zour. Me krwar mwan poudir mon Minister pe pran tou sa bann lenkyetid bann DA. La ozordi mon'n antann tou bann lenkyetid bann MNAs.

E i byen ki mon'n ganny *both side*, tou lede kote, tou zot bann konsern, ki mannyer zot war nou pou bouz devan. I byen. Akoz, e mon kontan mon'n fini war laplipar bann DAs avan mwan vin la.

Akoz in donn mon en bon *oversight* lo kwa ki pase dan distrik e menm fotespere mon ganny zot sipor ki mannyer osi nou kapab ed sa bann DAs tir en pe presyon lo zot.

Akoz annan de ler nou bann zabitan distrik i vreman, vreman egzizan. So nou bezwen travay ansanm pou fer plezir nou zabitan.

Me selman nou osi koman 2 group dimoun profesyonnel, DAs *ek MNAs*, nou bezwen ansanm pran sa nouveau fason fer keksoz pozitivman, ki nou kapab bouz devan ansanm pou benefis nou bann dimoun dan distrik. Mersi Mr Speaker.

MR SPEAKER

Klarifikasiyon.

HON SEBASTIEN PILLAY

Mersi Mr Speaker pou *allow* mwan sa pti klarifikasiyon. Mon ti a kontan demann Minis, enn bann eleman enportan ou Minister, se *service delivery* lo baz kominoter.

E napa en MNA ki'n retournen la, ki'n deza *seat* koman MNA, ki pa pou dir ou poudir sa i en defayans. I pa en *issue* en biro, i pa en *issue* zot dan sa landrwa. Me i pou en keksoz ki annan pou fer ek *service delivery*.

Prezan ou pe entrodwir sa 2 dimoun dan menm landrwa. E ou'n koz mwan lo *oversight* ki pou ganny fer lo sa dimoun. Lefe ki Prezidan in dir nou bann

let ki i pou gannyen i pou anvoy
kot sa MNA.

Mon kestyon pou ou prezan i vin koumsa, ki mannyer ou Minister pou fer tou son posib pou li protez l'entegrite *service delivery* ou Minister, e non pa les li al dan en direksyon kot i annan plis konfizyon dan rol ki le de dimoun pou bezwen zwe par lefe ki zot pou okip menm lofis. Mon pou sit ou detrwa legzanp. Pa ki mon pe pik lo sa ki bann Manm in dir, me nou vwar plizyer Manm pe dir ou mon oule lofis dan tel fason.

Me sa i en *prerogative* Egzekitif pou deside. *Already* nou pe *confuse* rol ki Egzekitiv e Lezislatif i bezwen zwe, dan en landrwa kot zot sipoze koegziste.

So eski ou pe met an plas en sistenm, kot ou pou *allow* ou bann dimoun pou kapab vreman vin devan, e dir poudir la tyonbo en kou, i paret poudir i annan en lenterferans direk dan mon travay ki mon pe fer, *as oppose to* sa dimoun li menm ki ansarz ki ganny dir lo li. Par lefe ki rapor sorti kot Prezidan pe vin kot li.

So, ou konpran poudir sa konfizyon i bezwen ganny adrese. E se sa kot i annan konsern. E sa kot mon pe dir ou poudir dan lepase ti

koumsa, in annan en gran travay pou retire.

E prezan nou pe reentrodwir li ankor, nou pe reentrodwir li ankor. E mon konnen lo lot kote zot pa pe realiz sa. Me nou pe reentrodwir li e i pou retournen i pou vin en problem. Solman mon pe zis antisipe ki ou Minister pou fer dan sa sityasyon?

MR SPEAKER

Mersi Onorab. Minis.

MINISTER ROSE-MARIE HOAREAU

Mersi Mr Speaker, mersi Onorab. Ler ou koz *customer service delivery* la, sa i mon forte sa. Alor, mon kapab dir ou avek konfidans ki i pou annan serten mezir met an plas.

Ki *customer service delivery* dan bann distrik i pa ganny bare, i pa ganny an met an retar, ouswa i pa ganny difikilte akoz bann personnalite imen, ouswa bann demann imen ki vir, vir dan sa distrik, i vir dan sa *building*, ki travay dan sa *building*.

Mon krwar, *again it goes back to* lo sa pwen klarite. Fodre keksoz i kler. Mon krwar nou bezwen donn en pe kredi sa bann DA ki ler nou pou'n donn zot en lobzektif ek en keksoz

ki'n kler, kwa ki nou ekspekte
from the Ministry avek zot.

Mon krwar nou bezwen donn zot en sans pou *prove* zot lekor. Byensir, parey mon'n dir, apre 43an i pou pran en pti pe letan, pou annan bann ki pou petet i pou en pti pe pli teti.

E sa pa zis pou *DA*, sa pou tou imen. So, annou dir ki *clear* direktiv, bann direktiv byen kler i a ganny donnen, bann lobzektif byen ler i a ganny donnen.

E menm zot bann Onorab o tour dan sa Lasanble, zot osi zot, mon pa bezwen dir zot. Zot konnen kote zot rol i komanse e kote ki i fini. E mon'n *cover* sa en pti pe dan mon bann larepons bomaten.

Me selman mon krwar Onorab Pillay, annan konfyans ki pou, nou pou met keksoz an plas pou fer lavi tou dimoun fasil.

Akoz ler bann lobzektif i kler, ler bann standar in ganny met lo latab e i kler, i pli fasil pou dimoun desarz son *duties*. I pli fasil pou en dimoun konnen, poudir be la mon konnen mon dan mon teritwar, mon annan mon drwa, se mon ki pe pran sa desizyon.

Mon ava, si mon krwar, mon santi poudir mon pou benefisyé avek *impute* en *MNA or vice versa*. Si zot, zot santi

zot pou benefis avek *impute* zot *DA*, i retourn lo sa pwen ki nou bezwen travay ansanm koman en tim e se sa ki pou fer ladiferans. E mon krwar se sa nouvo lapros ki sa nouvo ladministrasyon, sa nouvo Gouvernman i oule met an plas, sa *open mindedness*.

Kominikasyon dan 2 kote, tou lede kote nou kominike. E finalman nou pou tonm lo en dakor. Pa toultan ki zot pou *agree a 100 percent*.

Me selman i pou arriv de ka kot zot pou bezwen *agree to disagree* e met en konpromi ki sa sitwayen i ganny sa ki in vin rode. E sa i pa zis dan politik sa, i pa zis dan Gouvernman, i pa zis dan biro *DAs or whatever*.

Sa i partou. Dan tou lakonpannyen ki en sikse, i annan sa kalite *approach to customer service delivery*. Met nou bann keksoz personnel de kote, annou konsantre lo kliyan. E sa kliyan se zot bann dimoun dan zot distrik. Mersi Mr Speaker. Mersi Onorab.

MR SPEAKER

Mersi Minis. Nou a *move on*. Onorab Naddy Zialor.

MR SPEAKER

Mersi. Onorab Naddy Zialor.

HON NADDY ZIALOR

Mersi Mr Speaker. Bonn apre midi. Avek ou permision Mr Speaker, mon annan en plizoumwen en rekmandasyon dan plas en kestyon. Si ou permet mwan. Baze lo sa ki Onorab Henrie in dir bomaten. Minis.

MR SPEAKER

Si ou kapab fer li bref silvouple.

HON NADDY ZIALOR

Yes. Baze lo sa, e baze lo larepons ki ou pe donnen. Petet en rekmandasyon ki mwan mon ti a sizere la dan limedya, par lefe ki ler ou ekout bann Manm, in annan diferan direktiv dan lepase ki'n ganny donnen par diferan Ladministrasyon Distrik.

So petet sa ki nou merit annan la a ler aktyel, se annan en SOP, en prosedir standar, *across the board* kot tou DA i a konnen egzakteman ki zot merit pe fer dan sa letan tranzisyon, ki nou pe antre ladan pandan ki tou keksoz i fini ganny met an plas. Mersi Mr Speaker.

MR SPEAKER

Mersi Onorab. Onorab Sathya Naidu.

HON SATHYA NAIDU

Bonn apre midi Mr Speaker. bonn apre midi Minis. Mon

dakor ki nou bezwen *start fresh*. E tou dimoun a sa ki konsern Ladministrasyon Distrik, pou ganny en dezyenm sans. Me nou bezwen realize pou nou tir politik en fwa pou tou dan Ladministrasyon Distrik, fodre ki i annan en prosesis *interview* kot tou bann *existing DAs* osi i pas ladan.

Mon napa naryen mal kont mon oponan ki ti debout kont mwan dan sa eleksyon pase. Me dan ka St Louis i tre evidan ki DA in toultan en zouti politik. Alors mon annan sa lenkyetid. E mon demande si pou posib pou Minis rekonsider son pozisyon lo prosesis *interview*? Sa i enkli pou bann *existing DAs*.

Mon dezyenm kestyon se, kan eski bann MNAs ki'n fini idantifye zot Lofis dan Ladministrasyon Distrik pou kapab bouz lo en baz ofisyel? Mon santi ki otan ki bann MNAs ki'n fini i idantifye zot lofis, zot in bouz anndan dan Ladministrasyon Distrik, nou pou kapab ed ou Minister *sort out* bann defi ki bann Biro Ladministrasyon Distrik pe fer fas avek ozordi zour. Mersi.

MR SPEAKER

Mersi Onorab. Minis.

MINISTER **ROSE-MARIE**
HOAREAU

Mersi Mr Speaker. Mersi Onorab. Onorab, mon kapab dir ou ki ou sizesyon, ou propozisyon in ganny note. A se moman la mon pa dan en pozisyon pou mwan fer okenn komanter lo la, ni an byen, ni an mal. Me zis pou mwan dir ou, ou konsern, ou propozisyon, ou sizesyon in ganny note. E nou a retourn anver Lasanble pli tar avek en *the way forward* ki nou pou pran.

Dezyenmman, napa naryen ki anpes zot, si zot in fini tonm dan en lakor avek zot DA, pou kapab antre. Plas in ganny idantifye, tou keksoz i annord, napa naryen ki anpes zot rantre, e komans zot travay. Me selman ki mon ti a demann zot, se zis fer nou Minister konnen ler zot in antre. Akoz la *at least* nou a kapab kit en *record of* lekel ki'n antre, lekel ki pa ankor antre, lekel ki ankor pe rod 2 sez ou 3 latab, e keksoz koumsa.

So zis gard nou okouran ler zot in antre. Akoz vreman napa en dat ofisyel. *It is*, osito ki zot, tou zot kestyon in ganny reponn, tou zot bann komunikasyon in ganny fer, Lagreman in ganny arive, fini

fer, antre e nou komans travay. Mersi Onorab.

MR SPEAKER

Mersi Minis. Onorab Pillay. Ou pe met nou bokou retar.

HON SEBASTIEN PILLAY

Mr Speaker, *sorry* mon pa pe met ou retar, be selman sa kestyon ki'n vini ler nou get Lartik 23 nou Konstitisyon Mr Speaker, sa kestyon i al kontrent avek Lartik 23 nou Konstitisyon.

Nou'n ganny en *MNA* ki'n demann avek en Minis pou rekonsider pozisyon en dimoun lo baz en *interview*, akoz serten afilyasyon politik. Mon krwar Minis in fer kler ki i annan en prosesis ki pe fer. E mon krwar ki Lasanble, en kestyon ki sorti kot en Manm ki al direkteman ver en *infringement* of Lartik 23, ki en drwa fondamantal ki en dimoun i annan, lasanble i bezwen dir poudir i pa permet sa bann kalite kestyon.

E mon ti a kontan ki Onorab. E Onorab i devret konn sa, i konn sa tre byen li. Akoz i en dimoun ki konpran Lalwa. E Lartik 24 nou Konstitisyon osi i fer kler sa. So, mon krwar ti ava byen ki

MR SPEAKER

Ki Lartik 23 i dir nou silvouple?

HON SEBASTIEN PILLAY

“Every person has a right to freedom of peaceful assembly and association.”

MR SPEAKER

Ok.

HON SEBASTIEN PILLAY

Mon krwar nou mazinen, non?
I kler sa non?

MR SPEAKER

Mersi.

HON SEBASTIEN PILLAY

‘Sesel pou tou son Zanfan’ Mr Speaker.

MR SPEAKER

Mersi Onorab.

HON SEBASTIEN PILLAY

Mersi Mr Speaker.

MR SPEAKER

Minis dan ou bann deliberasyon ou a rapel Lartik 23 silvouple. Onorab Norbert Loizeau.

MR SPEAKER

Ou ankor annan kestyon?
Mersi. Onorab Georges ou dernyen dimoun lo mon lalis.
Mersi.

HON BERNARD GEORGES

Mersi Mr Speaker. Mr Speaker permet mwan pou dir ki lontan sa ki nou pe tandé la ozordi, bokou nou, nou pe espere tandé. Akoz sa ki ti pe pase dan bann biro distrik, apre midi nou'n aprann. Anfen bomaten ek apre midi nou'n aprann en kantite keksoz.

Par egzanp, e apre mon ava, ou a permet mwan Mr Speaker, par egzanp, ou annan ou en sistem, e nou pou bezwen konpran sa sistem mannyer i ti ete. Pou nou konpran ki mannyer i pou kapab ganny sanze. E ki mannyer kestyon Onorab Kelly Samynadin i kapab ganny reponn, an sa ki konsern sa nouvo konsep travay.

E mon ti a kontan prefas mon kestyon koumsa. I kler ki Biro Ladministrasyon Distrik pa ti zis en brans *civil service*, ki ti pe delivre en servis dan bann distrik. Me i ti plito, e sirtou en zouti politik pou ki sa parti o pouvwar ti pe fer zot travay.

(APPLAUSE)

HON BERNARD GEORGES

E si nou konpran sa, nou ava konpran egzakteman fristrasyon bann dimoun ki lo mon kote latab pandan bokou lannen. Me mon bezwen dir, nou pa kapab dir, “one size fits

all." I annan serten *DA* ki ti travay tre byen avek zot *MNA*. E i annan en bann, parey Onorab Loizeau ki'n dir ozordi. Ki pa ni kapab koze ek kanmarad, *let alone* travay.

Alor si nou konpran. Mwan par egzanz dan mon distrik, toulstan mon dir, mon *DA* i fer tou sa ki i kapab fer pou anpes mwan ganny eleksyon. Be lemoman ki mon'n gannyen, i travay avek mwan pou sa 5an ki vini. E donk se koumsa ki ou bezwen viv larealite.

Sa ki nou anvi, e sa ki mon krwar Minis pe anmennen, e Minis ou ava konfirmen si sa i leka. Sa ki Onorab Kelly Samynadin pe demann ou, se eski nou pe vwar en sistenm, sa sistenm sanze pou vin en sistenm kot sa *MNA* avek sa *DA*, i ava kapab travay ansanm dan zot distrik?

Pa enn ki pou ansarz lot, pa lot ki pou ansarz lot. Me 2 dimoun ki pe travay ansanm pou byennet zot sitwayen. Bann dimoun ki'n vot pou nou. Akoz tou lede i annan en par ladan. Egzekitiv i annan en par ladan, e lezislatif i annan en par ladan.

Me kot mon krwar, permet mwan pou demann ou kestyon dan sa fason Minis, kot mon krwar nou'n fer en fot, dan lafason ki nou'n abord sa size. Se ki nou pe regard sa 2

dimoun pe travay kont kanmarad, me anmenn tan an kolaborasyon. Se pa koumsa mon krwar ki nou vwar sityasyon.

Sistennmannyer i sipoze ete, se ki tou lede dan zot diferan konteks pe travay ver menm bi. E mon pa kontan ler mon tande ki *MNA* pou vin kontrol *DA*, e *DA* pou bezwen sibir sa ki *MNA* in dir. Akoz mon konnen ki si *MNA* i sey fer sa, *DA* pou al konplent avek zot Minis. E Minis pou defann *DA*, si i vre sa ki *DA* pe fer. *MNA* pe met presyon lo li.

Alor i a en kestyon enn ki pou met presyon lo lot, oubyen lot ki pou met presyon lo lot. Me tou lede pou travay dan en fason kolaboratif. Alors mon kestyon se sa, Mr Speaker. mon kestyon pou Minis se sa, eski sa bann facilite, si nou'n konpran fason travay dan en fason kolaboratif, eski bann facilite *DA*, bann facilite distrik. tel parey Sant Kominoter, tel parey sa dimoun ki ansarz sport, oubyen sa dimoun ki ansarz sosyal, eski zot, zot pou bann dimoun politik? Oubyen eski zot bann dimoun ki pa politik?

E eski *MNA* pou ganny drwa donk servi sa bann facilite dan distrik, tel parey *DA* avek parti ki ti o pouvwar ziska le 24

Oktob ti servi? Se sa kestyon ki mwan mon anvi konnen.

Si mon anvi fer en *meeting* avek bann zabitan Les Mamelles pou koz avek zot lo zot *daycare*, ki mon pou vin vwar ou byento Mrs Vidot, *ex* Mrs Vidot, *PS* i konn tre byen, kote mon pou fer sa *meeting*? Eski mon pou ganny drwa fer li dan Sant Kominoter anba sa novo sistenm? Oubyen eski mon pou bezwen al rod en lasal *somewhere else* pou mwan kapab fer li? E les Sant Kominoter zis pou ler *DA* i anvi fer en rankont.

Se sa mon krwar kestyon ki mon anvi konnen dan sa novo loptik e dan sa novo fason travay ki ou, ou pe prekonize i ava enn ki nou pou fer an kolaborasyon.

Dezyenmman, alokasyon lakaz. Mwan toulstan mon'n koz avek mon *DA* lo alokasyon lakaz, e toulstan in dir mwan nou pou fer ansanm. E annefe dan sa Lasanble Minis Charlette ti dir ki *DA* avek *MNA* pou premye an lir ki pou deside lekel pou *allocate* lakaz. Ziska preznan mon pa'n kapab *allocate* en sel lakaz.

I annan 20an mon *MNA* Mamelles, en lakaz mon pa ankor *allocate* ziska preznan. *Ok?* Eski sa osi dan sa novo loptik travay, eski mon pou

annan en *say* dan sa bann keksoz ki pe ganny fer pou byennet nou zabitan dan nou distrik Minis? Mersi Mr Speaker.

MR SPEAKER

Mersi Onorab. Minis.

MINISTER **ROSE-MARIE HOAREAU**

Mersi Mr Speaker. Mersi Onorab Georges. Mon le fer li kler ki tou keksoz ki konsern en zabitan en distrik, i devret konsern tou lede, *MNA* avek *DA*. Malgre sa ki'n pase dan lepase, nou pou bezwen fer li tre kler ki *going forward* keksoz pou ganny fer diferan. E i fer mwan konmsi petet krwar poudir si bann *MNAS* and bann *DAS* pa ti pe kominike avan, sete petet akoz sa bann desizyon ki ti pe ganny fer, petet pa ti pe toulstan ganny fer baze lo merit. Me plito baze lo en lot kriter.

Me sa i lepase. Mon krwar ozordi dan sa Lasanble nou'n fer byen kler ki nou espekte de sa *DA*, e ki nou espekte de zot bann *MNA*. Mon kapab donn ou en lasirans, en komitman plito. Mon kapab donn ou en komitman Onorab Georges ki, si i annan okenn par egzanp bann lobstak ki *DAs*, nenport *DA*, pe met dan zot larout, nenport zot;- pa zis Onorab

Georges, me nenport zot. Ki nenport *DA* pe met okenn lobstak ekspre.

Okenn lobstak ekspre dan en demars ki pou afekte *customer service delivery* avek en zabitan, i zot devwar pou zot fer sa Minister *Local Government and Community Affairs* konnen. Akoz *DAs* i annan en dimoun ki zot, en *DG* ki zot raport avek, ki *over-*, ki zot *direct report*.

E ler sa bann ensidan i ava ariv kot nou Minister. Sertennman nou pou bezwen kriy sa *DA*, demann li en lesplikasyon son latitud, son lafason fer. E demann li si apre tou sa ki nou'n dir, tou sa ki nou'n eksplik ou, ou *still* pa tro, tro konpran ki ou sipoze pe fer. E en *DA*, ou en *MNA* pa la pou met en lobstak ekspre pou fer en keksoz pa marse.

Si en keksoz i arive e senpleman akoz nou pa'n vreman mazinen poudir sa pou annan en lenpak negativ, petet i a pardonab. Me ler en keksoz i vin ganny fer ekspre, sa i pa pardonab. E bann mezir disipliner, si i konsern bann *DA*, en mezir disipliner i a ganny pran from Minister *Local Government and Community Affairs*.

Apre tou i annan bann prosedir disiplin an plas. Pa

nou ki pou envante sa, i deza la. I zis petet i pa'n ganny met an plas, i pa'n ganny met an fors.

E la mon krwar pou tou dimoun ki pe ekoute, ki travay pou *Local Government and Community Affairs*. I bezwen konpran poudir sa Ladministrasyon ki la, nou pa pou tolere bann dimoun ki ekspre pe vin bar keksoz ki devret pe arive pou byennet zot zabitan.

(APPLAUSE)

MINISTER ROSE-MARIE HOAREAU

E la mon pou anmenn sa mo merit. E mon krwar se sa kriter ki tou dimoun i bezwen met *first and foremost* ler zot pe analiz nenport demann. Regard li *case-by-case* lo merit.

En lot bout kestyón Onorab Georges, se ki, si ou pe fer en *meeting to do*, pou fer avek en *meeting* en *Daycare Centre*, ki *obviously* i normal ki tou zabitan i vini, mon a bezwen al regarde si sa ki mon pe al dir la i vre, i korek.

Me selman mwan dan mon pwennvi koman en dimoun ki *practical* mon kapab dir, mon pa war akoz en *meeting* konsernan, par egzanp en size ki konsern tou dimoun, tou dimoun dan distrik ki

annan zanfan, en *daycare centre*, mon pa vwar akoz sa pa pe kapab ganny fer dan en Sant Kominoter, menm dan prezans sa DA.

So, mon krwar ankor *it is about* travay ansanm. Nou bezwen travay ansanm. E nou bezwen get keksoz lo merit. E nou bezwen get keksoz ki annou pa *complicate* lavi dimoun. Nou, nou pe lager par anndan pouse isi, pouse laba. Me selman annou travay ansanm, ki si nou pe koz lo en *daycare*, mon pa vwar akoz sa *meeting* pa kapab ganny fer dan Biro Kominoter.

Akoz i en Biro Kominoter, *daycare*, zanfan i sorti dan tou bout kominote. E sa i en *building* ki pou ganny servi pou fer bann aksyon kominoter. E sa i en keksoz ki mon krwar nou byen kapab aplodi, si i pase dan en *building* kominoter. Mersi Mr Speaker.

MR SPEAKER

Minis ou ti a kontan dir en mo lo son pwen alokasyon lakaz. Kwa ki mon pa tro konnen si i tonm anba responsabilite ou Minister. Me sa son dernyen pwen dan son kestyon. Si zot pou ganny aplike dan alokasyon lakaz?

MINISTER ROSE-MARIE HOAREAU

Mon krwar *regarding* en keksoz osi sansib ki lakaz ki tou dimoun, sa i en keksoz ki dan tou diskisyon i monte. Alokasyon lakaz, toulstan nou bezwen lakaz, i trez enportan ki le 2 Minister konsernen i *join* ansanm. Sa Minister ki responsab pou lakaz, Minister *Local Government, DAs, MNAs*.

Mon krwar nou bezwen ouver sa diskisyon en pe pli larz pou tou dimoun ki kapab annan en kontribisyon valab, vini vin kontribye dan en diskisyon avan nou deside lekel ki ganny lakaz, lekel ki pa ganny lakaz. Mersi Mr Speaker.

MR SPEAKER

Mersi Minis. Avek sa nou'n termin kestyon pou Minis Gouvernman Lokal. E mon a remersye li avek son delegasyon. E mon ava envit zot pou fer zot depar. Mersi.

(MINISTER ROSE-MARIE HOAREAU AND HER DELEGATION WAS EXCUSED FROM THE HOUSE)

MR SPEAKER

Silvouple. En pti mo lesplikasyon. Avek konsantman *Chief Whip* lo kote LDS, mon ti

aranze ki i enform, i ganny konprenezon Onorab Zialor ki nou anvoy son kestyon ki i annan, ki konsern en lot kalite size pou en sesyon prosen. Alor Onorab mon a demann ou konprenezon. Mersi.

HON NADDY ZIALOR

Ok Mr Speaker.

MR SPEAKER

E avek sa, nou ava envit Minis Lazenes, Sports e Zafer Lafanmir pou antre dan lasal silvouple.

Bonn apre midi Minis Marie-Celine Zialor. E mersi pou zwenn nou. E nou leskiz si nou'n fer ou atann en pe lontan. Premye kestyon pou Minis Zialor pou ganny demande par Onorab Terence Mondon.

HON TERENCE MONDON

Mersi Mr Speaker. Bonn apre midi Minis avek ou delegasyon. Mon kestyon: -

Eski Minis i kapab dir sa Lasamble, kwa ki pou priyorate son Minister dan sa prosen 2 a 3 mwan? Mersi Mr Speaker.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Chair. Bonn apre midi tou bann Manm Onorab. Bonn apre midi bann dimoun ki a lekout. Mersi bokou Onorab pou kestyon. Bon nou annan nou 4 priyorate ki nou'n kapab idantifye pou sa 2 a 3 mwan. Mon pou pas briyevman en pe lo la akoz nou ankor pe travay lo la. Anmezir ki nou annan plis lenformasyon nou ava kapab fer bann lanons sirtou dan medya.

Premye, nou pe travay lo restriktirasyon. Akoz restriktirasyon? Akoz i annan tro bokou *layers* dan portfolyo. Kot mon ete la nou anvi filozofi nouveau Gouvernman, se pou fer *lean management*. E apre pou nou koup depans Gouvernman dan sa pandemik kot nou ete la. E apre nou anvi bokou plis *effectiveness*. E apre nou anvi annan en pe plis lenpak.

E nou pe fer restriktirasyon sirtou ansanm avek bann teknisyen bann *Leaders* ki zot menm ki depi avan ler mon vini ti pe travay lo la. Nou, nou pe zis preznan fer li vit. En pti pe pli vitman. Ki nou ava anonse letan nou'n fini enform tou bann dimoun *internally*.

Dezyenm priyorate se nou bezwen fer transformasyon anndan. Avan ler nou al deor pou nou kapab anons serten

keksoz, mwan mon prensip personnel se ki fodre bann dimoun anndan avan i ganny en sans partisipe. Zot ganny en sans konnen ki bann prensip nouvo. E nou pe fer sirtou sanzman en pe sa kiltir ki'n egziste.

Mon a donn en pti pe plis detay zis briyevman. En kiltir nou travay en pti pe pli byen ansanm. I annan en kiltir en pti pe territoryal ki i annan la. Ou konnen sa parey nou dir an Kreol, "Sa mon 10 pye konmsi, pa bezwen vin la." Nou bezwen annan en kiltir kot nou travay en pti pe pli byen ansanm.

Nou bezwen regard en pti gin nou *governor's structure*, kot nou konnen lekel. I annan en kantite lazans, en kantite konsey dan portfolyo kot mon ete. Lekel ki responsab lekel. Kan ki nou mont lo lipye kanmarad. Ki mannyer nou organiz sa en pe. Apre nou bezwen devlop en kiltir ki i annan plis aksyon. Nou annan en pti pe tro bokou zis administrativ, *paper work*.

Nou bezwen annan en kiltir kot nou annan *performance management, performance based*. Ki annan plis *accountability*. E annou en ti pe pli ouver. Ou a krwar mon war nou, nou en pti pe tro frenmen antre nou menm. Kot

nou pa per pou fer bann konversasyon, e devlop en kiltir kot nou kapab fer bann konversasyon fran.

Konversasyon
profesyonnel kot dimoun a pran keksoz personnel. Apre pou nou devlop konversasyon kot nou kapab fer bann konversasyon difisil. E lo sa kiltir ki nou pa pran naryen personnel, e pou nou osi pa per pou nou fer keksoz. Si nou *fail*, nou kapab vini dir, "Be sa ti en fot." Apre pou nou kapab aranze.

Nou trwazyenm priorite se bann proze spesyal. Nou pe met lanfaz sirtou lo Nwel. Ou konnen an Angle nou dir *Christmas*, nou dir *Christmas*, selman nou'n tir *Christ* dan *Christmas*. Nou pe anmenn en programm la ki bann dimoun pe dir, "Ar ou konnen la napa trezyenm mwan saler. La *COVID*, i difisil. Napa Nwel. Ki Nwel?"

Nou pe re anmenn en programm kot nou pe travay lo la en kantite. Nou pe anmenn sa ver popilasyon, pou nou kapab anmenn en nouritir pou nou nanm, pa zis pou nou lekor, pa zis materyel. So nou pe *bring the Christ back in Christmas*, ek en *special project* ki pe vini.

E apre i annan bann proze ki ti egziste la depi avan. Ki nou apel sa bann *low hanging fruit*. Ki nou pe al *harvest* sa bann. Mon a donn en senp pti legzanp. Kot NSC ti annan en don ki ti'n donnent par Federasyon Enternasyonal Tenis, \$40mil. Nou pa'n kolekte depi Mars, in ekspire le 6 Septanm. Nou'n bezwen al fer CEO re negosye prezant.

Sa bann keksoz, i annan en kantite sa bann proze ki i ti napa naryen avek mank volonte li. I ti annan avek in pri dan prosedir. Prezan nou bezwen fer sa bann proze kapab ganny realize. E nou pe inisyé osi bann nouveau proze, ki kapab ganny enplimante boner lannen prosenn.

Par egzanp nou pe anmenn en proze pou nou kapab anmenn en kiltir dan fanmir. Annan bann biznes lafanmir. Parey i annan en pe dan lezot kiltir. Kot pou nou, akoz avek sa bann sityasyon ekonomik, nou pe fer dimoun pa depan lo Gouvernman. Depan lo ou lekor, e anmenn bann proze ansanm avek Departman Lantreprenarya. Ansanm avek Minister Finans.

Anmenn sa bann proze ki mon krwar i ase fasil pou nou kapab anmennen. Pou nou donn sipor. Par egzanp annan

en *incubation program* pou bann *family business* dan lagrikiltir. Par egzanp dan lapes, i annan en kantite fanmir. Kot mwan mon reste Anse Boileau ki annan bokou sa. Nou bezwen fer sa bann keksoz marse. E bann sipor osi.

E nou katriyenm priyorté dan sa 2, 3 mwan la se, pou mwan ekout piblik en pti pe plis. Vwar bann piblik, envit dimoun pou kontribye dan devlopman fanmir, devlopman spor, devlopman lazernes en pe plis. E fer sa kalite kiltir ki nou en pti pe pli pres, ki dimoun i kapab fer kontribisyon.

Vwala en pti pe Onorab nou priyorté pou sa 2, 3 mwan. Apre byensir nou bezwen al devlop en plan 5an. Li osi pandan sa 3 mwan ki vini ki nou ava koz lo la apre pli tar.

MR SPEAKER

Mersi Minis. Mon a pran detrwa Kestyon Siplementer avan nou pas lo lot kestyon. Apre nou a retournen silvouple. Zis en pti moman. *Ok.* Onorab Mondon mon a les ou met premye kestyon.

HON TERENCE MONDON

Mersi Mr Speaker. Minis mon apresye ou larepons. Mon krwar ou pe tous lesansyel.

Sirtou ler nou pe koz transformasyon bann striktir ki bezwen, ki pe mont lo kanmarad. E i annan en striktir ki *lean* nou Gouvernman. Mon kontan tann sa.

E selman an menm tan, mon konnen nou pe koz 2 mwan, a 3 mwan. Be selman dan nou distrik, nou pran distrik Takamaka par egzanp, nou bann zenn i mor, napa naryen. Napa aktivite, ni spor ki pou ekip zot. Mon ti a kontan ou ti a kapab dir nou de mo lo la. ki mannyer nou kapab fer bouze nou bann zenn, re anmenn zot dan bann lekip sportif dan distrik? En mannyer ki nou annan en kominate ki vivan ver lavenir? Mersi Mr Speaker.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Definitivman sa i parmi bann, nou pli kontrer lans lapel avek bann dimoun. I annan ki'n deza vini *come forward*. Ou konnen nou pa oule, nou le sanz sa kiltir kot tou keksoz i bezwen sorti kot Minister al anver kominate, anver piblik. Nou anvi ki dimoun zot menm zot - E mon ti fer vizit yer kot SNYC,

ankouraz bann *youth worker* pou zot dan bann distrik vin, nou'n ankouraz zot anmenn zot bann nide.

Anmenn bann keksoz ki nou kapab fer ansanm. E sa nou pou les, nou pa pou les Minis dir tou keksoz ki pou fer. Nou pou les zot deside pou zot kapab vin dir nou ki pou fer. Mersi.

MR SPEAKER

Mersi Minis. Onorab Wavel Woodcock.

HON WAVEL WOODCOCK

Mersi Mr Speaker. Minis mon kestyon i konsernan Lasanble Lazenès. Annefe sa i en konponan ase enportan kot i konsern devlopman nou zenn. Ozordi nou pe dir ki, ozordi en *big bulk of global electorate* ozordi i lazènes. E zot santi poudir zot lavwa pa pe neseserman ganny tande.

En konsern ki'n ganny souleve a plizer repriz, se kot i konsern kredibilite Lasanble Lazenès. Kot lafason ki bann Manm i ganny swazir o nivo distrik ouswa lekol, i pa ganny fer dan en fason demokratik.

So, mon kestyon i eski zot annan en plan pou reviz konponan Lasanble Lazenès? Pou lemoman i tonm anba SNYC, me selman, eski kekfwa

sa Lasanble i devret pli endepandan? Nou bezwen get li dan en lot konteks. Dan en fason ki pou donn zot plis, ki mannyer mon kapab dir sa, plis responsabilite, plis pouvwar pou pran bann desizyon ki i kapab reste en lenpak lo nivo Nasyonal osi.

E dezyenmman, lo konteks Zil Pros. Zil Pros in ganny neglize bokou dan lepase. Sirtou kot i konsern bann proze mazer. Ki ladministrasyon avan ti'n promet pou fer plizyer bann gran proze enportan. Parey *Sport Complex*, ki at one-point zot ti dir ki pou kout tro bokou. Ti pou ganny finanse par Gouvernman Lasin.

Apre in ganny *downsize* pou fer *indoor gym*. Akoz nou napa sa Praslin. Nou ankor pe zwe, bann spor i ankor pe ganny fer lo kort dan soley. E alor, eski i annan en plan stratezik pou ede devlop spor lo Praslin? E osi *water sport* ki bann *top athlete* i sorti Praslin. Ki ozordi napa ase facilite ouswa bann lekipman pou *sailing, wind surfing*. Alor en pe ki ou anvizaz pe fer lo sa kote? Mersi bokou.

MR SPEAKER

Mersi Onorab Minis.

MINISTER MARIE-CELINE ZIALOR

Mersi Mr Speaker. Mersi Onorab. Definitivman ou dezyenm kestyon mon a komans avek premye. Nou fek pe diskit Praslin taler. Nou pe fer, nou pe plan vizit pou nou vini avan lannen. E mon'n komans koz avek detrwa bann dimoun Praslin. I annan bokou in anvoy mwan *email* tou. E definitivman i lo plan, e nou pe fer NSC. Avek tou dimoun pe, i dan sa prosedir restriktirasyon.

I annan en *meeting Senior Management* Vandredi. Pou anmenn tou sa bann nouveau plan. Sa bann nouveau restriktirasyon pou nou konsidere. Me selman ankor nou ti ava voudre ki sa bann nide i sorti Praslin. Kot bann dimoun Praslin i annan en *say ladan*, kot nou ava regarde kwa ki kapab ganny fer.

Ou premye kestyon. I en kestyon ki mon ti demande yer ler mon ti al kot SNYC, ki mannyer i ganny swazir? E tousala, e SNYC i parmi enn sa bann konsey ki pou annan petet manke plis restriktirasyon ladan. E sa osi i pe ganny anmennen par sa bann dimoun laba zot menm, ki pou ganny diskite Vandredi. Mersi.

MR SPEAKER

Mersi Minis. Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi Minis. Minis Perseverance i en gran distrik avek en gran popilasyon ki anglob bokou zenn.

Eski ou kapab dir sa Lasanble ki soulazman kot sport i konsernen kot distrik Perseverance? Vi ki nou pe vwar bokou *sportsmen*, bon *sportsmen* dan Perseverance, zot pe plifere al zwenn spor dan lezot distrik.

E sa se akoz zot dezapwentman konsernan mankman lenfrastruktir dan distrik Perseverance. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Definitivman, akoz mon krwar pou tou distrik i pa zis Perseverance. I annan en travay ki pou al ganny fer avek Minis ki fek sorti la avan mwan. Minis pou Devlopman Kominoter pou nou regarde.

Lenfrastruktir i annan en en pe avek NSC, apre i annan en pe avek distrik. Nou pou bezwen regarde ki mannyer nou

organize ki nou kapab servi tou nou bann resours dan en fason pli byen. E apre osi avek spor en pe bann transformasyon dan spor se ki lenfrastruktir definitivman i pou en pe Gouvernman. Me selman bann Federasyon zot afilye lezot pei spor pa ganny *run* par Gouvernman.

I bann Federasyon e bann Federasyon Enternasyonal. Parey Foutbol mon konnen FIFA bokou, akoz mon ganny en pe lenformasyon lo la, zot ganny bokou finansman pou zot kapab devlop bann lenfrastruktir osi tou. Nou ki nou kapab fer lo kote nou reste stratezik nou dan Minister.

Nou bezwen fer *strengthen sports management, strengthens leadership* ki sa bann Federasyon i ase for ki zot afilye avek zot lasosyasyon aletranze. Kot zot kapab ganny bokou plis siper avek led. Sirtou la dan *COVID* kot nou'n dan en sityasyon ekonomik difisil, parey tenis. Ou vwar?

Kot sa bann keksoz kot nou kapab eksplore ansanm, pou nou kapab regarde ki mannyer nou kapab *provide* bann lenfrastruktir. Selman atraver dan en fason *smart way* atraver sa bann Federasyon Enternasyonal, ki sipoze *run* sa bann sport enkli lenfrastruktir.

E ki Gouvernman i a regarde ansanm ki mannyer zot kapab prezan *compensate* pou sa bann larestan Federasyon oubyen bann larestan spor. Mersi.

MR SPEAKER

Mersi Minis. Onorab Egbert Aglae.

HON EGBERT AGLAE

Mersi Mr Speaker. Bonn apre midi Minis. Minis mon ti a kontan konn ki ou pozisyon anver ou bann Minister? Ou bann portfolyo ki ou anba la, la.

Kot i konsern desantralizasyon servis, ki pou bezwen akonpannyen avek son resours osi, ver nou bann distrik, pou ede redwir en pe birokiasi dan li menm e osi fer keksoz mars en pe pli vit?

E dezyenmman Minis ou'n fer resorti taler koman en pwen koman en legzanp sa zafer *Grant* mon krwar ki tenis, e keksoz dan laliny. Petet ki ou Minister pe mazin fer petet li osi dan sa laliny sirtou lo kote lazanes ek spor ki annan bann resours ki ganny met la. Me ki dimoun li menm nou serten nou bann *MNA*, *we are not aware of*.

So ki ou pe mazin fer pou *make known the availability* ki annan, pou nou kapab *tap in*

avek sa bann resours? Sa i enn.

E dernyen i annan sa laspe osi kot ou bann anplwaye ki pou dan ou departman, ki annan ki pou *aware* petet zot, zot in la zot in konnen.

Me bann ki vini ki nouvo si ou'n *recruit* nouvo zot pa konn sa *proper induction* pou *made aware of the resources* ki *available*. Pou zot kapab osi *disseminate* sa bann lenformasyon, avek zot bann reprezantan, sirtou lo distrik pou fer konnen poudir vwala keksoz i kapab mars koumsa. E i ava fer ki keksoz i senkronize e marse. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. *Thank you* Onorab pou ou kestyon. Pou lo kote servis mon pa tro asire ki servis ou a pe koz lo la. Mon mazinen koriz mwan si mon mal, mon mazinen ou a pe koz lo kekfwa bann servis ki lazenes ki ofer.

Sa nou pe dan restriktirasyon nou pe kalkil *strengthen* bann NGOs. Akoz en kantite keksoz par egzanp *SNYC* pa en lazans, i pe fer louvraz parey en lazans. E en kantite bann animasyon bann

lezot servis ki nou krwar *civil society* i merit zwe pli gran rol.

Nou, nou ava fasilitater, *facilitate* sa fason ki zot ava kapab annan pli gran rol partisipasyon, dan desantralizasyon kekfwa lo nivo rezyon bann diferan servis ki annan, nou ava donn sipor.

E lo kote lenfrastruktir spor, dan restriktirasyon nou pe fer en servis komunikasyon ki pou for. Nou pe aranz li byen e ou annan en pwen vre. Nou bezwen ranforsi en kantite lo ki mannyer nou kominike ki mannyer nou fer lenformasyon pase atraver pa zis *mainstream media*, be diferan fason.

E dan lespri kolaborasyon fer bokou pli platform kot nou kapab partaz sa bann lenformasyon tou. Mersi.

MR SPEAKER

Mersi Minis. Mon remarke ki scope bann kestyon pe komans elarzi. E mon konsernen ki zot pou antre dan kestyon Onorab Vidot.

Alor mon pou pran son kestyon premye apre nou a kontinyen avek bann Kestyon Siplementer lo nenport size e la i annan ankor 2 dimoun lo mon lalis.

Onorab William e Onorab Romain ki ankor la, pasyante silvouple e osi wi i osi annan isi.

Onorab Vidot poz kestyon limero 6 silvouple.

HON AUDREY VIDOT

Non, Mr Speaker. Mon ti pe fer referans lo, mon'n lev mon lanmen pou reponn lo kestyon limero 5 mwan.

MR SPEAKER

Mon ti a prefere ou ti a pran kestyon limero 6, apre nou a repase.

HON AUDREY VIDOT

Ok, alright Mr Speaker. Bonn apre midi Minis. Minis mon kestyon; Eski Minis i kapab eksplik nou Lasanble, ki rasyonal pou separ Departman Zafer Sosyal, avek Zafer Lafanmir, kan annefe Zafer Sosyal i dil avek tou problem Lafanmir e zanfan?

(a) Ki ou plan aktyel anver sa Minister?

(b) Ki mannyer ou Minister pou travay avek Departman Zafer Sosyal?

(c) Ki pou vre manda Departman Lafanmir an sa ki konsern Zafer Sosyal dezormen? Mersi Mr Speaker.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon. Rasyonal pou separ Sosyal avek Lafanmir, se pour retir problemm sosyal avek portfolyo.

Akoz letan ou met problemm ansanm ek solisyon, problemm i ganny plis lenerzi i ganny plis larzan, i ganny plis resours. E prevansyon i pa ganny ase lenportans. Vwala rasyonal akoz sa 2 portfolyo in separe.

Akoz ou konnen si ou anvi ganny menm rezulta ki nou'n gannyen pandan sa bann letan nou fer menm keksoz. Si nou anvi rezulta diferan, in ler pou nou a *ma fason* parey mon dir zot pa tro, tro kontan *disrupt* en kou. E fer keksoz en pe diferan. Akoz Lafanmir li i *unit* lasosyete pli enportan ki annan. I merit ganny en bon pe latansyon pou ki i ganny siporte byen.

E san sa bann distraksyon en pe bann kantite problemm sosyal, ki pe kontamin en pe nou sosyete. Sa portfolyo li i pou ed lezot portfolyo pou li batir, pou li re konstrir.

I pou parey en pti *construction unit* li. I pou par egzamp, ma donn legzamp ler Departman Sosyal i pe rezourd sa bann kantite problemm sosyal atraver son bann lenthervansyon. Ler Finans i a pe rezourd nou bann problemm

ekonomi, Lasante pe reponn problemm lasante eksetera.

Nou, nou pou fer sir ki ler zot rezourd 10 problemm, 20 ankor pa monte. Akoz i bokou resours ki nou met ladan nou met dan zis problemm.

Ki nou, nou ede pou nou, sa bann aprezan avan ler i vin en problemm, i ganny bokou sipor par bann diferan programm ki deza la, ouswa bann programm ki nou kapab ranforsi e ki nou kapab ede. I pa vedir ki sa 2 departman pa pou travay ansanm.

Mon pe al lo dezyenm kestyon ansanm avek sa enn premye. E i pa zis Departman Sosyal avek Lafanmir ki travay ansanm. Lafanmir akoz i annan Lazenes avek. I pou partou li, i pou partou. Napa Lasante atase avek portfolyo Lafanmir. Me selman mon garanti ou akoz letan mon pe regard 60 poursan popilasyon i obez. Nou, nou pou bezwen fer keksoz pou nou kapab travay. Pou nou kapab travay pou nou fer sa bann programm parey.

Ler nou pe regard ou bann koup, nou napa par egzamp *counselling* pou bann koup Sesel. Napa *counselling* parey i annan dan lezot pei *Alcohol Anonymous*. Nou napa, sa bann sipor ki letan kekfwa sosyal i identifye in rezourd. In fer

entervansyon li, selman ki mannyer ou kontinyen *strengthen* sa fanmir?

Ouswa bann avan ler i vin en viktim sosyal, nou fer prevansyon e pou nou kapab fer sa nou bezwen annan en *focus*, nou bezwen annan en pe plis lenerzi pou nou kapab fer sa.

Sa separasyon, en separasyon administrativ. I pa vedir ki i annan en divors, kot in divorce avek kanmarad. E mon krwar i en novo fason osi vwar keksoz, kot napa okenn sa bann portfolyo Minister dan mon perspektiv pou mwan ki separe avek kanmarad.

Nou ti pe fer konversasyon par egzanp ma donn ou en legzanp, nou de Mr Fonseka. Ou a demande be ki Minister pou Lafanmir, Spor avek Lazenes pe fer avek *Internal Affairs*? I ti *actually* pe rod en pe sipor pou spor, pour ki bann zenn i nobou kapab, ou konnen parey nou a dir bann '*adrenaline junkie*'.

Kot dan plas al fer bann keksoz agresiv al kas Lalwa, al vin en *drug addict*. Kot nou kapab ede ou vwar, nou pou fer sa bann programm ansanm. Ki prezan son bann problem i rezourd li, i napa en ta *drug addict* pou tay avek, i napa.

E nou ansanm avek Lantreprenarya, nou fer bann

fanmir *engage* dan *family business* ki zot pa *become drug dealers*. E i sa bann prevansyon ki nou kapab fer, bann programm.

E si nou ansanm avek Sosyal nou'n vwar, e sa i pa zis mwan li i Departman Lafanmir ki'n la. Ki vwar Sosyal i ganny tou latansyon, zot ganny tou larzan, zot ganny tou resours.

E sa bann programm prevansyon ouswa bann nouveau programm pou *strengthen* pou sanz en pti git pou anmenn en pti pe plis moralite dan lasosyete. Sa bann keksoz i pa'n ganny bokou latansyon. Akoz letan in meta ansanm ou kapab mazinen avek resours ki mannyer keksoz i ete.

Sa i pou, annou sanz en kou, fer keksoz diferaman pou nou kapab ganny en pe rezulta en pti pe diferan. Vwala en pe sa 2 kestyon ansanm. E les mwan zis azoute ki nou pe al promouvwar osi pou nou kapab promouvwar sa nosyon *quality of life*. Avek nou bann fanmir.

E pour Departman Sosyal mon pa pou kapab reponn sa kestyon, pou Departman Sosyal. Akoz preznan letan in separe zot plan restriktirasyon ki mannyer zot ki zot pou fer petet sa Minister Francourt i apli byen kapab reponn sa kestyon ki mwan.

Lo ou lot kestyon lo ki plan aktyel, mon'n reponn en bout sa, letan mon ti pe reponn kestyon Onorab Mondon taler pou sa 3 detrwa mwan. Pou lonterm pou annan en plan 5an, ki pou ganny devlope boner 2021 e ki nou pou partaze selman letan nou'n pare.

Selman nou bann filozofi nou prensip se ki pou nou *involve* tou bann anplwayer, tou bann dimoun zeneral dan lasosyete, pou zot kapab fer kontribisyon pozitiv. I pou en portfolyo kot i pou annan en kantite bann linisyativ pozitiv.

Pou nou kapab, mannyer mon kapab dir sa? Balans en pe bann kontaminasyon pou nou kapab vini, pou nou kapab vin refer keksoz. Vin sanz en pe fason fer, fason ki mannyer nou bann fanmir pe ganny elve. Mannyer nou bann fanmir pe ganny dirize, ki mannyer nou bann fanmir pe viv dan pei.

Mon pa konnen si mon'n reponn tou ou kestyon, si mon pa'n reponn ou a dir mwan. Mersi.

MR SPEAKER

Onorab Vidot ou ti a kontan okenn klarifikasyon spesifik lo kestyon ki la? Koze avan nou *move on*. Mersi.

HON AUDREY VIDOT

Mersi Minis pou ou larepons. Minis lo sa pwen (c) ki mon ti'n dir ou. Ki vre Manda Departman Lafanmir an sa ki konsern Zafer Sosyal dezormen?

Mon pa'n tro ganny mon larepons ki mon ti pe rode. Akoz rezondet ki mon anmenn sa kestyon, mon annan fanmir ki'n *liaise* avek Departman Sosyal, e letan i ti tonm ek Lafanmir mon donn legzanp. Kot ou annan ka kot en zanfan ki petet li i pa pe ganny vreman sipor atraver son paran, petet pa pe pran son responsabilite.

E sa zanfan i ganny trouv li lo semen oubyen i pa pe ganny sa sipor fanmir koman en paran pou okip son zanfan. I negliz li e li i *loose*. So Lafanmir, Minister Lafanmir i ti konsolid pou rod fason ki mannyer i kapab anmenn paran ansanm ek son zanfan pou annan sa responsabilite.

Nou annan de ka kot i annan bann dimoun aze ki pa vreman petet pe ganny sa latansyon spesyal, oubyen sa vre latansyon dan lakour. Swa i pe ganny abize, i annan bann aktivite ki pa normal kot en lakour, ki swa en zanfan oubyen en dimoun aze pe ganny afekte.

E la apard ki travay ki sa Departman Sosyal ti fer, ti annan sa rol kot Lafanmir i get *involve* kot fanmir i zwenn ansanm, pou vwar ki mannyer ot kapab soutenir sa enn ki pe ganny afektye pli vilnerab.

Prezan mon ti pe regarde, ou'n dir mon an deor petet ou manda novo administrasyon ki mannyer pou fonksyonnen anba Departman Lafanmir.

Prezan ou pa'n dir mon si sa bann keksoz ki mon'n mansyonnen, i pou vreman kontinyelman zis pou tonm anba Sosyal. E si Lafanmir in fini tir net son responsabilite pou war. Sanmenm sa kot i annan sa detasman. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Nou pe ekspekte ki i annan konfizyon. Nou pou anmezir ki nou kominike avek larestan dimoun ek bann fanmir, i annan bann fanmir ki nou pe pran zot bann diferan *cases*. Kot nou pe regarde lekel sa bout nou pe fer nou, lekel sa bout ki tonm kot Lafanmir.

Bout sipor, prevansyon pou donn *counselling*, pou donn en pe terapi, i pou *still* tonm kot

fanmir li. I pou napa, napa divors. I zis ki administrasyon ki mannyer pou ete, ki la prezan si dan lentervansyon kot i annan labi, i pou al kot Sosyal apre sa 2 entite pa pou arete koz ek kanmarad i pou annan regilye bann *cases*, bann Komite ki ganny *share*.

Be pou donn ou en legzanp, mon'n ganny en fanmir ki'n vin vwar nou tou. Son *case* i enkli pa zis Sosyal me i lakaz tou. Nou'n refer li kot Minister Rangasamy. I annan *case* ki konsern Lasante, ouswa lezot landrwa ki konsernen. Kot Lafanmir la, pou napa divors. Pou napa sa bann bout la ou bout, la mon bout.

Vwala ki sa kalite kiltir ki nou pe anmennen, kot nou tou pou annan par dan tou keksoz. E nou bann Minis nou annan en platform komunikasyon kot nou komunik toulezour, regilyerman sa bann *cases*, bann keksoz kot nou vwar. Lekel ki fer. E kot nou pa tro asire nou annan bann teknisyen bann PS ki zwenn regilyerman. Ki ou kapab fer sir ki, sa ki ou a pe koz lo la sa bout ki tonm kot Sosyal sa bann keksoz i ganny fer. Bann bout ki Lafanmir i vini i *consolidate*, i pa vedir ki apre osi tou nou ofer dimoun taye ale vini.

Si i annan en *case* ki vin la, nou zis fer sa dimoun Sosyal fer li konnen okouran. Ki prezan i vini ansanm i travay ansanm avek nou.

I dan sa lespri travay ansanm avek kanmarad, dan lepase sa tro *fragmentation*. La ou bout, la mon bout ki mon krwar petet diferan fason fer annou seye nou a regarde. Anmezir nou ale bann bout kot nou krwar nou merit aziste nou ava aziste. Mon krwar fotespere mon'n reponn la. Mersi.

MR SPEAKER

Mersi Minis. Mon a prezan retourn kot Onorab Waven William.

HON WAVEN WILLIAM

Mersi Mr Speaker. Bonn apre midi Minis. Minis an referans avek kestyon 5 Onorab Mondon.

Mon anvi demann ou par lefe ki letan ou'n koz lo restriktirasyon, *lean management, effectiveness* avek *impact*. Prenon kont ki nou ti dan en vye kiltir, en vye fason fer e la nou dan sa tranzisyon.

E letan ou pe koz sa bann kalite mo ki ou pe servi, i donn serten lenkyetid osi tou. Letan ou pe koz restriktirasyon i annan dimoun pe mazinen eski dan sa restriktirasyon i annan

ki pou ganny mete an deor lanplwa. Enn mon ti a kontan ou donn en pti pe sa restriktirasyon.

Epi letan mon pe get distrik, i annan en ta akter ki pe dil avek lazene. E prezan mon anvi demann ou, par lefe ki, ouswa don mon en lespas letan, ki letan ou'n fini fer ou miting entern dan bann departman konsernen, Kan ou pou fer sa bann o nivo distrik pou nou kapab zwenn ansanm?

Akoz parfwa dan lepase nou'n ganny zis enpoze lo la. San ki vreman dan distrik nou'n kapab fer sorti sa ki nou ti a kontan. Epi osi ou a dakor avek mwan ki pa tou distrik ki fonksyonn parey. E baze lo bann nivo lenfrastruktir osi tou. So mon anvi konnen ki fason ou pou kordin tousala ansanm? Pou fer sir ki enn anba sa term Sesel pou tou son zanfan ki napa distrik ki ganny met deryer. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Lo kote restriktirasyon, garanti. Akoz sa i sorti kot Prezidan ki personn pa pou perdi son

lanplwa, personn pa pe perdi lanplwa. Be selman mon ti anvi, an vi ki mon anvi dimoun i pran responsabilite osi tou sirtou dan sa kriz kot nou pe tonm ladan.

Pa perdi ou lanplwa i pa vedir ki ou kontinyen fer sa ki ou ti a pe fer oparavan. Par egzanp i annan bann dimoun ki fer krwar ou pou ganny transfer ouswa ou en *medical doctor* ouswa ou en *teacher* kot i pou pli bezwen ou dan en lot departman, dan en lot portfolyo.

Nou pe fer ban negosyasyon avek bann dimoun, byensir zot annan en *say* pou dir be regarde pou dir be regard sa, nou annan nou 2 ouswa 3 opsyon. Parey dan restriktirasyon i annan en departman ki nou pou bezwen tire. I annan bann *Act* nou bezwen *repeal*, nou pou anmenn devan Lasamble pou nou tire. Akoz i tro bokou *layers* parey mon pe dir.

E dimoun pou ganny afekte, definitivman, definitivman. Fodre nou pa per ki dimoun i ganny afekte. Be selman dan en fason kot nou fer li pa brit, nou fer dan en fason kot nou donn dimoun opsyon lo –

I annan dimoun zot menm, sa ki mon kontan. Se ki

bann dimoun zot menm pe vin devan pe dir, be lontan mon ti'n dir frenm sa pa neseser. Mwan mon *area* i tel landrwa.

mon krwar mon'n deza vin dir premye fwa poudir pe fer pwason grenp pye dibwa. Mwan mon en dimoun, "Minis mwan mon enn sa bann pwason ki pe grenp pye dibwa mwan."

So donn mwan en lot keksoz mon ti ava kontan *restructure*. Even dan sekretarya Minis i annan tro bokou dimoun. Kot nou kapab nou re deplwaye, regarde kote ki manke. Kot nou kapab fer sa, e i annan dimoun ki pa pou kontan. Definitivman zot pa pou kontan.

Me nou dan en sityasyon pandemik, kriz ekonomik. Ou vvar? Pou le moman nou kapab dir, be ou konnen pou le moman be tenir avek sa, apre nou ava regarde ki mannyer, kwa ki ou ti ava kontan kontinyen fer.

E vwala en pe bann restriktirasyon ki mannyer pou fer. Be selman *so far* bann ki nou'n koz avek bann dimoun ki pou ganny afekte zot pa pe konplent, zot pe konpran zot pe dir be wi omwen nou apresye nou annan en louvraz.

Be en louvraz i pa vedir prezan mon fer sa ki mon anvi akoz mon'n garanti en louvraz.

Apre avek sa tou, i vin en *performance management system*. I annan bann dimoun ki lo kontra, ki bann performans. Ler ou kontra i fini, i pa garanti ki fodre donn ou en lot kontra. Ou vvar?

Tou sa i bann keksoz ki en kou pou bezwen met sa *performance management*, sa disiplin avek nou bann dimoun. E i pou annan bann landrwa kot i pou annan etranze kot mon krwar, in ganny dir ki pou ganny ranplase par bann Seselwa. Be selman nou bezwen.

Mwan mon kontan sa mo balans, nou bezwen balans keksoz. Akoz mazin byen nou bann dimoun deor pe ekspekte ki keksoz i sanze, zot pa pe ekspekte ki keksoz i sanze zot pa pe ekspekte ki keksoz i reste parey.

E nou, nou responsabilite nou bezwen fer sir ki dimoun i anti en lenpak. I vvar poudir i annan. E i annan dimoun ki i pa ti pe *perform* kekfwa petet akoz *the leadership* ki pa ti pe fer li *perform*. So i bann keksoz kot letan nou restriktire pa zis striktir lo papye be selman lezot keksoz tou.

Ti annan en bann laginy antre kanmarad tou, ki personn pa'n asize fran pou dir; be ou konnen kwa nou bezwen travay

ek kanmarad, soutir sa kapris, ou osi soutir pou ou kanmarad.

Akoz nou bezwen regarde ki mannyer nou kapab balanse la dan sa restriktir ki nou pe restriktire. I enkli tou sa bann travay ki pe ganny fer. Bokou komunikasyon, bokou bann negosyasyon ki pe ganny fer.

I annan en ta lenstans kot nou ti pe dir ek bann dimoun, be al regarde vin avek en proposal ou menm ou. Regarde ki mannyer ou kapab kontribye dan sa Minister kot ou a pe travay. I form parti sa li.

Mersi bokou pou *remind* mwan pou re eksplik sa. Ou dezyenm kestyion i lo kote distrik, wi lo kote, i annan en kantite akter dan bann distrik e ki mannyer nou fer sa arive.

Ankor sa *issue lean*, mon pou *go back to lo NGO* lo Gouvernman pou vin en fasilitater. E nou pou les bann dimoun, e enkli pa zis bann regroupman zenn ouswa bann aktivite. Bann aktivite ekonomik. Akoz nou bezwen dan pei kot nou annan bann pa zis bann *family businesses* ki nou pou diskit avek Minister Hoareau bann *community based*, bann biznes, bann aktivite ki pou annan kot bann *youth worker*, kot bann dimoun i pou kapab ale al donn en koudmen ladan. Ouswa bann

aktivite bann aktivite sportif osi ki pou ede ankouraze.

Par egzanp nou konnen nou annan en gran mankman letan bann zanfan la nou pe al dan vakans, pou nou kapab rod aktivite pou nou kapab fer paran soulaze ki pour fer sa arrive. E *engage* bann zanfan pour ki nou redwir sa bann problemm labi zanfan.

Fodore i annan sa bann keksoz ki ganny devlope. E mon garanti ou pou annan sitan kantite programm ki nou pe al pouse ki nou pe al mete, tou dimoun pou *engage* dan bann distrik. Mersi.

MR SPEAKER

Mersi Minis. Onorab Georges Romain.

HON GEORGES ROMAIN

Mersi Mr Speaker. Bonn apre midi Minis. Minis mon'n tous en pti kou lo kote sport. Nou tou nou konnen ki bann lakonpannyen ki prodwi lalkol, ou ki vann lalkol Sessel pa kapab sponsor bann spor dan Sesel.

Me parkont nou okouran ki *SeyPearl* ki sorti kot *Seychelles Breweries* byensir i pe *sponsor* Federasyon Foutbol.

E nou tou nou okouran ki son *main* lavant byensir i lalkol. Alors ki mwan, ek sa sityasyon *COVID* ki nou annan dan pei

byensir. I pou pli difisil pou bann lakonpannyen kapab sponsor bann klib spor. En legzanp mon kapab donn ou Minis dan mon distrik mon annan en klib spor, ki kapab ganny asiste avek en lakonpannyen ki prodwi lalkol.

Me selman zot in ganny dir ki zot pa ganny drwa aksepte sa sipor. Minis mon ti a kontan ganny ou pwennvi lo sa size. Akoz sa i en size ki'n toultan in monte dan lepase dan Lasamble. Mon ti a kontan konnen ki ou pwennvi lo sa size koman Minis spor? Mersi Mr Speaker.

MR SPEAKER

Mersi Onorab. Minis wi.

MINISTER MARIE-CELINE ZIALOR

Mersi bokou Mr Speaker. Mersi Onorab. Kestyon *tough*. Mon pwennvi personnel lo sa kote. Nou annan Minister Spor i ansanm avek Lafanmir li. Nou pa promouwar lalkol me selman lalkol i pa ilegal Sesel. I pa ilegal.

E si i annan avek responsabilite. Mwan toultan mon dir Lalwa pa sanz *behavior* dimoun li. Si nou travay lo fer dimoun annan parey nou dir moderasyon, *drink responsibly* pou kapab fer sa. E ler nou

anpes sa bann lakonpannyen *sponsor* spor, eski dimoun i bwar mwens?

Mwan mon ti pou met lanfaz lo, mon bezwen revwar sa kestyon ki ou pe regarde avek bann profesyonnel bann dimoun, pou vvar akoz ti annan sa Polisi *in the first place*.

Akoz mon pa konn sa Polisi, mon pa'n vvar. Me la mon pe koz ou personnelman la. Nou bezwen re regarde ki bann lavantaz, dezavantaz avek sa. Ki mannyer i arive e met bann lanfaz lo akoz dimoun pe abiz lalkol Sesel.

E rode ki mannyer nou pou fer annan balans, akoz i pa ilegal li. Rode ki mannyer. E fodre pa ki nou ipokrit tou. Lalkol i parmi enn bann komodite ki anmenn plis *tax* dan pei. ou vvar? So i annan en pe balans lo sa kote. Mon konnen i kontroversyel. Me selman mon osi fer bann kontrovansyon ki difisil parey mon pe fer la.

E sak dimoun i annan son lopinyon personnel lo la. Si Gouvernman i deside pou li *ban* lalkol napa lalkol ditou dan le pei, i ilegal, i en keksoz ilegal. E la ilegal, e nou, nou bezwen met lanfaz lo, lanfaz se petet mon pa konnen mon pa pou al lager sa.

Lanfaz se *strengthen* lafanmir ki zot pa tonm dan labi

lalkol. Ki nenport ki keksoz ki ou fer ki napa labi. Ou bwar, si ou bwar lalkol i les bwar, ou bwar an moderasyon. Be selman ki napa labi lalkol. Sa ki problemm, se labi lalkol.

Ni keler laboutik i ouver si ou pou demann mwan personnelman, tousala se si letan dimoun i annan en disiplin, annan en *self-control*. Ouver mannyer oule, fer vire obor li mannyer i oule i pa pou al fer labi li.

Mwan letan ou pe demann mon otan ki Minis, mwan mon konsern se pour ki anpes labi lalkol dan fanmir, *strengthen* fanmir pour ki nou, nou napa sa.

Sa lot kestyon nou bezwen al get Polisi akoz. Mon pa kapab pronons mon lekor lo la, akoz, e nou ava regarde merit regarde si fodre revize. E ki mannyer merit revize. Mersi.

MR SPEAKER

Mersi. Annou sey gard sipleanter lo size bann kestyon ki'n ganny demande silvouple, pou nou kapab avanse. Mon ava pas kot Onorab Sebastian Pillay.

HON SEBASTIEN PILLAY

Mersi Mr Speaker. Mr Speaker kestyon oparavan in ilistre en pwen ki mon ti a kontan Minis i

koz lo la. Mon krwar Minis ou pa'n reponn kestyon ki Onorab in demann ou, akoz ou'n santi ou'n vvar poudir ou entelizan, ou'n war poudir sa kestyon i deza en konfli.

Ou annan Minister Lafanmir, ou annan Minister Spor. E sa i en size ki'n toultan *come up* dan Lasanble oparavan. In en size ki bokou Manm in lager, zisteman akoz dan bokou pei i annan bann lakonpannyen lalkol ki sponsor bann lekip sportif.

Heineken i sponsor *Champions League*. E enn bann landrwa ki pare pou donn sponsor bann lekip sportif Sesel, se dan bann lakonpannyen ki zisteman prodwi lalkol. Me selman zot pa kapab pa sponsor.

So prenon kont sa konfizyon ki egziste deza *within* ou portfolyo avek en *Policy matter* ki ou bezwen dil avek. E lefe ki *the preventive and* e sa bout fer aksyon ou Minister, i reste avek Departman Zafer Sosyal.

Eski ou pa krwar premyerman, ki pou annan en konfli ki pou egziste ki malgre avek ou pou bon lentansyon, ou pou bezwen *rely* lo en lot Minister ki tonm anba en lot Minis, ki annan en lot

departman pou kapab akonpli ou bann fonksyon?

E dezyenmman ou'n koz nou lo en *lean government*. Minis i annan en *Cabinet 13* Minis. I pa vreman *lean*, so eski ler ou pe dir nou poudir i annan en, ou pe koz en *lean government*, sey eksplik nou en pti pe dan en pe plis detay kwa ki ou pe sey dir ler ou dir nou en *lean government*?

E mon dernyen kestyon pou ou. Lefe ki ou Minister Zafer Lafanmir, ou Minister Lazenes e ou Minister Spor. I pou annan bann desizyon ki ou pou bezwen fer *along* sa *spectrum* ki obligatwarman i bezwen annan en lenpak lo tou le 3. E enn bann keksoz ki'n arive dan lepase, se ki zisteman ki mannyer ou sitye spor dan en fason ki bann desizyon ki ou pran napa en lenpak.

So ki mannyer ou Minister pou rekonsilye sa bann difikilte ki'n ganny rankontre par lepase par lafason ki portfolyo spor in ganny striktire. Mon a donn ou en legzanp tre vitman. Par egzanp ou fer en zenn partisip dan spor, ou bezwen tir zot dan lekol. Tir zot dan lekol i afekte zot laprantisaz. Ki mannyer ou rekonsilye sa avek ledikasyon?

So at one point in education, youth and sports. At

one point in education culture, youth and culture.

So ou'n travay dan ledikasyon. So zis sey dir nou ki mannyer ou pou *go about tackle* sa sityasyon. Me sey adres sa, petet ou pou bezwen adres sa Polisi lo sa size lalkol ki Onorab Romain in leve dan en fason en pe pli direk osi. Mersi Mr Speaker.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Polisi wi, nou pou al regarde. Nou ava al regarde, mon pa oule pronons mon lekor la. Akoz mon pa konn sa Polisi, mon bezwen al regard sa Polisi. Apre mon kapab retournen apre vin pronons mon lekor lo la.

Lo kote konfli mwan mon krwar, dan mon latet mon napa konfli. Eski i pou annan bann malantandi? Wi, definitivman, sak fwa i annan en keksoz ki sanze, i annan malantandi. *Whether Gouvernman i sanze ouswa non.* I annan sanzman. Sanzman i en keksoz ki inevitab dan lavi, e i deza annan bann keksoz ki nou pou bezwen annan en pe pasyans. E pou en pe letan. I pran en mwan pou sanz en konportman, i pran 3

mwan pou sa konportman vin en labitud dan ou *subconscious*.

So nou pe travay ver sa. Vwala akoz bann plan 3 mwan ensidswit. E pou nou kapab fer kler. E lo papye i kapab annan konfizyon. Me selman nou bezwen regarde letan i pou ganny enplimante, ki mannyer i ganny enplimante. E ki mannyer nou kapab anmas bann lenformasyon, pou nou kapab tir sa bann konfizyon, tir sa bann konfli.

E mon krwar bann kestyon ki pe leve la, set akoz ki mannyer nou pe al dan le fitir avek en lespri lepase. Dan mon latet mwan, mon lekor avek mon lespri in fini ariv dan *future*, dan 2021 mwan.

So mon pe vwar dan mon latet klerman ki mannyer sa i kapab marse, e nou tim osi kot Minister. Akoz pandan sa bann 3 semenn nou'n vwar bann legzanp konkret ki mannyer sa i ganny fer.

E i annan bann fanmir ki vini, nou pe fer e nou pe travay tre pre. Ankor mon repete. Pa zis sosyal e mon ti a kontan ki sa *stigma* Fanmir i sorti avek Sosyal tou.

Akoz nou pe tro, nou zis dan problem, problem, problem, ki nou kapab rod lo prevansyon. Me selman kot nou kapab osi al ver Minister

Ledikasyon, Minister Lasante, Lantreprenarya.

Minister Finans kot nou'n ganny en kantite koze, avek lo ki mannyer nou anmenn ledikasyon finansyel kot bann fanmir. I sa bann louvraz. E anmezir nou anmenn bann programm, anmezir nou fer bann lanons, anmezir nou enplimante.

E nou komans vwar bann pti *video clip*, ouswa nou vwar ki mannyer i deroule, la mon krwar poudir i pou re eklersi en pe sa bann dout ki petet pe leve. So larepons konkret non, mon napa dout. Mon annan 100popursamn konfidans poudir i pou marse. E mon krwar nou ava prouve tou.

Dezyenm se *lean government* konsernan avek 13 Minis. Lo kote ki mannyer ou, mon krwar sa ti en lopinyon personnel lo kote sa zafer 13 Minis. Lo kote *lean government* ki mannyer ou pe dir sa pou marse. Se ki i annan en kantite, ler mon dir en kantite *layers*, dan bann Minister enkli portfolyo kot i annan la.

Se ki nou annan, par egzant nou annan en kantite bann Konsey ek bann lazans avek bann departman, ki pe fer preski annandler menm keksoz. Akoz mon'n fer tou sa bann plan, nou'n fer lodit, tou

bann plan, mon'n fer sir mon'n rankontre enn par enn. Sanmenm kekfwa petet par ler mon pa'n tro al lo medya mwan pou al fer vizit.

Mon'n plito al kot zot enn par enn pou eksplike ki mannyer. Akoz mon kontan larmoni, mon kontan ki mannyer keksoz i armonize ek kanmarad tou le 3. E nou'n vwar i annan en pe, e menm bann teknisyen e ki ti pe dir i annan bann *duplication*.

Duplication of role e i annan bann *post* ki'n ganny kree de fwa. Pa akoz i en stratezi lo striktir, i en stratezi pou enplimantasyon, en plan. I plito atraver dimoun. In get en dimoun nou anvi donn li en pozisyon en plas si mon pou et fran. Nou santi kekfwa laba i pe ganny konfli ek sa enn laba, prezan nou'n kre en pos nou'n fer en fason pou nou kapab donn li.

E ou konnen *management* i evolye. Dan ankor 5an, 6an i riske sa zafer *lean management*, i annan en lot keksoz ki ava vini. Akoz keksoz i evolye i pa reste parey. Nou bezwen reste azour avek ki mannyer bann nouvo fason fer, baze lo ban resers, i donn nou;- ki mannyer produktivite i kapab ganny fer.

Vwala mon larepons lo sa kote *lean management*, annou

koup *duplication*. E annou fer sir nou annan en *governance structure*, kot tou dimoun i konnen ki i pe fer, pou nou kapab armoniz en pti pe pli byen.

Desizyon lo kote pou enpakte sa 3 parey ou'n nonmen;- legzanp ki ou'n donnen ledikasyon. Apre pou tir manrmay lekol pou li i pe mank lekol si i pe al fer *sports*.

Sa in ganny diskite definitivman ki mannyer nou fer avek Minister Ledikasyon, ki mannyer nou armonize. Ki mannyer nou kolabore pou nou kapab *compensate*.

Mon krwar avek modernite konmela avek teknolozi kot nou bouz devan, ledikasyon i pa ganny restrikte. I pa merit ganny restrikte *between 4 miray*. Mon krwar i annan diferan fason.

COVID in montre nou poudir bann zanfan pa'n al lekol selman zot in aprann en kantite keksoz.

Ki nou kapab ansanm tonm avek bann programm, modern avek Minister Ledikasyon pou var ki mannyer nou *compensate*. E i deza annan *proposal even* pou nou fer en lekol, en *college sports* Sesel tou.

Kot i ganny son ledikasyon laba i fer son spor

laba, kot son *curriculum* i *around* sa. Parey nou fer avek vokasyonnel tou. In ler pou nou modernize, pou nou mazin diferaman ki mannyer nou kapab fer keksoz ki i napa, e si i annan lenpak mon garanti ou ki nou pou asize nou pou rod en solisyon. Nou pou rod en solisyon ziske ler nou vwar. Mersi.

MR SPEAKER

Mersi Minis. Onorab Norbert Loizeau.

HON NORBERT LOIZEAU

Mersi Mr Speaker. Bonzour Minis. Minis mon apresye sa vizyon ki ou annan. E mwan mon en dimoun ki pou ed ou akonpli sa vizyon si ou bezwen mon led.

Mon ti anvi demann en kestyon en pe dan laliny sa *college sport*. Me ou'n koz lo la, mon pa pou al lo la. Me selman mon pou al lo en lot keksoz. Ou'n dir ki ou pa anvi ki zis Gouvernman lo kote spor sa, zis Gouvernman ki pou fer tou keksoz.

Ou anvi ki lezot dimoun osi i antre pou vin ede. Minis parey mwan ou konnen, mon pa konnen si ou'n ekout mwan dan Lasanble oparavan, mwan mon en dimoun ki siport bann lakademi spor.

Akoz si ou anvi zenn antre dan spor ou bezwen komans li anba atraver bann lakademi. Mon anvi demann ou Minis, si ou annan en programm, si ou pe travay lo en programm ki pou ankouraz bann endividé an deor pou kree bann lakademi spor dan bann distrik en pe partou ki ava ede anmas en pe sa bann zenn pou fer zot antre dan sport boner?

E dezyenmman dan menm laliny, vi ki nou pa anvi ki Gouvernman toultan pe donnent menm lo kote spor. Ki zot pe mazinen an term eski zot annan en plan pou ankouraz bann dimoun dan prive pou pran bann lekip sport *run* li koman en biznes? Akoz ozordi petet i kapab ede Minis, i annan bokou zenn ki fini lekol.

Konmsi lo kote ledikasyon zot napa, me selman spor zot kapab fer. Kot spor i kapab vin en lanplwa pou zot pou zot kapab *earn* en pti keksoz olye war zot dan tol lo geto pe pike. Ki ou plan dan sa laliny? Mersi Minis.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker, mersi Onorab, mersi bokou pou ou

sipor. Lakademi definitivman i deza annan 2 *proposal* ki'n deza fini antre lo ki mannyer nou ede nou siporte. E vwala akoz NSC byento i pou vin dan Lasanble apre tou avek nouvo Lalwa, avek *even* pe revwar striktir pou ki kapab fer plis sipor koman en Konsey e osi pou tir sipor dan lanmen Gouvernman en pe plis e met li dan lanmen bann lakademi.

Ki nou ava ankouraz bann dimoun, bann ki pe ekoute, ki annan bann *proposal* anvoy devan, anmennen. Nou, nou pou regarde, nou pa pou demann kestyon, eski nou kapab fer, nou pa kapab fer. Nou pou al rode ki mannyer nou pou fer.

E dezyenm se ki mannyer nou pou ankouraz prive pou biznes. Sa nou bezwen pe komans koz avek Minis Finans. Vwala ki mannyer letan mon pe dir kot nou *portfolio* i partou nou.

Nou'n nobou kapab pe vwar e mon kontan lapros bann teknisyen kot Minis Finans. Ki zot osi zot pe ouver, dan plas nou, nou toultan dir a pa posib akoz dan lepase nou pa'n kapab fer, nou pa'n fer.

Nou pe regarde, asize, dir be annou, annou annan en miting nou a regarde ki mannyer nou kapab ankouraz

plis. Diversifye ekonomi e ed tou *portfolio*, tou dimoun i annan par ladan.

E mon kontan ki nou'n mansyonnen ki spor osi. E nou pe *even vers sport tourism*. Ler mon pe koze la i annan en dimoun ki anvi vini vin kas rikord *open water lannen* prosen Sesel *sport tourism*, e sa Federasyon Enternasyonal Tenis ti anvi regarde pou letan i ariv sa *stadium* parey e pti *Wimbledon* ki mannyer nou kapab anmenn bann konpetisyon enternasyonal tenis Sesel tou.

So ou vwar ki mannyer i *cross cutting* kot nou definitivman regarde ki mannyer spor i enn parmi bann pli gro biznes dan lemonn ki annan. E mon krwar in ler pou nou osi modernize pou nou al viz ver sa. Mersi bokou,

MR SPEAKER

Mersi Minis. Onorab John Hoareau.

HON JOHN HOAREAU

Mersi Mr Speaker. Bonn apre midi Minis. Minis i annan bokou *sportsmen* ki apre zot in perform o nivo lo pou Sesel, zot in donn bokou laglwar nou pei. Me apre zot ganny bann *injuries* zot santi zot, zot bezwen pran zot retret an spor. E zot santi ki

personn pa get zot. Eski ou annan en plan pou sa bann dimoun?

Dezyenmman Minis, Mon konsyan ki nou pa kapab *spread nou butter thin*. Akoz parey ou'n dir, diplikasyon ler tou distrik i oule tou fasilite i enposib pou donnen. Alor eski i annan serten lodit ki ou'n fer, pou vwar lekel bann distrik ki annan bann pli bon fasilite?

Oubyen ki kalite fasilite ki kapab ganny adapte dan serten distrik, pou promouvwar serten kalite spor dan serten distrik e fer sir ki sa bann distrik i ganny sa pli bon fasilite posib. Me selman nou pa pe fer tou keksoz dan menm distrik? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker, mersi Onorab. Pou ou premye kestyon lo kote bann, wi nou ti koz bokou lo la. Pa zis lo la, sirtou apre lo bann Anbasader Spor. Bann ki'n aret fer spor, bann ki kapab vin donn en koudmen. E apre bann ki'n ganny *injury* i, mon krwar i relye avek sa ki Onorab avan ou in koz lo la. Ler spor in, vin en biznes *properly*, sa bann

dimoun vwala ki nou pou, la bann ki la pou le moman.

I annan en programm kot NSC pe regarde kwa ki kapab ganny fer, pou get dan zot *welfare*. Be selman pou longer ditan, mon kontan a pe *plan for the next 5 years*. Pou regarde ki mannyer sa bann dimoun osi zot pa met zot dizef dan en sel pannyen. Ki mannyer, parey zot pei, bann dimoun ki fer sport lo en nivo o zot osi envestir.

Nou bezwen regarde ki mannyer nou bann fanmir, nou bann, tou dimoun i envestir pou son lavenir li osi. Ki i pa regard sa koman zis en responsabilite Gouvernman. E nou, nou la pou nou siporte, pou nou kapab atrap lanmen. Pou nou kapab fer sa arive. Be selman bann ki la, ki'n ganny *injury* i deza annan bann programm pou regarde ki mannyer nou kapab, nou kapab ed zot ladan.

Dezyenm kestyion, lodit, wi NSC in deza, vwala akoz zot in dir poudir zot in vwar dan bann distrik, i annan bann facilite ki tonm anba Lotorite Distrik tou. Ki mannyer, e zot pe met sa dan plan, dan plan 5an. Pou regarde ki mannyer nou'n nobou kapab transform tousala.

E sizesyon mersi bokou. I bon ki i annan bann distrik, bann rezyon ki asosye, afilye, ki nou, nou kapab petet *manage* nou bann resours, servi nou resours en pti pe plis dan en fason *efficient*. Mersi.

MR SPEAKER

Mersi Minis. Onorab Audrey Vidot.

HON AUDREY VIDOT

Mersi Mr Speaker. Mr Speaker mon kestyion pou Minis. Pli boner dan ou larepons letan ou'n tous size konsernan bann *funding* ki ou pe al revwar en pti pe. E letan Onorab Aglae in demann ou kestyion lo la, mon ti anvi zis ranforsi pou mon dir ki nou pe *look forward* an term parey letan ou pou revwar sa bann *funding* ki NSC petet i gannyen. Si i pou anmenn li lo baz kominoter.

Akoz nou konnen nou annan bann diferan distrik ki annan zot bann facilite sportif, ki petet i kapab desantraliz dan distrik.

Apre en rekomandasyon ki mon pou anmenn ankor devan nouvo Gouvernman, se ki Roche Caiman nou parey dan mon distrik, nou deza annan nou en facilite kort. Nou annan enn nouvo ankor ki pe ganny

konstri Eden Village pou bann zenn. Mon pe demande ki nou bann fasilite sportif i ganny priyorite osi pou nou distrik.

Akoz enn nou'n pret Mamelles. So definitivman nou pa oule ki bann klib i ganny plis preferans pou zot *practice*. Ki anpes bann zenn dan letan lwazir pou zot kapab ganny fasilite pou zot servi. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Rekomandasyon nou'n note. Nou ava regarde ki mannyer nou kapab organiz sa. Be selman mon ti a kontan dir en pti keksoz lo sa rekomandasyon.

Ankor mwan avek mon bann prensip filozofi travay ansanm. Ki letan i annan en lenfrastriktir Gouvernman vre i dan distrik, selman i pou tou Seselwa.

I pou tou Seselwa, mon krwar sa bann zafer bann *territorial* ki petet kekfwa dan lepase nou'n abitye avek, nou'n merit revwar sa. E regarde ki mannyer, Sesel i ptipti. Kot nou partaz nou bann resours ki nou annan.

Parey taler mon krwar Onorab Hoareau in koz lo la. Kot i annan bann rezyonal kot nou konnen priyorite i pou bann dimoun sa distrik. Be selman osi pou dir, tou bann fasilite i pou tou Seselwa. E nou *welcome* bann lezot dimoun, si nou kapab sov en zanfan dan en lot distrik pou li vini, mon krwar i en bon keksoz. Mersi.

MR SPEAKER

Mersi. Me, ou permet. Onorab Vidot nou a pase silvouple.

HON AUDREY VIDOT

Mersi Mr Speaker.

MR SPEAKER

Mersi.

HON AUDREY VIDOT

Non, zis mon ti anvi dir Minis i pa kestyon territoryal, akoz problem se ki parfwa. Bann ki vin anndan dan sa distrik ki fer dominer. Sanmenm sa ki ou war ki mon pe met propoze ki *at least* nou *welcome*, me zot bezwen annan sa balans.

MR SPEAKER

Mersi Onorab. Mersi. Nou a pas lo Onorab Philip Monthy.

HON PHILIP MONTHY

Mersi Mr Speaker. Bonn apre midi Minis. Minis ler ou'n koze pli boner, ou'n koz lo donn plis pouvwar bann federasyon. Pou ki zot pli lib dan bann desizyon ki zot pou pran, ki pa tou kou Gouvernman ki enplike dan *running of sports*.

Ki mwan mon vvar i en nide fantastik, me ase riske osi. Sirtou ler ou get leta serten federasyon aktyelman isi Sesel konmela, ok.

Donk mon kestyon se, ki mannyer zot pe mazinen antreprann sa? E eski zot pe mazin travay avek dizon Minister Ledikasyon oubyen Liniversite Sesel oubyen Guy Morel Institute, pou ki i annan bann programm letid lo nivo Diplonm, Diplonm Avanse, menm Degre dan zesyon spor.

Ki nou ava kapab ankouraz plis zenn pou pran sa bann karyer ki nou bann Federasyon i a pli byen ganny *manage*. E spor an zeneral dan Sesel i ava devlop en pe plis. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker, mersi Onorab. Mon krwar en rekomandasyon fantastik. E

definitivman Federasyon, zis en koreksyon, pa plis pouvwar, petet plis responsabilite. E definitivman. E letan nou pou revwar sa *Act NSC*, nou pou revwar bann *Policy* ki i anmennen si pou fonksyonnen, I pou fasilit, i pou *enable*, i pou ed sa bann federasyon devlope. Akoz i pou annan bann Polisi kle.

Ki pou zer ki mannyer federasyon, *management* i pou marse. E definitivman, e nou pou annan koze, nou'n komans koze pou al koz avek Minister Ledikasyon avek *ANHRD*.

Pou ki nou annan bann labours pou osi tou lo bann diferan size ki pa neseserman zis akademik. Akoz la i tradisyonnal akademik, i bezwen annan.

Mon kapab al pli lwen tou, mon konnen kantmenm i pa. Selman akoz lazences i partou, *even parey nou napa sound engineer* bokou Sesel. Letan sa bann ki al i mor, ou konpran.

Pou nou kapab *train* bann larestan size. Sirtou, mon pou koz lazences tou, akoz lazences i ganny enspire par diferan keksoz ki petet dan nou letan nou letan nou ti pe grandi. Bann modernite kot nou bezwen met sa bann keksoz modern dan nou bann labours,

dan bann *training*. Savedir ou larepons, vitman se definitivman wi. Mersi bokou.

MR SPEAKER

Mersi Minis. Onorab Doyace Porice.

HON DOYACE PORICE

Mersi Mr Speaker. Bonn apre midi *Minister*. Mon annan 2 kestyon. Ki ou Minister pe mazinen pou bann ankadrer spor a lavenir, tel parey bann *PE teachers* ki annan en mankman dan lekol?

Vi ki nou annan en ta problemm familyal ki pe ogmante, relye avek bann zenn paran, ki programm ou Minister i annan pou tou bann zenn ki pe leve, pou ki zot a pran zot ledikasyon o serye pou zot ganny en bon lanplwa?

Kot pli tar ler zot a fer zot fanmir, zot pa pou depan lo Gouvernman, akoz zot pou'n konn tou valer fanmir.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi bokou Onorab pou ou kestyon. Lankadreman sport dan lekol i en keksoz i *NSC* in koz longman

avek mwan lo la depi ler nou'n vini.

E nou bezwen al- sa relasyon i pa parey nou ti ava swete. Nou bezwen al ranforsi sa relasyon, pou nou kapab regarde ansanm ki mannyer nou ranforsi, ki mannyer nou travay en pe pli pre avek bann ankadrer.

E dezyenm kestyon, bann programm definitivman. Nou'n deza pe komanse, nou pe komans lanse, nou pe, par egzanp la i annan sa programm ki mon ti pe dir taler lo kote *bring Christ back in Christmas*.

Se i pe komans sirtou avek nou bann zenn. La zot pe al dan vakans, zot pe annan en programm spesyal ki pe al ganny fer pou zot, pou nou kapab, pa zis koz lo la. Nou anvi montre zot apre tou ki mannyer pou fer dan bann diferan programm. I bann programm, sa ki pa pou zis pou Nwel li. I pou kontinyen tanzantan.

Ou konnen nou bann zenn si nou *engage* zot dan bann aktivite pozitiv e nou pa kit lespas pou bann kontaminasyon - mon apel sa kontaminasyon mwan, bann kontaminasyon vini, nou ganny zot nou.

Apre mon pou al en pti pe pli lwen, si nou retourn dan nou

nam Sesel, nou retourn spirityalite dan nou nam. Nou pa zis nouri laser, nou nouri lemosyon, nou nouri nou nam.

Sa i pou en keksoz *powerful* ki nou kapab fer dan nou bann zenn, pou nou kapab ganny bann sitwayen, pa zis responsab, me tre prodictiv e tre *powerful* dan nou pei. Mersi.

MR SPEAKER

Mersi Minis. Onorab Naddy Zialor.

HON NADDY ZIALOR

Mersi Mr Speaker. Bonn apre midi Minis. An referans avek kestyon 5, avan ki mon demann mon kestyon, mon ti a zis pas en komanter. Letan mon'n ekout ou larepons Minis, se konmsi ou a krwar nou pe redonn Sesel en lesphar. *Hmm?* E pou mwan i annan en keksoz ki pre kot mon leker. E mon ti a kontan ganny ou *input* lo la.

E sa i pou bann dimoun ki otreman kapab, ki nou dir bann dimoun ki pe vin avek dezabilite. Ou konnen, si ou permet mwan, mon santi ki i annan serten sekter kot sa group dimoun in ganny neglize.

E letan mon get Minister Lafanmir li menm, petet ou ti ava donn nou en pti gin,

pandan sa detrwa mwan ki pe vini la, an relasyon avek bann dimoun ki otreman kapab.

Ki bor ki nou kapab fer zot rantre pou ki vreman i annan sa laspe *inclusion* dan persepsyon e konsepsyon nou Gouvernman? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi bokou Mr Speaker. Mersi Onorab. Mon krwar i en tre, tre bon kestyon. Akoz sa i parmi enn bann size letan nou'n ale. Mon pa pou deklar la akoz nou pa ankor koz avek *Chairperson* sa *Board* akoz i dan *TRNUC*, nou pa ankor zwenn pou nou kapab koze. Me selman nou'n koz avek enn de bann Manm lo Konsey, lo mon pou servi ou mo ki ou'n servi.

Otreman kapab, e i annan en kantite travay pou nou fer. E i pou annan dan restriktirasyon i annan sa apre bann *Elderly*. I 2 area kot nou bezwen al fer masiv reform ladan pou nou kapab moderniz li.

Apre pou nou tir sa depandans. Akoz sa bann dimoun otreman kapab parey nou'n dir, nou'n servi sa mo

kapab, fodre nou aret fer zot depandan lo larestan dimoun.

E mon a donn ou en senp legzanp, kot nou'n vin avek, regarde. Akoz mon'n demande, be ki zot fer, si zot travay, e zot ganny abize, petet i annan bann ka labi. Savedir prezan bann paran pa oule zot al travay.

Be mon'n dir, be akoz nou pa petet par egzanp fer korperativ zis pou zot, fer korperativ pou zot. E mon kontan servi sa legzanp konfitir. Nou pe enport en ta konfitir Sesel. I annan en kantite dimoun *elderly* ki konn fer sa bon konfitir sa.

Letan i annan sa bann, nou zet en kantite karabol, zet sa bann fri, kot nou kapab vini fer bann zenn dimoun, en ta *youth worker* partou, donn en koudmen, pou nou kapab fer korperativ pou sa bann dimoun otreman kapab. Zere par zot menm e zot kapab ganny ekonomikman depan lo zot lekor. E apre osi i mank sipor en kantite pou bann fanmir ki annan bann zanfan otreman kapab. I annan bann fanmir ki annan 3 zanfan, dan en sel fanmir ki otreman kapab, ki sipor.

Pa zis sipor finansyel zot bezwen. Zot bezwen lezot sipor ki mannyer zot fer pou zot kapab *cope*. Even akoz mon

kennen lofis *First Lady* ti pe mazin en proze pou regarde ki mannyer nou donn *relief* par egzanp.

I annan dimoun ki pa ganny en *break* ditou li. Akoz swa *elderly*, swa sa bann dimoun otreman kapab, ki mannyer nou fer. E nou fer lo en term volontarya kot nou prepar bann programm ki dan lafanmir.

Vwala akoz nou pe tire ek Sosyal tou. Pou nou kapab fer sa bann kalite programm ki i donnen. Akoz kekfwa enn ler letan ou fatige, lanmenm ler petet kekfwa i annan labi. Akoz ou fatige, ou telman fatige ou. Ou konpran? *Who takes care of the caretaker?* So i parmi, mon a donn en pe bann legzanp. Selman sa mon pe zis *at the top of my head*. I annan bann programm, i annan bann teknisyen, bann dimoun ki deza, i annan ki'n fini travay lo la.

Zis pou nou letan i restriktire pou nou kapab enplimante, pou nou kapab fer. Si i annan keksoz nou kapab fer avan lannen fini, nou anvi fer. Mersi.

MR SPEAKER

Mersi Minis. Onorab Cosgrow.

HON WALLACE COSGROW

Mersi Mr Speaker. Bonn apre midi Minis. Minis mon kestyon i baze lo ou premye kestyon an term priyorate pou Minister. Ou'n idantifye *at least* 4 pwen, *restructuring*, transformasyon, *effectiveness* avek prodiktivite.

Minis eski ou pe dir nou ki poudir *throughout the portfolio* se sa bann *issues*, se sa bann keksoz koumsa ki devret ganny *tackle*?

E ler mon dir *throughout the portfolio*, mon pe koz osi dan bann lazans ki tonm anba sa 3 departman dan ou *portfolio*. Eski se sa ki'n idantifye *across the board* dan tou sa bann *portfolio* departman, lazans ki bezwen ganny dil avek?

E osi Minis, eski, la mon pe koz prensipalman pou Spor avek Lazenes en. Nou konnen poudir dan, avek lazenes i annan bokou bann lorganizasyon e bann zenn i kontan ganny konsilte.

Eski zot in ganny konsilte, *or* zot pe ganny konsilte konsernan sa bann *restructuring* transformasyon pou fer zot vin en pe pli efektiv?

Dan Spor, eski nou pe pran kont osi ki poudir spor i ganny *run* par bann Federasyon ek bann lasosyasyon ki annan zot Konstitisyon. Eski nou pe dir nou pe al *restructure* zot?

Akoz zot baze lo zot Konstitisyon avek ki zot *operate* anba la. Eski pou annan sa partisipasyon sa bann lasosyasyon, sa bann groupman dan sa *restructuring*, dan sa transformasyon ki ou oule anmennen?

Minis pa ganny mon mal, mon santi ou a krwar i en pti pe *top down*, mon pwennvi Minis. Mersi bokou.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi bokou Mr Speaker and thank you Onorab. Mon kontan bann diskisyon fran mwan. Esaki pou premye kestyon, bann *issues* i tousala. Kestyon i zeneral, mon'n reponn zeneral. Bann keksoz ki pertinan, ki zis pou ser ten *portfolio* ouswa ser ten departman, zot ki ava deside. Zot ki pou deside.

E mon krwar mon pe reponn ou dernyen kestyon, ouswa petet mon a sanz en pti gin, enfliyanse en pti gin sanz ou dernyen komanter ki pou fer sa.

Kekfwa mwan letan mon koze mon telman *assertive*, mon telman annan pasyon. Mon paret koman dominer,

mon paret koman *top down*. Mon garanti ou i otreman. I annandler bann dimoun ki paret pli dominer, bann dimoun pli *soft* ki i annan, ki pli ekoute ki i annan.

Eski pou ou kestyon, dezyenm kestyon lo kote konsiltasyon pou *Youth and Sports?*

Definitivman, yer letan nou ti al kot SNYC, sa ki nou dir ek bann *youth workers*, zot ti pe dir serten keksoz. Nou dir be ou konnen, vin avek *proposal*, vin avek ki mannyer zot krwar zot louvraz i merit sanze.

E sa ban *restructuring* la, semenn pase nou'n fer premye *executive meeting*, 2 semenn pase Vandredi. E nou'n dir avek tou *CEO, Chairperson*, bann *PSs* al dan zot lorganizasyon. Zot ki pe anmenn restriktirasyon. I pa lofis Minis ki pe anmenn restriktirasyon, zot ki pe anmennen.

Gidans ki nou zis dir, e letan mon'n koze, mon'n demann ek bann dimoun, premye keksoz, ou kapab al demann zot tou, mon'n demande.

Ki mannyer mon kapab servi zot? *How can I be at your service?* Sa ki zot anvi fer, ki ou pa'n ganny sans fer tou sa

letan, dir mwan kwa ki ou krwar bann priyorite.

I pa sorti kot mwan li. Mwan mon en *drive force*, kot mon ale, mon al tap laport partou. E mon fer sir ki sa ki zot anvi fer, si nou krwar ladan, nou tou nou *share common vision*, nou fer sir ki i arive.

Vwala ki mannyer keksoz i ganny fer. I pa *top down* li. Mon pe zis eksplike an pran kont ki sa bann kontribisyon i sorti kot sa bann teknisyen apre bann *Leaders* zot menm.

E mon krwar mon'n fini reponn sa kestyon Federasyon depi taler. Nou pe restrikte NSC, pa Federasyon. Nou pa tous Federasyon. Federasyon nou pe dir zot siport zot pou zot *strengthen zot leadership*. Pa restriktirasyon Federasyon, non. Mersi.

MR SPEAKER

Mersi Minis. Onorab Sathya Naidu.

HON SATHYA NAIDU

Mersi Mr Speaker. Mersi Minis. Mon krwar mon'n ganny larepons. Me still mon ava poz sa kestyon, kekfwa ou pou donn en diferan lapros. I annan bokou lasosyasyon ki kouver diferan sport ki bezwen sipor.

E dan serten lenstans zot ganny sa sipor. Me bann atlet i

santi ki zot pa pe ganny sa lankourazman ki zot krwar zot merite par zot lasosyasyon respektif.

Ki ou Minister pou fer diferaman, pou asire ki i annan en zefor kolaborativ lo sa size. Mon dezyenm kestyion i baze lo *sports tourism*, e mon vreman apresye ki ou'n fini abord sa size. E mon annan en garanti ki ou pou bouz sa domenn annavans. Kot sa sistenm ki'n la pandan 43 an la, zot in *fail*. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi bokou Mr Speaker. Mersi pou kestyion, ou a redemann mwan dezyenm kestyion, mon pa'n tro tande. Selman premye kestyion mon ti pe ekrir sa enn.

(laughter)

MINISTER MARIE-CELINE ZIALOR

Ou premye kestyion se ki nou pou fer konsernan bann atlet ki pa satisfe avek zot lasosyasyon Federasyon. Vwala ki nou oule zwe nou, fasilitater nou bezwen kapab ekoute. Nou pou

annan nou bann platform kot nou diskite. Ou konnen, dan sa bann 3 semenn mon'n remark en keksoz ki enportan. Koz ek nou bann dimoun, diskit ek zot. Donn zot loportinite pou zot kapab koze *openly, frankly*, i rezourd en kantite keksoz.

Sa ki ti pe arive, se ki dimoun, lanmen drwat pa ti pe koz ek lanmen gos. E i annan parey mon pe dir ou bann konversasyon difisil, fran, onnet ki nou pa ti pe ankouraze.

Nou pran en pe nou pou anba karpet ziske ler in pete, apre i vin en problem. Si nou zis kapab fer, ki bann dimoun, e fodre pa ki nou per pou koz ek dimoun.

Kantmenm bann dimoun i paret annan ler zot fer zot lekor difisil ekspre, pou nou pa koz ek zot, fodre nou kapab al koz avek zot, pou nou kapab vvar, be regarde, ki nou kapab fer?

Tou nou kestyion pou dir ki nou kapab fer, ki solisyon ki pou fer tou lede dimoun kontan. E i ed bann, *Gandhi* i dir, “*You cannot*” - *you know – “negotiate with the clenched fist.”* Ou pa kapab *shake hands*.

So nou, nou fer ouver zot lanmen en pti gin. Ouver lanmen, nou a donn ou ponnyendmen. E nou annan

kapabilite pou nou enflyans sa bann kalite diskisyon ki nou fer.

Pou fer bann dimoun zot menm zot rezourd zot problemm, zot menm zot vin avek bann solisyon, dan en serten fason ki ganny *facilitate* par Minister. Mersi.

MR SPEAKER

Mersi Minis. Onorab Richard Labrosse.

HON RICHARD LABROSSE

Bonn apre midi Mr Speaker. Bonn apre midi Minis. Minis zis avan mon demann mon kestyon, mon ti a kontan fer ou konnen ki mon pe ganny plizyer *text* kot bann dimoun Plaisance, pe apresye ou bann fason enterakson avek nou. E sa i montre nou ki dan nou distrik nou, nou annan en bon pe dimoun entelizan, ki mon krwar Prezidan i devret pran an kont ler bann restriktirasyon i vini.

So ki mon pou demann ou la ozordi, i konsernan Lafanmir ki melanze avek Lazenes. Par egzanp dan distrik Plaisance nou annan detrwa sa bann ka, kot nou annan bann zenn adolesan sirtou, zot napa laz pou travay. Mon pe demann ou ki ou plan i ki ou pe koz lo ou bann priorite. Konmsi ki ou

plan ki ou annan pou ou entegre pou zot devlope dan lekonomi pei, dan plas nou konnen ki kekfwa i met en pti pe presyon lo nou sistenm *Welfare as well*. Konmsi ki plan Minister Lafanmir lo sa kote e osi ki melanz avek Lazenes.

Apre dezyenm, mon ti a kontan konnen ler nou pe koz lo voluntarya, nou annan plizyer fasilit sportif dan distrik. Lontan nou konnen dimoun ti met zepol ansanm, pou zot kapab aranze parey nou dir ou fer keksoz marse. Ki plan ou Minister lo sa kote, kekfwa pou ou ankouraz plis voluntarya lo sa kote pou *maintenance of sport facilities?* Thank you.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab pou sipor. Lo premye kestyon konsernan bann dimoun ki mon krwar ou'n dir, bann zenn ki pa pe travay, ki *at risk*, napa laz travay. Sa i pou annan, i pou tonm dan sa bann programm spesifik pou sipor. Pou annan en kantite programm *counseling*, pou annan en kantite programm ki annan pou fer avek bann ka ki spesifik, ki

kekfwa annandler i pa tradisyonnal, kot sa bann dimoun.

E mon'n fek ganny lenformasyon taler ki dir nou annan en pe *case*, bann *mental health case* ki go unnoticed parmi bann manrmay, parmi zenn ki pa ganny detekte. Sa i parmi bann programm, anmezir ki bann teknisyen spesyalis, anmezir ki bann teknisyen i fer zot ganny, *at least* la prezan napa bokou, tro bokou problemm pou zis enterfer. Zot kapab fer sa bann prevansyon, vin avek sa bann program spesifik.

Nou ava kapab anonse ki bann programm spesifik pou ankadre. E pou al fer resers pou al rode lekel ankor sa bann group dimoun ki pa pe ganny touse pou nou kapab touse.

Dezyenm se volontarya. Definitivman i osi bann programm, avek SNYC i annan en programm *Young Citizen*, ki nou'n koz avek zot yer e nou'n kapab vwar, nou'n dir zot ki mannyer zot osi zot vin avek bann fason kot zot anmenn sa. Akoz sitwayennte i enkli lo osi tou volontarya kot ou pa toultan fer keksoz pour larzan, fer en pe keksoz volonter kot nou kapab *groom from grassroots*, komans amenn sa.

So, bann programm i deza li, petet kekfwa nou bezwen met

en pti pe plis vizibilite, pou nou kapab konnen ki pe ganny fer. E vwar ki mannyer nouvo kapab fer passe, ouswa kolekte lenformasyon dan bann lenpak ouswa si napa lenpak, ki mannyer nou kapab korize. Selman tousala i bann detay ki bann teknisyen definitivman pe travay lo la. Mersi.

MR SPEAKER

Mersi Minis. Onorab Uranie.

HON ROCKY URANIE

Mersi Mr Speaker. Bonn apre midi Minis. Bonn apre midi tou Onorab. Bonn apre midi tou Digwa a lekout. Minis an relasyon avek restriktirasyon ki ou'n dir, eski ou Minister i annan plan pou ankadre bann zenn Digwa, ki annan potansyel dan spor pou ariv onivo Nasyonal e enternasyonal? E dezyenm ki plan ou Minister pou anmenn lezot facilite sportif lo La Digue? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi bokou Mr Speaker. Mersi Onorab pou ou kestyon. Definitivman pa zis La Digue, lo Praslin osi tou mon krwar i annan bann zil ki mon vwar,

mon pou apresye ou de kestyon, akoz neglize. Lo kote fasilité, lo kote ankadreman, akoz en bon pe keksoz i lo Mahe. E mon konnen mon'n vwar en kantite bann *sportsmen*, bann *sportswomen* ki sorti lo sa 2 zil ki'n fer Sesel fyer.

Definitivman nou pou regarde pou nou kapab idantifye ki mannyer, avek bann resours ki nou annan, ki mannyer nou kapab ankadre. E letan nou pou fer sa vizit Praslin, nou pou vin La Digue tou. Mon krwar mon pou vin La Digue avan, pou nou kapab, nou ava kontakte ou. Pou nou kapab regarde ki mannyer ansanm, nou kapab travay ansanm pou nou ankadre nou bann zenn partou. Zenn partou dan Sesel nou bezwen regarde. E zistans pa sipoze en problemm. Mersi.

MR SPEAKER

Mersi Minis. Onorab Andy Labonte.

HON ANDY LABONTE

Mersi Mr Speaker. Bonn apre midi Minis. Minis mon kestyon i baze lo kestyon 5. Annefe parey ou'n koz lo 4 priyorite. Zis en pti leklersisman petet lo kote bann lenfrastriktir. Parey ou kapab konnen poudir nou

deza annan sertern lenfrastriktir ki'n deza ganny envestir en bon pe larzan ladan, e sa i enkli menm dan mon distrik. Swa lo nivo Nasional ou lo kote distrik i annan *court*, i annan laplenn kot i pe zis ganny neglize. E i napa en bon sistem mentenans. Eski ou Minister pe mazin pou annan en bon lekip pou kapab antretenir sa bann landrwa, pou kapab fer li *pleasant* pou bann *sportsmen* kapab servi li dan fason ki i merite?

E mon dezyenm kestyon, mon vreman apresye, ler mon'n tann ou dir ki i bon ki nou tir problemm avek solisyon. Annou konsantre plizoumwen lo solisyon. E sa i fer mwan mazin sa *Youth Health Center* ki ler nou ti lager pou gannyen, mon rapel mon ti ankor *en peer counselor*. I ti baze Mont Fleuri, nou ti pe lwe en landrwa. Me la vi ki nou'n ganny enn, nou zis vwar sa *Youth Health Center* pe ganny servi plizoumwen koman en landrwa kot i pe donn zis *Methadone*.

Alor eski ou Minister pe mazinen pou revwar sa sityasyon, pou donn bann zenn en souf, pou annan en landrwa kot zot kapab vreman zwenn. Mersi Minis.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Premye kestyon lo lenfrastriktir ganny neglize, sa in vin ver mon latansyon, mon krwar parmi enn bann premye keksoz ki'n vini. E nou'n idantifye kote problem administrative i ete. E nou pe fer en bann demars pou nou kapab debloke, pou nou kapab rezourd. I lafason ki mannyer sa striktir ki mannyer i ti ete, ki mannyer i ganny *manage*, e i ti annan en dimoun ki ti pe kontrol tousala. E nou pe fer en mannyer pou nou kapab aranze, depandan lo sa kontra nou pe get ki mannyer nou pou aranze.

Dezyenm lo kot *Health Care Centre*, definitivman SNYC in fini anvoy sa *request*, zot pe demande e mon transfer kot APDAR, in al mon krwar kot Minister Lasante la, nou pe re negosye detrwa, lo kote lenfrastriktir pou nou regarde, pou nou kapab anmenn bann servis esansyel ki ti la avan. Swa ki mannyer nou nobou kapab re negosye, pou nou kaba fer serten laranzman pour ki sa. Li osi selman i bezwen en pe plis modernite avek ki i efektiv. Me selman akoz

lafanmir la aprezan i avek lazene avek spor. I pou annan lezot fasilite osi tou, lezot landrwa ki nou ava kapab *provide* bann servis. Mersi.

MR SPEAKER

Mersi Minis. Onorab Phillip Arissol.

HON PHILLIP ARISSOL

Mersi Mr Speaker. Bonn apre midi Minis e tou bann dimoun. Minis vi ki lekipman pou *sports*, swa ki *sport* lekip ouswa *sport* endividyle i kout vreman ser, eski dan ou plan restriktirasyon ou pou koz avek Gouvernman pou rewvar *tax* lo lekipman *sports*? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Bokou Mr Speaker. Mersi Onorab. Mon krwar i en negosyasyon, i en sizesyon manke ki a vin tre souvan ver bann zabitan, bann dimoun pou annan en konversasyon lo sa size. Mon krwar sa i en keksoz ki Gouvernman pou re anmenn ver popilasyon, pou zot kontribisyon pou nou kapab pran bann desizyon. Mersi.

MR SPEAKER

Mersi Minis. Onorab Gervais Henrie.

HON GERVAIS HENRIE

Mersi Mr Speaker. Mon'n note ki annan bokou bann demann pou get bann fasilite sportif, mon swete selman apre napa okenn petisyon kont sa bann menm fasilite.

Kestyon pou Minis. I annan bann Federasyon Minis. E zot en problem pou pei akoz zot tonm dan kategori *non-profit sector* ki pa anliny avek tou bann regilasyon kot Rezistrar, e ki si sa problem pa ganny rezourd zot riske ganny *struck off* e bann zenn, bann inosan ki pou perdi. Mon ti ava kontan demann ou premyerman ki ou ti ava swete fer pou regle sa sityasyon ant *Registrar* ek bann Federasyon Sportif.

Dezyenmman i annan *issue tax*, bann Federasyon kot SRC, swa i annan ki pa pe pey ditou, ouswa i annan ki par egzanp zot napa reveni atraver en baro, parey bisiklet akoz i lo semen. Me li i peye. So, i annan en dezord la e nou koman Lezislater nou oule ki tou dimoun i pey *tax fairly*, akoz pou *broaden the base*. So, sa ki ou anvizaze fer pou regle osi sa sityasyon? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Kestyon, mon krwar tre valid, si i permet mon a pran tou lede ansanm. Sanmenm sa akoz ki Lalwa NSC pe ganny revize, akoz ki bann Polisi pe ganny revize. Akoz Gouvernman i bezwen akt koman fasilitater osi regilater. E sa bann keksoz pou ganny regilye dan en fason selman ki osi dan 2 lanmenm. En kote lannmen nou bezwen ferm, regilye tou sa bann anormalite *tax* ek tousala. Lo en lot kote lanmen osi selman, donn kapasite. Donn kapasite. Dir avek sa bann Federasyon, regard sa, vini nou a travay ansanm.

Ou konnen dan *sports*, permet mwan pou dir sa, dan *sports* in annan en bon pe *ego*. I annan en bon pe parey mon kontan mon pe repet sa bann parol, bann konversasyon difisil ki pa'n ganny fer, avek bann dimoun ki sipoze ganny fer dan en fason merit. In annan en bon pe politik dan *sport* e in annan en kantite lenterferans dan *sport*. E si nou retir tousala e nou fer bann dimoun re ganny konfyans dan zesyon, dan nouvo ladministrasyon. E mon

krwar poudir en bon pe sa bann keksoz nou vvar deza i pe komans ale e nou'n nobou kapab *takle* e rode.

Nou annan bann resers ki nou bezwen fer tou pou vvar, en pti git *the history* ki'n arive vreman. E fer keksoz baze lo merit, fer li fran, fer li byen. Fer li dan en fason latransparans tou. E ki apre osi nou bezwen, in annan en pe *territorial* tou. Ki in annan bann dimoun ki'n antre dan *management sports* ki pa'n kapab. Akoz i annan serten dimoun ki'n blok li.

E mon regrete pou dir, en kantite fwa sa ki lenformasyon ki mwan mon'n gannyen, i bann rezon politik. Se bann rezon politik oparavan. Si nou nobou kapab fer sa, mwan mon krwar poudir nou pou nobou kapab redres en pe sa sityasyon.

E ou konnen, apre osi mon krwar *sports management* dan lepase i pa'n ganny lenportans li, parey lezot *management* lezot antite. In ganny vvar koman *sport* i *games*. I annan *games* wi, apre i annan *sports* ki en keksoz serye. E mon krwar nou'n vvar taler, mon krwar nou'n koz lo *sports* avek biznes.

E si nou fer sa revolisyon, nou fer sa transformasyon ankor. Transformasyon

konportman, 3 mwan nou fer bann programm, nou a regarde e si i annan keksoz pou nou azite. Nou ava aziste ziska ler kot nou enfliyanse, ki nou kapab met en pe, anmenn en pe nouveau souf, en pe transformasyon ladan. Mersi.

MR SPEAKER

Mersi Minis. Onorab Georges.

HON BERNARD GEORGES

Mersi Mr Speaker. Mr Speaker, Minis mon'n ekout Minis Hoareau pli boner e la apre midi ou. E mon kestyon ki pa merit en repons se sa enn. Akoz ki Seselwa in esper 43an pou elekte ou Gouvernman o pouvwar silvouple? Mersi.

(APPLAUSE)

MR SPEAKER

Mersi Onorab. Minis ou annan en repons.

MINISTER MARIE-CELINE ZIALOR

Mersi Mr Speaker. No comments. Mon krwar sa fodre al demann zot. Mersi.

MR SPEAKER

Mersi. Onorab Michel Roucou.

HON MICHEL ROUCOU

Mr Speaker, mersi. Bonn apre midi Minis. Minis dapre mon'n ganny met dan mon latansyon poudir se ki ti annan plizyer *meeting* avek *visits* ki ti ganny fer dan distrik Mont Fleuri *regarding* nou laplenn Kolez e pou vvar lenfrastriktir. Ti annan komitman ki ti ganny fer par *CEO* li menm li ki ti la prezan dan *meeting* ek vizit. Ki ti pou vvar lenfrastriktir kot ti pou ganny *renovate*.

Akoz si ou pase ou menm, ou pase ou pou vvar sa lenfrastriktir in ganny abandonnen. E plizyer bann tim sport dan Mont-Fleuri i servi sa fasilite pou *store* zot bann keksoz. Tel ki tim foutbol, *handball* ki zot bann keksoz i la, ki plizyer fwa zot vvar kot voler i tant pou kas sa landrwa e vol zot bann keksoz. E i annan plizyer bann keksoz ki pa pe marse enkli delo li menm li, ki zot pa pe ganny akse avek.

Si ou ti kapab koz avek *CEO* li menm li, ki i ti kapab donn nou en larepons lo la. Si pou ganny fer e kan pou ganny fer e akoz in pran sitan bokou letan. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Mon'n pran ou konsern, nou ava met devan *CEO*. Nou ava fer li personnelman ganny kontak avek ou pou li kapab fer serten diskisyon, pou fer serten laranzman. Mersi.

MR SPEAKER

Mersi Minis. E la mon ava al lo dernyen kestyon. Silvouple pa lev lanmen. Onorab Rosie Bistoquet.

HON ROSIE BISTOQUET

Mersi Mr Speaker. Bonn apre midi Minis. Mon kontan ou koze fran ki ou pe komunik avek nou ozordi. Mwan mon ti annan en sizesyon ouswa en kestyon lo bann group vilnerab, tre vilnerab. Ou'n koz en bon pe lo *low lying fruits*. Me selman nou konnen isi Sesel nou annan en kantite brans anler menm. I annan en bon pe fri ladan. Me pou nou arive kas sa bann fri, nou bezwen en golet banbou. Me selman nou trouve poudir sa golet banbou, ki nou pou kas sa bann fri anler, swa in kase, swa in pouri.

Mwan ki mon ti pou demann ou Minis, se ki ou Minister ki Minister Lafanmir, Departman Lafanmir sirtou, i annan vizavi bann striktir ki manke pou siport bann fanmir

ki'n kase. Sa i enn. Sirtou kot i konsern bann sant kot i fer *psychosocial support* pou bann fanmir. Konmela nou konnen problemm enkoni, depresyon, *social issues*.

Lo en lot ankor, i annan en kantite bann zenn ankor, si nou pe koz lo sa bann brans ki anler menm. En kantite bann zenn ki dan drog e mon konnen zot annan en lafanmir ki'n deza kase. E ki ou Minister i anvizaze fer pou sa group. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab. Mon krwar en kestyon tre valab la. Mon pou pran tou lede ansanm. Sa bann programm i ou pe koz lo la, sa i bann konsern, akoz a sa pou mwan personnelman i pre avek mon leker. I annan spesyalis dan Departman Lafanmir ki ti'n fini annan programm.

E letan nou'n diskite letan nou pe fer sa restriktirasyon, pe vwar lekel ki pou bouz dan lekel, ki pou bann transfer ki pou ganny fer. Ki zot in fini dir ek mwan, *ah be of course* i annan dimoun ki'n al fer *Masters*, ki'n al fer Diplonm,

ki'n fer Degre dan sa ki ou pe koz lo la. Ki zot in fini, koman nou pe koze la, *draw* programm, fini fer. Pou nou kapab ale, pou nou al enplimante.

Sirtou keksoz ki non pou anonse parey mon pe dir, avan lannen fini, ki pou nou komans al fer. E sirtou bann dimoun ki parey sipor, letan Sosyal in entervenir, in fer bann lentervansyon. Nou, nou bezwen vini pou nou ranforsi ki i pe *relapse*, i pa retourn en problemm sosyal ouswa bann ki pre pou vin en problemm sosyal, pou nou kapab fer prevansyon.

E bann problem labi sibstans, i plis ki en problem medikal. E mon krwar vwar la akoz. Sa i mon lopinyon personnel akoz petet bann programm avan, nou pe zis targete kemikal i *fail* en pe. I en problemm spirityel dan ou nanm. Parey mon kontan dir, ou al dormi aswar, ou nanm ki swaf, i lafen. Ou pa konnen ou, ou krwar petet kekfwa ou bezwen lot keksoz. Ou al rod en keksoz dan drog, dan lalkol.

Vwala akoz nou ti pe koz avek Minister Fonseka pou rod bann dimoun anler kekfwa ki *high* lo *adrenalin*, ki nou bezwen tir sa enerzik, fer li fer sports ki *high adrenalin* ki nou napa Sesel petet en pe. Ki tir sa lenerzi met ladan.

Si nou fer li, parey mon kontan dir sa en lapros 360 degre, avek tou programm labi sibstans, pa zis sa. I annan problemm *gambling* tou ki en gro problemm Sesel. E lezot problemm tou ki nou bezwen kapab vwar ki mannyer nou anmenn en keksoz diferan, ki pa target zis lo en nivo fizik. Ki *let me tell you, scientifically* zis 10poursan rezolisyon, 90 poursan i pa fizik. Ou vwar?

So i anmenn sa bann larestan. I annan bann larestan. I annan bann *psychotherapy*, i annan en kantite bann novo lafors ki nou bezwen pe anmennen. e i annan bann *expert* Sesel, i annan en kantite dimoun ki'n pare Sesel koman nou pe koze la.

Nou, nou bezwen fer sir dan Minister, nou *provide* sa platform. Nou donn apre sa vizibilite. Letan mon ti pe koze, mesaz pou Lazournen bann Msye, mon pa'n ganny sans swet bann msye dan Lasanble 'Bonnfet. Nou bezwen fer sir ki bann imsy, bann madanm, bann dimoun ki pozitiv, ki pe anmenn sa sanzman pozitiv la, zot ki ganny plis vizibilite avek larzan, avek lenerzi pou fer keksoz marse. Plizyer fwa nou met lanfaz lo lenerzi ek vizibilite lo keksoz negativ. Petet i zis 10

poursan li, 90poursan nou pa pe regarde.

E vwala en pe nou bann plan pou nou kapab fer sa. E nou annan nou, nou annan en kantite dimoun dan sa pei ki pozitiv, ki'n pare pou zot anmenn en kontribisyon pozitiv. Annou atrap zot lanmen, annou donn zot resours. Annou donn zot lenerzi, donn zot nou letan, nou a vwar mon dir zot toultan ki kote nou pou ale dan sa pei. Mersi.

MR SPEAKER

Mersi Minis. E avek sa nou'n termin nou sesyon kestyon pou ozordi. Mersi bokou Minis pou tou ou larepons. Nou pou *adjourn* e Lasanble a repran demen 9er bomaten. Mersi.

(ADJOURNMENT)